

指巖旅京實錄

復辟半月記

交通圖書館印行

上海图书馆藏书



A541 212 0013 1867B

# 著名小說一千種

各類說明書如下

名著小說一類 **愛國英雄小史**

●王瀟淵編輯 ●吳綺緣評點

歷來血性丈夫以復仇雪恥護國保種之心赴湯蹈火衝鋒陷陣卒以身殉者更僕數而文獻難徵偉烈不彰安足激勵後世致貽同胞有五分鐘愛國之識惜哉瀛洲綺緣兩先生江南名士著作等身含冷淚抱熱血紀錄痛快淋漓之事實鐵影血花逼人眉宇觀感所及足資模範寄語同胞盡執一編

名著小說一類 **天涯異人傳**

●姜俠魂輯

異人畸士自古有之為草野山澤間靈秀所鍾備是編所載皆奇材殊能離羣絕之輩往往理骨猿背生有異稟靈捷飛行出人意外者此種傳記非獨為天壤間之奇觀亦寓開揚國魂之微意云爾

名著小說一類 **情天綺語**

●情禮室主編纂 ●曼殊批眉 ●江頭人評點

三千大世界皆情界也三十六洞天皆情天也所謂天地若無情不生一切物一切物無情不能環相生人為一切物之靈蓋情之所鍾正在吾輩然情天可躋慾海無邊偶或不慎遽入魔道矣是書凡情天愛河間之異事佳話能以發揮情禪指導癡迷者著錄

成峽崎嶇風華中寓正軌就範意為情史之正宗青年之木鐸也

名著小說一類 **名閨奇媛集**

●挹芬女士編纂 ●獨立山人批眉 ●虛竹生評點

挹芬具發揚女界之心胸以糾正坤道為宗旨運謝月宋風之文筆寫鮑妹左芬之逸聞猶覺脣光衫影粉膩脂香透溢於字裏行間

名著小說一類 **六十四奇案**

●鐵樓輯

吾國古今來身膺民社具片言折獄才有明察秋毫鐵面青天之譽者代不乏人究其術無非度理準情守經達權四者而已本編係名公審判疑案皆離奇變幻足使拍案叫絕吾恐歐洲偵探家福爾摩斯斯歇洛克諸輩亦當首肯可作酷吏之棒喝或亦斷獄之寶鑑也

名著小說一類 **稗史秘笈**

●姜俠魂搜輯

是書多為古今人名著而最名貴罕觀者莫如唐代武則天與狄仁傑遺事之梁公九諫宋張浚大奸蔡京所著保和殿曲宴記太清樓侍宴記張浚大奸蔡京代周密乾淳歲時記明代宋濟洪武聖政記清代蘭蕙外史靖逆記及李自成張獻忠軼事諸篇係秘藏孤本借鈔所得其餘亦係文章樸茂趣味深濃者堪與虞初諸志並駕齊驅

# 著名小說一千種

各類說明書如下

名著小說一類 **勝國名人軼事**  
千種第七類

●王瀛洲輯

採輯滿清名公鉅子之遺聞逸事足有二百餘人紀

述翔實莊諧兼備不愧為有清一代裨官之信史也

名著小說一類 **漫遊誌異**  
千種第八類

●王瀛洲編輯 ●吳綺綠訂正

是本甄選名人紀游傑作上編為殊方蠻俗志下編

為山影瀑聲錄名山巨川邊徼絕域收納冊內可作

臥遊圖觀

名著小說一類 **外交思痛錄**  
千種第九類

●莊病骸編纂 ●八寶王郎評點

追溯吾國喪權辱國之遺事令人餘痛不已然波平

瀾起方興未艾吾儕處斧魚俎肉之列思之不寒而

慄是編搜輯數十年來名人所紀可慘可恨之事實

編成系統的恥辱之信史似覺血淚斑斕隱約可見  
然借往事以警國人諒亦高明所不棄

名著小說一類 **世界亡國稗史**  
千種第十類

●楊南邨編撰

天下最痛最慘事莫如亡國與滅種是編以身毒埃

及之故事作神州禹甸之晨鐘剝膚截肢慘紅暖綠

奕奕逼人無異目睹真境吾願一般有心人執讀之

餘知所警惕

名著小說一類 **塵寰奇觚**  
千種第十一類

●黃退菴纂輯

內外六合無奇弗備是書不啻為攝影之寶鏡事事

物物鴻纖畢具足與集異諾皇後先輝映而離奇中

無荒誕弊較為有過之無不及  
名著小說一類 **香豔大觀**  
千種第十二類

●楊南邨編纂


仿香豔叢書之例採選名著拾遺補殘盡在是編內

有美人之研究一帙為清季某名人遺著凡數千言

較眉謠黛史益覺幽雅宜人尤為特色

# 復辟半月記序

傳曰天之所廢誰能興之竊嘗獨居深念以為傳之所謂天者亦驗之於人而已董子亦云善言天者必有驗於人夫世界潮流日亟政體之變遷即因人心之趨向而定雖有大力莫能逆其勢而為之由專制入共和其勢若決江河沛然難禦稍有世界知識者莫不以為當然人也實天也而况天厭滿清禍亂踵起牝后貪人紊紀綱於上賊民宵小抵法網於下大命已傾不可復返故武漢義旗一舉不匝月而響應者十餘省強兵悍帥遲慮却顧率傾向於共和達清帝讓位之目的而後止可不謂之天哉維時蹈常習故之子一孔之儒怙過持祿之官吏尙以為偶然之數意存僥倖一二擁兵自衛者專權自恣恐共和政體之不利於己亦各懷挾私心躍躍欲一嘗試而於是袁氏洪憲之怪劇出矣夫使專制政體果有一線之希望可以存於今日者彼袁氏之很心辣手寧不已袞冕當陽稱制曰可公然受萬方之朝拜哉而孰處知心積慮謀之十餘年而不足親離衆叛敗之八十一日而有餘如是則凡世之




作。專。制。富。貴。夢。者。亦。可。以。悟。矣。而。乃。醞。釀。黑。幕。野。心。未。死。鹵。莽。之。張。瓣。帥。天。誘。其。衷。  
孤。注。一。擲。倡。亂。輦。轂。喋。血。都。門。不。崇。朝。而。毀。滅。已。盡。暈。花。泡。影。無。是。之。速。人。心。天。命。  
不。益。可。睹。哉。嗚。呼。此。天。之。所。以。警。專。制。迷。夢。與。妄。圖。一。姓。再。興。者。可。謂。深。切。著。明。矣。  
若。夫。排。滿。之。說。非。我。族。類。之。詛。在。今。日。已。爲。明。日。之。黃。花。成。敗。之。道。固。在。彼。不。在。此。  
也。讀。此。記。者。微。獨。可。悉。當。日。之。現。狀。如。奕。棋。兒。戲。甘。爲。國。人。唾。棄。而。不。恤。且。於。天。人。  
之。際。比。觀。而。得。其。會。通。庶。幾。於。後。來。者。有。所。鑑。戒。焉。

民國六年七月卅一日許指嚴識

# 復辟半月記

指嚴譯



丁巳五月初予因病淹留京西之財政部印刷局中。杜門不出者半月矣。日惟以一紙新聞爲警告之良友。時政潮日亟。國是紛歧。徐州辯帥（張勳）留辯而喜人稱大帥。故有此名。擁兵北來。居民重足觀聽已久。幸傳李內閣將產出閣員已發表。及半。或希大難可紓。不意有五月十三日之變。辯帥高呼復辟。龍旗一雲滿城。自謂迅雷不及掩耳。識者斥以兒戲。禍國殃民。無異引刃自戕。自是釁端既開。兵旣日亟。外省各督軍劍及屨及。而尤以段前總理爲首倡。旬日之內。京師危如累卵。居人一夕數驚。予既不獲南歸。身困危城。日擊險象。同人咸避難。他適槍礮聲中。獨處無聊。泚筆拉雜。志之自附於汴。困濕襟。虎口餘生之亞也。

是役禍始遠。因於府院之意見近。因於內閣議會之爭執。而段內閣突遭免職。各督軍稱兵。刼制中央。解散國會。遂授辯帥以覬覦之隙。蓋六年來蘊含之毒。至是而一洩也。先是段內閣對於歐戰問題。主張加入協約戰團。對德絕交。進至宣戰。強迫國

會之同意。黎總統意不謂然。國民派議員反對尤烈。謂此乃北洋派利用時機伸張其勢力之一種作用。絕對不與通過。適有公民大會率領市民等憤起抗激。刼制議員。議員等益譁然以爲內閣所嗾使。於是倒閣之聲浪益高。而總統亦無調護之餘地矣。月日遂免段總理職。而外交長伍氏以國民派領袖代表副署公府及兩院似戰勝矣。然春雷一聲和平破裂。各督軍投袂而起爲段氏興問罪師。挾荼火之勢以壓首都。集矢於元首。與國會陷中央於無政府者幾匝月。元首被迫乃召外兵。辦帥趾高氣揚以調人。自命人亦以和事老望之。而李合肥內閣者與此辦帥有表裏之關係。人皆信其可成。雖非滿意。然以普通壓亂之心理揣測。殊深幸其彼善於此也。辦帥向有復辟之野心。惟李氏與辦帥有舊。或冀其移易情感以成全。此三月之內閣（李氏自言祇擔任二月）故當時絕不疑其有他。卽李氏亦信辦帥助已組成閣體。始奏凱南歸。故皇皇選擇國務員立內閣。辦事章程直至五月十二日猶儼然以維持現狀擁護共和。自任明言復辟不發生卽已可告無罪於國民者。（詳後



通電）豈知不轉瞬而夜中之爆裂彈猝發康聖人手擬諭旨辦子軍高揭龍旗六年民國一旦掃除煌煌宣統正朔揭糞於通衢之條告矣李氏討此沒趣狼狽出都門而臥病津沽之段前總理投袂以起於是戰禍日亟首善之京師日陷於險惡之絕地自五月十三以後危象環生瞬息千變予既蟄居無俚亦無引避之必要乃最見聞詳誌之將以餉南方諸友云

●民國六年七月一日即陰歷五月十三日是日適值星期予於晨殮後赴友人約至前門外觀音寺街青雲閣之茗樓蓋予不出門者兼旬矣因抱石生念予不置不可不往微雨灑塗天氣較涼爽既至抱石生已先在共道契闊時市街晏然絕不知有何事故發生也因呼侍者治具供午殮出中國銀行紙幣畀之侍者曰今日中幣市價止易錢七百數十予駭問何故低落侍者笑不答知必有故疑辦軍有他變蓋辦帥軍來已兼旬有識者莫不防其生事杯弓蛇影不能無猜正揣測間忽有舊友躡躡來曰見傳單否傳單者報館有臨時緊信刊印片紙發行所發號外是也予與

抱石生俱云未見友曰今日三時宣統已復辟矣予等皆駭然不之信命人四出取傳單不可得曰爲警士所干涉不聽散布予曰然則或尙未成事實也友乃述傳單上稱『今日二時宣統帝復辟虛君共和責任內閣』等云云并述列名者爲內閣議政大臣張勳王士珍陳寶琛梁敦彥劉廷琛袁大化張鎮芳事已鑿鑿嗣有友人自東城來則言辯子軍環衛皇宮如臨大敵恐有變事猝發徵之各方面情形傳單語決非訛造至下午四五時而市街滿目皆龍旗矣蓋警令所迫也旋接內閣印鑄局所刊復辟上諭『朕不幸以冲齡繼承大業兢兢在疚未堪多難辛亥變起我孝定景皇后至德深仁不忍生民塗炭毅然以祖宗創垂之重億兆生靈之命付託前閣臣袁世凱設臨時政府推讓政權公諸天下冀以息爭弭亂民得安居乃國體自改共和以來紛爭無已迭起干戈強劫暴斂賄賂公行歲入增至四萬萬而仍患不足外債增至十萬萬而有加無已海內囂然喪其樂生之氣使我孝定景皇后不得已遜政恤民之舉轉以重苦吾民此誠孝定景皇后初衷所不及料在天之靈惻痛而

難安者而朕深居宮禁日夜禱天徬徨飲泣不知所出者也今者復以黨爭激成兵禍天下洶洶久莫能定共和政體補救已窮據張勳馮國璋陸榮廷（二公係爲張捏誣詳後通電）等以國本動搖人心思舊合詞奏請復辟以拯生靈又據瞿鴻禨等（聞隔日有電促張不可失此機會張計乃決）爲國勢阡危人心渙散合詞奏請御極聽政以順天人又據黎元洪奏請（全係矯誣詳後）奉還大政以惠中國而拯生民各等語覽奏情詞懇切實深痛懼既不敢以天下存亡之大責輕任於冲人微渺之躬又不忍以一姓禍福之讐言遂置億兆生靈於不顧權衡重輕天人交迫不得已準如所奏於宣統九年五月十三日臨朝聽政收回大權與民更始自今以往以綱常名教爲精神之憲法以禮義廉恥收潰決之人心上下一以至誠相感不徒恃法守爲維繫之資政今以懲毖爲心不得以國本爲嘗試之具况當此萬象虛耗元氣垂竭存亡絕續之交朕臨深履薄固不敢有樂爲君稍自縱逸爾大小臣工尤當精白乃心滌除舊染息息以民瘼爲念爲民生留一分元氣卽爲國家延一息命

脈庶幾危亡可救感召天庥所有興復初政亟應興革諸大端條舉如下一欽遵德宗景皇帝諭旨大權統於朝廷庶政公諸輿論定爲大清帝國善法列國君主立憲政體一皇室經費仍照所定每年四百萬元數目按年撥用不得絲毫增加一懷遵本朝祖制親貴不得干預政事一實行融化滿漢畛域所有以前一切滿蒙官缺已經裁撤者概不復設至通婚易俗等事並著所司條議具奏一自宣統九年五月本日以前凡與東西各國正式簽定條約及已付債款合同一律繼續有效一民國所行印花稅一項應即廢止以紓民困其餘苛細雜捐並着各省督撫查明奏請分別裁撤一民國刑律不適國情應即廢除暫以宣統初年頒定現行刑律爲準一禁除黨派惡習其從前政治罪犯概予赦免儻有自棄於民而擾亂治安者朕不敢赦一凡我臣民無論已否剪髮應遵照宣統三年九月諭旨悉聽其便凡此九條誓共遵守皇天后土實鑒臨之將此通諭知之欽此」聞此諭稿出自萬繩栻胡嗣瑗兩秘書之手。經康聖人筆削始發表。康聖人自鳴得意對人謂綱常名教兩語實可抵半部。

論語天下從此可望太平。張辯帥亦對外國記者言：民國成立以來紛擾不絕，生民罹塗炭之苦，皆由共和不適於中國。故徧商同志，斷行宣統復辟，以救國危。決非爲予個人之名譽，且予力極微，此事亦非一人所敢擅舉。京內外贊成頗居多數，如馮陸已互相聯絡，故兩廣及江蘇方面已不足憂。餘若山東、直隸、山西、河南亦贊成。黎總統雖不願辭職，然彼已得一等公爵，當無何等施爲。僅段祺瑞反對此舉，然毫無兵力，不足懸念。云云（不知投袂起者段實哀然舉首詳後）。同日又發上諭多條，大抵以爵祿縻人爲上策。如「本日黎元洪奏請奉還國政，籲懇復御大統一摺，據奏稱該員因兵變被脅盜竊大位，謬領國事，無濟時艱，并歷陳改建共和諸多弊害，奏懇復御大統以拯生靈，自請待罪有司等語，覽奏情詞悱惻，出於至誠，從亂既非本懷，歸政尤明大義，際此國勢危急，大局飄搖，竟能作吾民親上之先定，中國救亡之策，厥功甚偉，深孚朕心。黎元洪著錫封一等公，以彰殊典，尙其領承朕命，永荷天庥。欽此。」按此摺此諭純以辯帥黑幕中一手締造，以爲人將震其虛榮，帖然就範，抑

何愚也。又『興復伊始，特設內閣議政大臣，以資贊襄，而專責成。並設閣丞二員，其餘京外員缺，均照宣統初年官制辦理。其現任文武大小官員，均著照常供職。欽此。』此辯帥自爲擅政地步，且以位置同謀諸人計至便也。於是己名首列議政大臣，而王士珍、陳寶琛、梁敦彥、劉廷琛、袁大化、張鎮芳、輔之、閣丞則萬胡兩秘書如左右手，各部尙書臭味差池，外務、梁敦彥、度支、張鎮芳、參謀、王士珍、陸軍、雷震春、民政、朱家寶未到任前，以吳炳湘署理，而又設弼德院之特殊機關，以誘徐世昌、康聖人，乃授副院長，又自取直隸總督、北洋大臣、留京辦事、內外全權兼收，並掌一口獨吞，驕矜之氣，凌霄萬丈矣。其外有各督軍大都暫仍舊貫，京職自侍郎以下，廣甄舊派人物，幾於故紙堆中，披得鼠齒殘本，自謂通書秘錄也。有悉斯舉內幕者，謂辯帥自應中央之召，請以調人自居，當徐州出發時，確無斷行復辟之決心，及抵津門，鑒於四圍情形，忽觸舊日之感想，遂認乘此時機可以決行復辟，惟尙未主張速成。至李內閣艱於產出，而各督軍蝸蟻不已，漸與江王、陳、吳、梁等秘密協議，亦曾發電詢南。

方。要。人。意。見。覆。電。皆。無。何。等。之。阻。抗。而。電。召。康。聖。人。則。惠。然。肯。來。故。大。學。士。瞿。鴻。機。等。聯。名。電。請。機。不。可。失。事。宜。迅。辦。於。是。復。辟。之。計。乃。決。京。中。要。人。大。都。與。聞。惟。日。期。尙。未。定。至。十。二。日。晚。間。外。間。已。漸。知。辦。兵。營。中。密。製。龍。旗。或。有。走。告。於。張。者。始。急。定。十。三。日。實。行。惟。是。晚。因。江。西。旅。京。一。部。分。人。士。假。會。館。開。歡。迎。會。廣。徵。名。伶。獻。技。以。娛。辦。帥。辦。帥。從。容。前。往。行。所。無。事。惟。命。名。伶。梅。蘭。芳。宜。早。演。謂。當。飽。眼。福。卽。早。歸。寢。耳。衆。乃。命。梅。伶。於。十。二。時。前。演。伎。旣。畢。辦。帥。早。歸。南。河。沿。本。宅。而。江。吳。王。康。等。已。來。仍。開。秘。密。會。議。於。是。一。方。面。令。江。氏。以。兵。入。宮。又。命。辦。兵。二。營。偕。往。扶。宣。統。帝。登。殿。一。方。面。則。派。王。士。珍。等。代。表。民。國。梁。鼎。芬。代。表。清。室。李。慶。章。代。表。辦。帥。入。總。統。府。勸。告。歸。政。復。辟。黎。總。統。態。度。非。常。堅。決。謂。予。一。人。進。退。不。成。問。題。惟。民。國。政。府。乃。受。國。民。之。付。託。非。國。民。有。正。當。之。表。示。予。決。不。能。私。相。授。受。云。云。江。王。等。亦。無。如。何。而。清。帝。室。中。則。瑾。瑜。等。四。太。妃。不。願。遽。行。復。辟。以。招。危。險。世。太。保。續。亦。叩。頭。流。血。請。斟。酌。盡。善。方。可。實。行。辦。帥。岸。然。不。顧。遂。於。三。時。捧。幼。帝。出。殿。受。朝。賀。禮。矣。旣。畢。乃。乘。汽。車。

歷訪各皇族十時始歸復開協議始將上諭數道原稿送印鑄局刊刷發表焉組織內閣正當進行之李仲宣氏自三時以前蓋絕無所知晚間尙招在京政黨重要人物酬酢一堂席間演說謂予才疏學淺對於民國毫無大功祇此次使復辟不至實現區區勞績聊堪自誇衆猶喁喁稱頌盡懽而散及夜半得江氏電話始知變起倉猝急往張宅張辭不晤懊喪而返比天曉嗒然向津門引避矣越三日始通電各省報告當日被賣情狀(詳後)辦帥之驕詐與李氏之暗鈍皆絕好史料也警察總監吳鏡潭氏於十三日未明以前即發緊急廳令飭各區署長施行地方戒嚴告諭商民勿得驚恐別遣警察保安隊分布使館界附近爲嚴重之保衛內外城商肆則於午後三時皆先後高揭龍旗亦警令所播也至各路車站電報局等處皆有辦兵把守地方秩序殊屬安靜亦無人敢狂議復辟事但覺街衢行人較常時反致增多蓋是日星期休息而此事發生過驟居人將信將疑咸外出探視或瞧熱鬧以爲新聞資料耳暫時殊無何等危險表示中央公園則固爲清室社稷壇故將游覽券停售



或云有軍官數人據此行樂慶賀驅辦事人入室故游人不敢入且聞軍官召妓多人入園卽於來令雨軒實行英雄兒女之話劇云可謂復辟紀念日之一段豔史也。停車場之待車者頓形擁擠尤以婦孺爲夥蓋聞警後知必有變事咸赴津避禍致有此現象耳是日商肆皆龍旗外惟總統府尙懸五色旗財政部及參謀本部亦然聞各國公使協議則暫時採傍觀態度云。

木日晨起內城東西長安街以北辦兵滿布通衢車馬絡繹槍刀粲然凡居人乘車過南河沿張宅附近者輒遭辦兵喝阻某國記者驅車過南灣子辦兵最惡洋人卽循例攔路阻車命下車步行記者不允辦兵卽怒號咆哮攫記者之腕逼令下車記者憤而叱責辦兵卽以鎗擬之欲取其生命正相持間適有步軍武弁過竭力排解始得免禍記者歸而大詬辦兵絕無教育紀律不置又一記者言嘗乘汽車周覽各處警備情形初由西長安街出天安門辦兵數百護衛各門又中華門亦有二百餘名折東長安街則警察隊每二十步站立一名宛如戰場電報局門前亦有辦兵數

十名嚴重守衛於欲進門者大聲叱咤阻不令入由公府大街出東華門外有十二師之步隊約二百餘名又轉到景山從山下仰視則山上山下兵士充滿不計其數而中央公園則已成禁地人心皇皇朝不保夕矣是日辦帥卽有通電發出『自頃政象譎奇中原鼎沸義兵未解南耗旋驚政府幾等贅旒疲氓迄無安枕怵內訌之孔亟虞外侮之紛乘全國飄搖靡知所屆勳惟治國猶之治病必先洞其癥結而後攻達易爲功衛國猶之衛身必先定其心君而後清寧可長保旣同處厝火積薪之會當愈勵揮戈返日之忠不敢不掬此血誠爲天下正言以告溯自辛亥武昌兵變刼改共和綱紀隳頽老成絕迹暴民橫恣宵小把持獎罪魁爲偉人視死囚爲烈士議會以亂民爲後盾閣員恃死黨爲護符以濫借外債爲理財以剝削民脂爲裕課以壓抑善良爲自治以摧折耆宿爲開通或廣布謠言而號爲輿論或密行輸款而托爲外交無非恃賣國爲謀國之工借立法爲舞法之具馴致昌言廢孔立召神恫悖禮害羣率由獸行以故道德淪喪法度凌夷匪黨縱橫餓殍載道一農之產旣厄

於訛詐復厄於誅求一商之貲非耗於官捐卽耗於盜劫凡在位者侵吞賄賂交濟其奸名爲民國而不知有民稱爲國民而不知有國至今民窮財盡而國本亦不免動搖莫非國體不良遂至此極卽此次政爭伊始不過中央略失其平若在紀綱稍振之時焉有膠轕不解之患乃竟兵連方鎮險象環生一二日間瀾漫天地迄今內蒙獨立尙未取消西南亂機時虞竊發國會雖經解散政府久聽虛懸總理旣爲內外所不承仍卽覲然通告就職政令所及不出都門於是退職議員公詆總統之言爲僞令推原禍始實以共和爲之厲階且國體旣號共和總統必須選舉權利所在人懷倖心（中略）然在位者地醜德齊莫能相下在野者資輕力薄孰願率從縱欲揀選元良一時亦難其選蓋總統之職位高權重有其才而無其德往者旣時蓄野心有其德而無其才繼者乃徒供牽鼻重以南北趨向不同選在北則南爭選在南則北爭爭端相尋而國非其國矣默察時勢人情與其襲共和之虛名取滅亡之實禍何如屏除黨見改建一鞏固帝國以競存於列強之間（中略）中國本爲數千年

君主之制聖賢繼踵代有留貽治之方較各國爲尤順然則爲時勢計莫如規復君主爲名教計更莫如推戴舊君此心此理八表攸同（中略）前者朝廷遜政另置臨時政府原謂試行共和之後足以弭亂綏民今共和已閱六年而變亂相尋未已仍以諭旨收回政柄實與初旨相符（中略）比乃猝逢時變來會上京竊以爲暫偷一日之安自不如速定萬年之計徵之於古既如彼徵之於今又如此大勢所嚮天與人歸此固非勳等一人之私言實中外人心之公理業已熟商內外文武衆議僉同謹於本日奏請皇上復辟以植國本而固人心庶幾上以仰慰列聖之靈下以俯慰羣生之望風聲所樹海內景從凡我同胞皆屬先朝舊臣受恩深重卽軍民人等亦皆食毛踐土世沐生成接電後應卽遵用正朔懸掛龍旗國難方殷時乎不再（中略）凡百君子當共鑒之』是日旗人咸喜躍若狂婦孺互相道喜惟有知識則憂形於色謂辦帥太鹵莽恐卽日惹起兵禍云予於晚六時歸憂思不能成寐

●七月二日卽五月十四日京師市面尙屬平靜惟盛傳反對復辟者頗多徐世昌

有電致辦帥。略謂復辟予不反對。惟現非其時。不顧時機。妄行此種大事。對於清室。爲不忠。對於自己。爲自殺。吾輩所最不取。故吾輩對於此次之復辟。表明絕端反對之意。云云。又馮副總統亦有確報。謂眞意不贊成。復辟其所以表示贊成者。不過一時之權衡。別有用意。所在至段合肥。則反對已久。警耗至津。卽日投袂而起。乘車南下。雖未探悉其所之。大約必先往山東。或西至保定。與張曹兩督軍商榷北征大事矣。近畿駐紮之十二師十三師之軍隊。業已表示反對。但待段總理之動靜。爲重輕。又聞上午四時。梁鼎芬王士珍李慶璋等。聯袂進公府。謁見黎氏。請其退讓政權。黎答以民國係國民公有之物。余受國民付託之重。退位一節。當以全國國民之公意。爲從違。與個人毫無關係。又對梁鼎芬云。君欲盡忠清室。當爲清室計。萬全復辟。以後予卽不負治安責任。言時氣象甚堅決。又密謀復辟之主。動實辦帥參謀長萬繩棻氏。日前電招康有爲進京。積極進行緊要文稿。悉出原手。張萬得康頗興高采。烈而其宅中人物。稍明大勢者。均不謂然。除辦帥心腹李慶璋外。卽張夫人某氏亦起。

而進忠告惟辦帥有進無退勇往直前云。早七時張勳等率領在京文武大小官員三百餘進神武門至傳心殿。陛見宣統。帝行一跪三叩禮畢。清帝按班召見。凡官居二品者一律賜坐。徐徐問話各員。至九時始出宮。宣統帝頒諭賜張勳坐朝。轎惟張氏仍由東華門步行。直入乾清門。午十二時頒諭將三海公府改爲內閣議政大臣處。新華門關閉。由西苑門出入。午後友人來談。言此次復辟首謀固屬張勳。而參與帷幄者有雷震春。吳炳湘。萬繩棧。康有爲。至王士珍。江朝宗。兩氏事前未與其謀。直至一時二時頃。第十三師兵士受調入城。至西直門要求開門守門司令某以未奉上官命拒之。爭執良久。卽由電話通問江朝宗氏。江甚驚異。正遲疑問。又接雷氏電話。強迫以開門事。江不能嚴拒。竟下令開門。至四時左右。十三師始得完全入城。同時張勳電告王士珍。江朝宗。兩人速來。有萬急事。面商。王江卽赴張宅。張告以復辟事。迫令兩人簽字以示無貳。王江驚出意外。顏色驟變。張乃以威迫之。兩人懼甚。遂皆簽字。所拍發之勸進通電。係康有爲屬筆。所列人名多假借名義者。如蕭安國等。

並未贊成復辟於此內幕可見一斑也聞各典商會議鑒於壬子正月十三日之搶劫故將貴重物品金銀首飾等移往他處密藏如有取贖之戶須俟第二日憑條往取並於每晚六鐘前卽行閉門停止取贖云是日中行券僅兌銅元九十二三枚交行券九十文喧傳黎總統自裁手鎗擊中腹部旋得友人信云不確現有日本青木中將爲之保護云

●七月三日卽五月十九日首聞黎總統業已出府先是張勳頻派人逼催總統退出公府黎氏初擬遷至東廠胡同第恐變生莫測又因駐京公使團會議於荷蘭使館決定勸告張勳勿加危害於黎氏然黎恐勸告之力甚微不如直接自往使館遂於十四日晚九時與蔣作賓康仲寅及秘書劉鍾秀等出福華門繞道至東交民巷日本使館入武隨員齊藤少將官舍當由劉秘書請見少將略述總統在公府恐有危險冒昧至此祈閣下原諒保護情形少將以事出意外不勝驚訝遂轉叩林使意向林使以爲事已如此未便拒絕應謀相當之保護惟聲明居住使館內絕對不允

其。作。政。治。上。之。活。動。業。將。日。本。兵。營。作。總。統。起。居。至。十。五。日。日。使。遂。將。此。保。護。事。實。發。表。黎。氏。於。未。出。公。府。以。前。已。有。通。電。密。發。并。派。討。論。會。某。議。員。攜。帶。秘。密。要。件。乘。津。浦。車。南。下。大。約。有。三。事。(一)免李經羲職。(二)復段祺瑞職。(三)遵照約法定繼任總統。(即推南京馮副座)其通電四種如下方。

●通電一

本日張巡閱使率兵入城實行復辟斷絕交通派梁鼎芬等來府游說元洪嚴詞拒絕誓不承認副總統等擁護共和當必有善後之策特聞元洪東

●通電二

天不悔禍復辟實行聞本日清室上諭有元洪奏請歸政等語不勝駭異吾國由專制爲共和實出五族人民之公意元洪受國民付託之重自當始終民國不知其他特此奉聞藉免誤會元洪東二

●致南京馮副總統並通電



南京馮副總統鑒此次政變猝生致搖國體元洪不德統御無方負疚國民飲痛何極都中情形日趨險惡元洪既不能執行職權民國勢將中斷我公同受國民重託應請依照約法第四十二條暨大總統選舉法第五條暫在軍府代行大總統職務目前交通梗絕印綬齎送深虞艱阻現已任命段芝泉爲國務總理並令暫行攝護設法轉呈此後一切救國大計務請我公與芝泉協力進行事機危迫我公義無旁貸臨電翹企不盡區區元洪冬（通電文意同本電）

### 報告出府通電

南京馮副總統各省督軍省長南甯陸巡閱使瓊州龍督辦各都統各護軍使各鎮守使鑒東日兩電冬日一電計達此次政變猝生致搖國體元洪負疚民國哀痛何窮已於本月冬日特任段芝泉總理國事並電請馮副總統依法代行職權在副總統未經正式代理以前一切機宜統由段總理便宜處理所有印信文件業經送津請段總理暫行攝護並設法轉送副座呈請接收再頃者公府衛隊猝被撤換催交

三海元洪亦卽移居醫院此後一切救國大計務請諸君商承馮副總統段總理合力進行臨電翹企不盡區區元洪江（聞此電係出府前一頃臨時發出故移居醫院一節與事實略有不符）

是日喧傳各省督軍反對消息而尤以前總理段氏之反對爲最烈且卽日出兵北攻大有劍及屣乃之勢十四日卽匆匆南行人皆擬其往山東與張督軍按洽實則近赴馬廠與李長泰師長等籌決立發討逆軍蓋恐緩不濟急也都人士皆異口同聲知段張必有一番血戰矣又海軍電云現在長江一帶之海軍對於復辟舉一律表明反對將與段前總理取同一態度云而江蘇馮督軍電則略謂現值議論紛歧之際毅然斷行復辟召國家之分裂誠非收拾時局之道倪省長電則云復辟事關係甚爲重大非與各督軍省長等詳細研究不敢表示贊同云云奉天張督軍電直斥以混蛋二字直隸曹督軍已預備舉兵來攻聞業與段氏按洽妥籌動員事宜駐馬廠李師長及駐北苑葉師長態度至爲堅決誓必掃除徐州軍以鞏固共和又

十六旅揚旅長亦與李師長取一致行動專俟段氏指揮卽日出發云居氏聞此警  
耗皇皇奔走相告知旦夕卽有戰事而辦兵驕橫自喜厲兵秣馬以待惟兵數寡弱  
日盼徐州之接濟不知江蘇安徽山東三省反對已力阻徐州兵北上後援已絕識  
者早知辦帥已瀕絕地所患者困獸猶鬪耳據清室要人云復辟一舉張康等已籌  
商多日業與內蒙重要人物籌商後援等大計惟事機不密已爲段芝泉所知有電  
來勸阻張氏乃有不做不休之意遂提前舉行故倉猝已甚作此種驚人之舉若輩  
亦料有多數反對成敗利鈍未敢預斷倘能統一全國自望初衷貫徹萬一各省反  
對不能保持現狀張氏必背城借一與反對軍相周旋至萬不得已時惟有效趙子  
龍之大戰長坂坡保幼主皇后取道京張路直走內蒙再圖恢復而已又一說復辟  
倘召衆怒不能據守燕京則清皇室擬逃熱河云然則張氏等於退路一節亦早籌  
之熟矣又上海一帶得復辟警信民心反對非常激昂若代表輿論之新聞申時中  
華民國等報均極力反對論鋒甚銳惟康聖人之機關報名國是者獨好惡異衆殊

屬。可。恥。旋。聞。山。東。張。督。軍。對。於。復。辟。表。示。反。對。特。派。朱。參。謀。長。赴。津。謁。段。氏。段。答。以。先。取。徐。州。昨。已。有。張。軍。與。定。武。軍。衝。突。消。息。並。云。扼。其。北。上。津。浦。路。中。斷。云。又。聞。實。行。復。辟。之。先。張。辦。帥。電。致。陸。巡。閱。使。求。其。同。意。惟。不。俟。復。電。卽。立。決。大。計。上。諭。中。以。陸。爲。勸。進。之。一。人。乃。係。捏。名。陸。見。之。必。滋。憤。激。矣。升。允。得。授。大。學。士。甚。爲。得。意。外。部。尙。書。梁。民。部。尙。書。吳。業。已。就。職。餘。尙。未。到。聞。有。數。人。決。計。不。就。云。聞。此。次。張。辦。帥。頗。恃。德。國。人。助。力。云。又。傳。黎。總。統。出。府。後。張。辦。帥。聞。之。遂。傳。令。城。內。戒。備。之。軍。警。無。論。誰。乘。之。汽。車。皆。須。令。少。停。機。以。俟。搜。閱。於。是。辦。子。兵。得。令。大。肆。威。風。凡。見。汽。車。駛。過。卽。橫。槍。喝。令。停。機。其。後。并。及。馬。車。最。可。笑。者。詢。車。上。人。是。否。黎。元。洪。蓋。該。兵。等。尙。不。識。黎。氏。之。面。貌。也。逢。車。攔。問。乘。車。者。不。免。飽。受。虛。驚。胡。鬧。一。場。至。傍。晚。始。止。云。是。日。段。氏。有。反。對。電。文。及。討。逆。軍。總。司。令。布。告。文。傳。至。京。師。人。皆。知。戰。事。開。始。卽。在。眉。睫。間。云。茲。錄。其。文。如。下。

◎段前總理反對復辟電文

南京副總統武鳴陸巡閱使各省區督軍省長都統瓊州龍督辦上海盧軍使甯夏馬護軍使導河馬提督庫倫辦事大員各師長旅長各省商會報館鑒天禍中國變亂相尋張勳懷抱野心假調停時局爲名阻兵京國至昨夜遂有推翻國體之奇變竊惟國體者國之所以與立也定之匪易既定後而屢圖變置其害之中於國家實不可勝言况以今日民智日開民氣日昌之世而欲以一姓威嚴馴伏億兆尤爲事理所萬不能致民國肇建前清明察世界大勢推誠遜讓民懷舊德優待條件勒爲成憲使永避政治上之怨府而長保名義上之尊榮宗廟享之子孫保之歷觀有史以來廿餘姓帝王之結局其安善未有能逮前清者也今張勳等以個人權位慾望之私悍然犯大不韙以倡此逆謀思欲效法莽卓挾幼君以制天下竟據黎元洪奏稱改建共和諸多弊害懇復御大統以拯生靈等語擅發僞諭橫逆至此中外震驚若曰爲國家耶夫安有君主專制之政而尙能生存於今之世者其必釀成四海鼎沸蓋可斷言而各友邦之承認民國於今五年今覆雨翻雲我國人雖不惜以國爲

戲在友邦則豈能與吾同戲者內部紛爭之結局勢非召外人干涉不止國運眞從茲斬矣若曰爲清室耶清帝冲齡高拱絕無利天下之心其保傅大臣方日以居高履危爲大戒今茲之舉出於偪脅天下共聞歷考史乘自古安有不亡之朝代前清得以優待終古旣爲曠古所無豈可更置諸巖墻使其爲再度之傾覆以至於盡祺瑞罷斥以來本不敢復與聞國事惟念辛亥締造伊始祺瑞不敏實從領軍諸君子後共促其成旣已久服勞於民國不能坐視民國之顛覆分裂而不一援且亦曾受恩於前朝更不忍聽前朝爲匪人所利用以陷於自滅情義所在守死不渝諸公皆國之干城各膺重寄際茲奇變義憤當同爲國家計自必矢有死無貳之誠爲清室計當久明愛人以德之義伏望戮力同心戡茲大難祺瑞雖衰朽亦當執鞭以從其後也敢布腹心伏維鑒察段祺瑞叩

④ 討逆軍總司令之佈告文

討逆軍總司令段祺瑞謹痛哭流涕申大義於天下曰嗚呼天降鞠凶國生奇變逆

賊張勳以凶狡之資乘時盜柄竟有本月一日之事顛覆國命震擾京師天宇晦霾  
神人同憤該逆出身竈養行穢性頑便佞希榮漸躋顯位自入民國阻兵要津顯抗  
國定之服章婪索法外之餉精軍餓凶橫行旅裹足誅求無藝私橐充盈凡茲稔惡  
天下共聞值時多艱久稽顯戮比以世變洊迫政局小紛陽託調停之名陰爲篡竊  
之備要挾總統明令敦召遂率其醜類直犯京師目其啓行伊始及駐京以來屢次  
馳電宣言猶以擁護共和爲口實逮國會既散各軍既退忽背信誓橫造逆謀據其  
所發表文件一切託以上諭一若出自幼主之本懷再三臚舉奏摺一若由於羣情  
之擁戴夷考其實悉屬**謬言**當是日夜十二時該逆張勳忽集其凶黨勒召都中軍  
警長官三十餘人列戟會議勳叱咤命令迫衆雷同旋即挈康有爲闖入宮禁強爲  
擁戴世中堂續叩頭力爭血流滅鼻瑾瑜兩太妃痛哭求免幾不欲生清帝子身冲  
齡豈能禦此強暴竟遭誣脅實可哀憐該僞諭中橫捏我黎大總統馮副總統及陸  
巡閱使之奏詞尤爲可駭我大總統手創共和誓與終始兩日以來雖在樊籠猶疊

以電話手書密達祺瑞謂雖見幽決不從逆責以速圖光復勿庸顧忌我副總統一見僞諭卽賜駟電謂被誣捏有死不承由此例推則陸巡閱使聯奏之虛構亦不煩言而決所謂奏摺所謂上諭皆張勳及其凶黨數人密室篝燈構此空中樓閣而公然騰諸官書欺罔天下自昔神奸巨盜勸進之表九錫之文其優孟兒戲未有若今日之甚者也該逆動以不忘故主謬於忠愛夫我輩今固服勞民國強半皆曾仕先朝故主之戀誰則讓人然正惟懷感恩圖報之誠益守愛人以德之訓昔人有言長星勸爾一杯酒世豈有萬年天子哉曠觀史乘迭興迭仆者幾何代幾何姓矣帝王之家豈有一焉能得好結局前清代有令辟遺愛在民天厚其報使繼之者不復家天下而公天下因得優待條件勒諸憲章帶山礪河永永無極吾輩非臣事他姓絕無失節之嫌前清能永享殊榮卽食舊臣之報仁至義盡中外共欽今謂必復辟而始爲忠耶張勳食民國之祿於茲六年必今始忠則前日之不忠孰甚昔既不忠於先朝今復不忠於民國劉牢之一人三反狗彘將不食矣謂必復辟而始爲愛耶凡



愛人者必不忍陷人於危以非我族類之嫌丁一姓不再興之運處羣治之世而以一  
人爲衆矢之的危孰甚焉張勳雖有天魔之力豈能翻歷史成案建設萬劫不亡  
之朝代既早晚必出於再亡及其再亡欲求復有今日之條件則安可得豈惟不得  
恐幼主不保首領而清室子孫且無噍類矣清室果何負於張勳而必欲藉手殄絕  
之而始爲快豈惟民國之公敵亦清室之大罪人也張勳僞諭又藉口於民國不能  
施善政謂必建帝號乃可爲國家久安長治之計張勳何人乃敢妄談政治使帝制  
而可以得良政治則辛亥之役何以生焉博觀萬國歷史變遷之跡由帝制變共和  
而獲治安者旣見之矣由共和返帝制而獲治安者未之前聞法蘭西三復之而三  
革之卒至一千八百七十一年確立共和國乃大定而旣擾攘八十年國之元氣消  
耗盡矣國體者譬猶樹之有根也植樹而屢搖其根小則萎黃大則枯死故凡破壞  
國體者皆召亂取亡之道也防亂不給救亡不贍而曰吾將藉此以改良政治將誰  
欺欺天乎復辟之遺害於清室也如彼不利於國家也如此內之不特非清帝自慟

而嬖妃者傳且不勝其疾首痛心外之不特非羣公勸進而比戶編氓各不相謀而瞋目切齒逆賊張勳果何所爲何所恃而出此彼見其辮子軍橫行徐克亦既數年國人優容而隱忍之自謂人莫敢誰何遂乃忽起野心挾天子以令諸侯因以次剗除異己廣布腹心爪牙於各省掃蕩全國有教育有紀律之軍隊而使之受支配於彼之土匪軍之下然後設文綱以阡賢士箝天下之口清帝方今玩於彼股掌之上及其時則取而代之耳罪浮於董卓而凶甚於朱温此而不討則中國其爲無男子矣祺瑞罷政旬月幸獲息肩本思稍事潛修不復與聞時政忽遭此變羣情鼎沸副總統及各督軍省長馳電督責相屬於道愛國之士夫望治之商民好義之軍侶環集責備義正詞嚴祺瑞撫躬循省繞室徬徨旣久奉職於民國不能視民國之覆亡且曾筮仕於先朝亦當救先朝之狼狽謹於昨夜分視師馬廠今晨開軍官會議六師之衆僉然同聲誓與共和並命不共逆賊戴天爲謀行師指臂之便謬推祺瑞爲討逆軍總司令義之所在不敢或辭部署略完尅日入衛查該逆張勳此次倡逆

既類瘋狂又同兒戲彼昌言事前與各省各軍均已接洽試問我同胞僚友果有曾預逆謀者乎彼又言已得外交團同意而使館中人見其中風狂走之態度來相詰言財政則國庫無一錢之蓄而蠻兵獨優其餉且給現銀言軍紀則辮子橫行都門而國軍與之雜居日蒙凌轢數其閣僚則老朽頑舊幾榻煙霞問其謀主則巧語花言一羣鸚鵡似此而謂能濟大事天下古今實有是理卽徵義師亦當自斃所不忍者則京國之民倒懸待解所可懼者則友邦疑駭將起責言祺瑞用是劍及屨及率先勇進以爲國民去此蝥賊區區愚忠當蒙共諒該逆發難本乘國民之所猝未及防都中軍警各界突然莫審所由來在勢力無從應付且當逆燄熏天之際爲保持市面秩序不能不投鼠忌器隱忍未討理亦宜然本軍伐罪弔民除逆賊張勳外一無所問凡我舊侶勿用以脅從自疑其有志切同仇宜詣本總司令部商受方略事定後酬庸之典國有成規若其有意附逆敢抗義旗典刑所懸亦難曲庇至於清室遜讓之德久而彌新今茲構衅禍由張逆冲帝旣未與聞師保尤明大義所有皇室

優待條件仍當永泐成憲世世不渝以著我國民念舊酬功全始全終之美祺瑞一俟大難戡定之後即當迅解兵柄復歸田里敬候政府重事建設迅集立法機關刷新政治現象則多難興邦國家其永利賴之謹此布告天下咸使聞知民國六年七月三日

清帝雖已復辟。尙未正式登極。朝賀。聞已飭內務府。通知附屬各供奉處。加緊預備。登極應用之法。駕以重禮。儀又各商肆。爭購龍旗。畫工利市三倍。而琉璃廠各南紙肆。代各部院機關印刷之公文稿件。用中華民國字樣者。國體忽然變更。一律俱不適。用大慮廢棄。損失莫不憂形於色。云。

七月四日。即五月十六日。清室頒上諭數道。聞皆出於萬胡之手。而康聖人爲之筆削。裁定者也。茲錄於下。

昨經明發諭旨。采用君主立憲政體。將以闡揚

先訓。效法列強。查立憲先進諸邦。首重憲法。而行政機關。而外咸有國會。以監督政

府方茲邦基再奠亟應制定憲法召集國會以立根本之大計而慰薄海之人心惟憲法應如何規定國會應如何組織仍當切實討論俾有良效而無流弊卽著各督撫推舉老成公正精通法理諳悉國情之員每省三人剋期來京將憲法國會諸大端慎籌妥議以期早日告成用副朕厲行憲政之至意至應行籌備事宜著民政部速議具奏欽此

蒙古爲國屏蔽河山帶礪垂三百年自辛亥遜政以來中原雲擾統馭無方以致潰決頻仍兵爭未息眷懷舊主無路自通朕甚憫焉現在鼎祚重新與天下更始該王公等其各率爾舊服佐我皇圖用世世爲國家翼蔽之賴所有蒙古應行興革事宜著理藩部妥議具奏隨時敷設加意撫綏以慰其歸誠効順之意將此通諭知之欽此

邦家再造經緯萬端輔導助勳實資耆獻連日疊頒明諭凡屬

先朝舊臣海內德碩在朕所知均已先後簡任惟人材所出不拘一途或操行優長可爲矜式或治績純美夙著循良或文章爾雅堪爲廊廟之資或法律情深堪備典

章之選或發明新理學具專長或講求技術富有經驗乃至鄉里獨行山林隱逸倘有一節之長朕無不量材擢用著京外各大臣留心訪察隨時開列事實繕單具奏以備任使用副朕側席旁求之至意欽此

太傅銜太保大學士弼德院院長徐世昌著授爲太傅欽此

太傅大學士徐世昌碩德耆年公忠體國歎歷內外譽望攸隆朕以冲齡興復方始典學蒞政輔導需賢昨已降旨特簡爲弼德院院長該大學士忠愛夙著且與朕躬違離日久以朕眷注之切諒亦依戀至殷自必聞命立行剋期就道第念先朝勳舊允宜禮遇特殊茲略仿古人君安車蒲輪優禮耆賢之義著郵傳部迅備專車並派曹秉章馳赴天津前往迎迓務期即日來京朝夕納誨匡弼朕躬用副惓惓延跂之厚望欽此

聞徐東海反對復辟並不肯來京就職此等諭旨正如俗語所謂單相思云爾京外發見討逆軍總司令之布告如下。

一保護本國及各國僑人生命財產

一對於各國教堂及商民人等一律保護不得擾害之

一不得姦淫掠奪及無故騷擾民間

一不得造謠生事煽惑軍心

一不得宣漏軍事機密

向駐馬廠之陸軍第八師。昨由原營開拔。進抵北倉。茲據確實消息。該師開來之兵。係第三十團第二營將校以下五百名。帶機關槍兩架。於昨日下午一時。餘第三營將校以下四百名。及砲兵一百五十名。帶砲四尊。於下午三時。均抵北倉矣。其餘第十五旅之殘部。及駐小站之第十六旅。定於今日。可抵北倉云。

反對復辟之各督軍。決定與師討逆。近畿一帶各軍。自昨日開始行動。近將進攻京師。其餘魯皖甯各軍。決定攻取徐州。以覆巢窟。倪嗣冲已於前日抵甯。與馮河間籌畫一切。聞其方略大要如下。(一)馮國璋攻擊駐紮浦口之定武軍。(二)倪嗣冲攻

擊駐紮蚌埠之定武軍(三)兩軍到達攻擊目的後更合攻徐州(四)山東督軍張懷芝派軍南下與馮倪夾攻徐州如斯則徐州三面受敵其陷落可立待也

聞徐州定武軍連日有秘密北上者昨日在馬廠被捕者八名馮副座有電致段合肥略云復辟一舉危及國家少軒冒簽弟名捏奏誓不承認已準備討伐北方一帶賴兄主持 又見梁任公反對電文如左

南京馮副總統武鳴陸巡閱使各省督省軍長鎮守使師長旅長各報館鑒昊天不弔國生虺孽復辟逆謀竟實現於光天化日之下夫以民國之官吏臣民而公然叛國順逆所在無俟鞠訊但今既逆焰熏天鼙鼓牢籠恫脅之術無所不用其極妖氛所播羣聽或淆啓超不敢自荒言責謹就其利害成敗之數爲我國民痛陳之倡帝政者首藉口於共和政治成績之不良夫近年政治之不良何容爲諱然其造因多端尸咎者實在人而不在法苟非各界各派之人咸有覺悟洗心革面則雖歲更其國體而於政治之改良何與者若曰建帝號則政自肅則清季政象何若我國民應



未健忘今日蔽罪共和過去罪將焉蔽况前此承守成餘蔭雖委裘猶可苟安今則悍帥士狡挾天子以令諸侯謂此而可以善政則莽卓之朝應成郅治似斯持論毋乃欺天帝政論者又以現今之黨派軋轢爲口實夫黨爭之劇吾儕亦曷嘗不疾首痛心然須知旣以憲政號於國中則黨別實無可逃避容之則漸納於軌蹙之則反揚其波今之定策擁立者豈能舉全國青年才智之士而盡阬之阬之不盡黨固在也阬而盡又焉知來者之不如今也今之主動者以淺薄之憑藉而謬師操懿之故智處文明之世運而夢想雍乾之操術即以立憲之義意舉朝莫之能解使其政府幸而有一年數月之壽命則其政象吾敢爲預卜曰桓立朱溫時代之專制而已夫專制結果必產革命桓立朱溫甯有令終所難堪者則國家之元氣與人民之徵命也然使果能得一年數月之苟安則吾民或且姑爲容忍殊不知立國於今世非閉關所能自存苟不獲自屬於國際團體之林則國實不成爲國今我民國各友邦所承認也當思前此易帝而民此承認果幾經艱辛而始得之者今易民而帝其得承

認也艱辛將益倍於前當此國交中斷之期間國將推與立於大地者且此次首造逆謀之人非貪黷無厭之武夫卽大言不慙之書生於政局甘苦毫無所知他勿具論卽如中央政費每月七百餘萬向仰給於鹽課餘款及各省解款不足則借債以補之試問現在北京之滑稽內閣對於此三項收入有何把握頗聞此次之惡作劇有某國牽線於幕內許出其銀行存款供揮霍茲事信否誠不敢知藉曰信也爲數幾何一兩月涸可立待耳又彼董卓朱溫者在今日氣蓋一世志得意滿縱軍橫行輦轂餉糈視諸軍獨厚而必索現銀氣燄視諸軍獨高而動肆陵轢以有教育有紀律之軍隊與彼共處一城而謂可相安無事以歷旬月其誰信之是故就外交論就財政論就軍事論此滑稽政府皆絕無可以苟延性命之理雖舉國人士噤若寒蟬南北羣帥袖手壁上而彼之稔惡自斃吾敢決其不逾兩月最可痛者則天下萬國將謂我國無復一人能縮軍符膺疆寄者乃知犬馬凡能參養我而鞭箠我者卽懼伏而乞憐於其下則此恥其不可洗滌矣最可憂者迨董卓朱溫自斃之時小之喋

血都門大之流寇數省而羣帥中曾無一人有亂之戡力勢必重勞鄰封越俎而代則此國其真永劫不復矣啓超一介書生手無寸鐵舍口誅筆伐外何能爲役且明知樊籠之下言出禍隨徒以義之所在不能有所憚而安於緘默抑天下固多風骨之士又安見不有聞吾言而興者也抑啓超猶有欲贅陳者一年以來黨派主奴之見其譎譎變幻出人意料表啓超深痛極慟向兩方要人苦口忠告勸其各自覺悟勿馳極端以生反動在吾則旣竭吾才聲嘶力盡曾不蒙省察而急進派之策士惟日從事於挑撥搆煽引甲抵乙謂可以操縱利川以遂其排擠之私而結果乃造成今日之局今有董卓誰實何進今有朱溫誰實崔允啓超前此曲突徙薪之論適以供若曹含沙噴血之資亦旣痛憤積中誓將緘結終古今覩瀕覆之巢復吐在喉之鯁知我罪我固所不辭來軫往車願質明哲梁啓超東

復辟三日一般舊官僚指日彈冠相慶於是六年不見之翎頂又復大出風頭內城各翎頂鋪所存之舊物一日售罄連日加工趕製以應購者之需聞購此物者多係

定武軍之各級軍官云。

忌緯之朝務以酷刑監謗張氏既主張專制君主故大肆威福禁人談復辟之非犯者格殺勿論昨日上午十時許而單牌樓石虎胡同有某報館張貼順天時報中多議復辟之非（順天時報係外人主辦故辯兵無如何）忽一老者閱報舉憤罵主張復辟之人謂實遺害皇室殃我滿人等語不意旁有便衣軍人卽將老者扭去不知何往聞已送定武軍執法處鎗斃矣又警廳亦恐人藉端造謠嚴行查禁今晨有左一區巡警在該管境內查獲妄談國政者五名由署長研訊屬實遂立卽解往總廳查辦亂世之民言出不慎卽危生命人人喪其樂生之氣矣幕巢之燕自樂其樂一般歡喜復辟者皇皇於制度之改作於於午門城樓之中央圖書館由教育部籌備改建工作業已垂竣者上諭卽令停止開館并將一切工程罷廢準今日遷出以還滿清午門舊制尊重帝儀云又大清門自共和後其匾額久已撤換改爲中華門者復辟中人物謂國體既變名稱不可不符於是急急派工人多名將門匾再換大

清。今。午。過。其。下。者。見。各。工。正。支。搭。木。架。將。中。華。門。匾。立。換。大。清。門。金。碧。輝。耀。亦。短。期。帝。制。之。一。紀。念。品。也。又。內。務。府。承。上。諭。爲。登。極。籌。備。必。須。整。理。三。殿。而。所。謂。太。和。係。和。中。和。三。大。殿。之。遍。額。已。爲。袁。洪。憲。時。代。改。題。承。運。體。元。建。極。者。榮。多。舊。制。不。符。宜。修。復。以。崇。祖。訓。故。世。伯。軒。太。保。昨。已。傳。諭。天。和。木。廠。仍。修。復。舊。制。並。將。乾。清。門。外。長。牆。悉。行。毀。去。云。自。復。辟。實。行。後。辦。兵。之。驕。橫。日。甚。一。日。中。華。門。及。內。廷。各。處。禁。門。自。十。三。日。後。俱。有。辦。兵。把。守。崗。警。章。程。幾。同。廢。止。昨。晚。十。鐘。時。東。長。安。門。有。行。人。由。正。門。穿。過。辦。兵。正。與。巡。警。爲。難。崗。警。不。知。如。何。答。復。忤。辦。兵。之。意。辦。兵。卽。扭。打。崗。警。用。槍。把。毆。打。該。警。不。敢。抵。抗。遂。卽。避。至。天。安。門。訴。之。巡。官。巡。官。亦。謂。該。兵。強。暴。然。以。無。理。可。諭。反。向。該。辦。兵。道。歉。以。免。衝。突。云。又。日。來。京。師。謠。詠。紛。紜。凡。係。旅。京。之。外。省。人。士。率。皆。攜。帶。眷。屬。乘。車。出。京。聞。前。昨。兩。日。京。奉。京。漢。兩。路。車。站。票。房。竟。售。得。七。十。餘。萬。元。猶。有。因。擁。擠。未。獲。成。行。者。個。中。辦。事。人。言。自。有。火。軍。以。來。未。經。收。入。此。數。云。

五。日。卽。十。七。日。討。逆。軍。日。益。抗。進。戰。機。危。迫。定。武。軍。決。計。負。固。業。已。開。始。作。戰。以。兩。

軍。兵。力。言。之。段。軍。之。在。廊。房。者。有。第。十。六。混。成。旅。在。馬。廠。者。有。第。八。師。五。營。合。計。十。一。營。約。五。千。人。有。砲。三。十。二。尊。內。山。砲。二。十。八。尊。野。砲。四。尊。並。有。機。關。鎗。若。干。張。軍。則。有。定。武。軍。七。營。及。十。三。師。兵。約。千。五。百。名。合。計。四。千。名。砲。未。詳。惟。定。武。軍。有。山。砲。六。尊。十。三。師。有。山。砲。二。十。八。尊。野。砲。十。八。尊。五。珊。榴。彈。炮。一。尊。兩。軍。之。兵。力。頗。互。相。匹。敵。云。現。下。段。軍。之。行。動。駐。廊。房。之。第。十。六。混。成。旅。尙。未。審。其。動。靜。惟。由。馬。廠。北。來。之。步。兵。二。營。業。已。於。北。倉。下。車。自。是。漸。次。步。行。北。進。又。今。界。經。過。天。津。之。第。八。團。砲。兵。三。連。攜。帶。山。砲。八。尊。馬。二。百。四。十。匹。向。北。進。行。又。上。午。五。時。二。十。九。團。之。第。一。營。約。五。百。名。彈。藥。五。十。箱。至。上。午。七。時。該。團。之。第。二。營。約。五。百。名。均。已。向。北。進。行。至。午。前。九。時。已。抵。廊。房。云。而。張。軍。一。方。面。於。前。夜。有。百。七。十。名。馳。赴。廊。房。昨。日。上。午。復。有。四。輛。軍。隊。車。南。下。聞。該。車。係。搭。載。定。武。軍。步。砲。隊。二。營。及。十。三。師。約。千。五。百。餘。名。自。午。後。二。時。定。武。軍。馬。隊。二。百。餘。名。及。近。畿。第。二。旅。第。四。團。之。步。兵。一。營。攜。機。關。鎗。四。架。南。行。又。張。辨。帥。前。次。駐。紮。豐。台。之。四。營。亦。已。向。萬。家。莊。進。行。至。所。需。彈。藥。

與糧食等現正陸續輸送。又段總司令昨晨已由馬廠偕劉崇佑湯鄉銘返津。即在津門指揮全軍北進。總目下南北兩軍一在廊房一在萬莊已相對峙。然據文明之戰術而論兩軍僅距六英里對陣而講作戰之方略甚與原則相背。馳其後段軍果先覺悟即撤廊房兵而集中兵力於落垡方面。張軍則仍集中於萬莊川北之地。於是兩軍相距約八九十里。然後定作戰之方略。又西部曹錕軍所屬之步砲兩隊爲段軍聲援者已進至長辛店。其數尙未詳聞。先鋒一團已渡蘆溝橋。漸次北進。又張軍之第十三師第一旅之步兵砲兵數約一千以上。及定武之步兵二營現在財神廟及跑馬場兩處駐紮。如上所聞。南軍之本隊已至長辛店。北軍之本隊尙在北京。然兩軍之前衛相距甚近。想雙方斥候以砲火相見。實在意料中矣。頃又見有北洋軍界全體討逆公啓文發見。茲錄如下。

●北洋軍界全體討逆公啓

各省督軍省長都統師長旅長團長鎮守使上海各報館鑒民國不幸奇禍環生張

勳康有爲等竟敢以少數人權利之私見威迫幼帝改變國體致成復辟逆舉黎總統不肯署名遜位則僞造歸政奏疏以欺人耳目馮副總統陸巡閱使向未與清室通電則捏稱奏請復辟以污人名節迨至世續叩頭流血瑾妃痛哭阻止張康兩逆亦皆悍然不顧強迫行此與曹孟德欺人寡婦孤兒何以異乎查歷史唐中宗明英宗之復辟均係春秋富盛之年人臣推戴尚不失爲忠心至於利用少主挾以登極皆漢唐六朝五代之權臣梟雄輩遂篡奪陰謀實不利於孺子往史具在可殷鑒也况復辟關係國體國之治國存亡民之從違向背何等重大討論宜詳以項城之雄傑辛亥乙卯兩役尙須徵求各省同意方敢舉行張勳北上本與各省公同謀議今乃專擅獨行並未有一字電商卽挾天子以令諸侯是藐視各省督軍省長師旅團長如無物也將來權位愈尊勢力愈厚驕恣愈甚只須一紙詔書進退百僚孰敢相抗項城在前清之世擁有六師位居揆席廷旨朝頒彰德夕隱以濤洵等乳臭小兒之手段尙足以籌項城何况張勳等之強暴乎且若輩亦知前清猜疑政治不足服



人故於昨日僞詔中聲明有懷遵本朝祖制親貴不得干預政事一條不知專制君主威福自擅立法之事徒託空言試觀前清祖訓不使女主干政而孝欽何以臨朝不使宦官言事而李蓮英何以攬權不使親貴預政而弈匡濤洵振倫諸王貝勒何以把持國權老成如孝欽后壯年如攝政王尙違祖訓何況幼帝所謂懷遵云云實屬欺世之言今日僞詔載濤載洵已命爲禁衛軍總副司令死恢復燃已見一班將來天下稍定親貴羣出項城前轍又豈能免可斷然也所以個人而論張勳此次舉動險詐反復尤爲隱患其通電各省自稱維持元首又在京津宣言中外謂無復辟之意而轉瞬卽背前言電勸各督軍取銷獨立先行退兵而已部尙留闕下旣爲李經羲通電各省崇獎疏通而此次元電又詆其覲然就職旣迫使總統違法解散國會而此次元電又謂其墮聲譽而失威信爲天下詬病之資數日之間言不顧行賣友求榮自相矛盾居心之險反復莫測甯我負人無人負我交且難久而能與之共謀天下乎至康有爲乃一詐騙流氓前借保皇之名詛騙華僑數十百萬戊戌之事

鹵莽滅裂至使前清德宗困陷瀛台口談我教而身在美洲以妾爲妻竟在耶穌教堂行禮貌稱君憲而於乙卯西南之役自矜有功共和其頑鈍無恥誤人家國清帝張勳必皆爲其所賣以如此小人而謂能成大業未敢信也大抵奸雄巨猾器小易盈張勳本爲聲名惡劣之人自袁項城之縱容徐州會議之共相推戴彼遂妄自尊大以爲天下皆莫己若及此次政變北方督軍各電主持意見不一西南各省又不主用武力情見勢絀彼乃膽敢孤行以成此復辟之舉不知各省兵力勝彼十倍中央財政仰給各省各省果能一致進行同心反對卽非用兵不過半月彼亦屈服以其勢孤而無力以抗各省也護國保疆還我共和在此一舉望諸公堅持定見勿爲所惑興兵討賊共濟國難無任盼禱之至北洋軍界全體公啓

近日關於外交事件。大概情形可述如左。

各國並未承認復辟之清室政府。而外部尙書。覲顏直往使館。有所陳請。實亦貽羞國體之一也。

清室外務部尙書梁敦彥昨日午前九時特至日本公使館拜訪林公使大概謂段祺瑞等對於此次宣統復辟段現在馬廠翻叛旗對之不能不施防備故此後如依戰爭所生一切之損失政府不負責任特先將此旨通告林公使當答稱責任應歸何人負担本爲別一問題惟停止京津間之交通機關爲昔年條約所不許若有胆敢出而遮斷交通之行動者則當以兵力施保護交通機關之行動云云

昨晨張軍業將京津鐵道一部實行破壞列國公使探聞此種消息遂於昨日正午均集會於荷蘭公使館協議今後應執行之手段至午後一時半始行散會協議結果決定發嚴重之通告並以協商列國公使之名義對於北京官憲及天津民軍當局另發一警告書原文如下

兩軍應遵守千九百零一年之議定書關於北京與海濱間之交通保證不准施行何等破壞之行動否則協商各國公使認爲必要時應自當交通保證之任云云又聞安徽倪及奉天張有傾向辯帥之說有電陳述意見未知果係真相否

總之造端伊始時局艱危非仗兵力難資底定務乞迅籌勁旅用備非常一面密示機宜以質策應臨電禱盼不知所云嗣冲印

現擬派參謀趙錫福晉京面陳一切至關於帶兵入京之件卽請就近與予有骨肉誼之馮麟閣協商後通告結果予卽當贊成作霖印

又據確實消息馮河間及陸巡閱使之反對復辟態度已明

日前張勳首頒清室上諭內有馮國璋陸榮廷等列名呈請事之真僞一時未敢判斷旋接馮河間致段總司令電云捏名呈請國璋誓不敢承觀此則疑團可釋惟陸巡閱使態度尙難明晰日昨得某處消息張勳爲復辟事屢次密電陸使陸擱置不答張遂認爲陸已贊成故代爲簽名云云又據滬上函述謂陸氏反對復辟已催令粵督軍迅速出師擁護共和同討叛逆等語陸氏之近狀如是特誌之以告國人五日早一時張勳忽下緊急軍令令護衛公府之第十一師第二十一旅第四十三四十四兩團之軍隊全數交出槍械子彈實行解除武裝詎料該兵士不服張之約

東幾有譁變之勢幸經護衛司令出而調停軍心略定直至天發曉雙方條件始議定該兩團之兵士一律開向南苑駐紮武裝照常佩帶十時第四十四團開拔十二時第四十三團開拔故於昨日(五日)午十二時起公府守衛軍隊已換第十三師第二十五旅第五十一團擔任

●復辟五日來謠言紛起人心惑亂茲不論其謠言真耶非耶其中滑稽令人失笑特錄之以供一覽

(一)倫貝子被殺說 復辟實行前張勳原與其他復辟主謀者及清室親王等集會於某處密議實行復辟諸事當時倫貝子反對最力故復辟宣布之翌日(二日)晚間張勳即派人暗殺之云云

(二)王士珍軟禁說 王士珍原來雖非反對復辟但以今非其時機故對於張勳之實行表面雖表贊成心中頗不以爲然時時暗中謀反對之策嗣爲張勳所探知於是大怒遂軟禁王士珍云云

(三)宣統帝蒙塵說 此次復辟本非宣統之所願特爲張勳一派逼迫不得已而出此其苦衷有可諒者乃外傳清廷覲段祺瑞之通電見勢不佳故宣統持乘飛艇向北蒙塵或云聞有飛艇響音云

(四)總統同青木避難說 前日張勳迫黎大總統移出公府黎公遂與參謀次長蔣作賓同乘汽車赴東交民巷日使署而外間則謂與青木中將同行避難全屬子虛

(五)卅蕭見殺說 張勳實行復辟之事清太保卅續反對是舉有所勸告相傳張勳不聽卅續遂自盡而死又公府衛隊司令蕭安國亦係反對復辟者聞爲張勳所殺大概均係風說云

(六)順天時報被圍說 昨日喧傳順天時報反對復辟種種造謠故張勳命其部下攻圍報館及電詢該報則答曰安全無恙人皆不信且曰今雖暫安張勳之部下必有此舉也該報言記者因事往訪張勳氏問以此事張云并無其事實爲外間一

謠言此事請安意勿惑記者曰予亦認爲謠言不信之張氏又曰雖係謠言關於國際之事不得輕視當派警保護以重邦交記者曰敝國已有駐紮軍保護本國人毋勞貴國之兵士張又曰此余之責任也遂相辭出

●昨日午後二時前門內中華門前有工人多名支搭木架正將門匾撤換大清門往來行人莫不停足以觀人叢中忽有某甲指天畫地大肆譏評謂撤換門匾事實屬不滿人意不料有某機關探兵二名以某甲造謠惑衆立即扭去或云鎗斃矣噫相怒以目之專制怪象不圖復見於今日異哉

今日中央公園仍售游覽券惟改由南府口內路東開關之新門出入然游人亦遠不如從前之盛矣且聞有辦兵軍官等在內行樂婦孺均相戒不敢往市井間謠詠益甚聞戰事在卽倘辦兵一敗必生搶掠慘劇因此人心惶惶富有之家皆將貴重物器移往東交民巷各洋行保險又聞端金大樓內之居人及保險財物於昨日亦搬入東交民巷內以免損失云

昨下午二時餘。東四牌樓十二條胡同老君堂地方。有辦兵十數名。荷槍入一官宅。內將該宅主人逮捕而去。聞係海軍部人員。不知因何事故。惟是日來辦兵捕人聲勢甚盛。各政客咸起恐慌焉。又前門外賈家胡同電報分局。內曾有朱清翰者。赴該局打成電報。該局駐守之辦兵見其可疑。直前盤詰。朱某知事不妙。遂急將電稿吞服入腹。該兵無奈。祇得捕押往本營研詢云。昨晨京奉路局忽然停止售票。而出京之旅客萬分擁擠。且咸佇立票房外不肯散去。嗣經路局宣告廊房至萬莊間鐵道損壞。不能通車。該旅客輩始各悻悻而返。婦女多有驚懼號哭者。且聞該路損壞之處。係被定武軍拆毀三段。以防北伐軍衝過之計。畫是日京漢車站亦未售票。惟至下午由保府開來車一次。市面搖動。金融界大起恐慌。紙幣直受打擊。中交兩銀行鈔券價值益復低落。前門外各大錢店如德成春華茂等。竟自停止交易。銅元票亦跌至八折。甚有拒而不用者。各戲園因營業蕭條。賠累不堪。昨晚遂一律停演。今日中行鈔券換銅元七十二三枚。交券僅六十枚。市面已呈出一種危險之象。莠



民躍躍欲動矣。

六月卽十八日聞段總理已於天津組設國務院辦公處而督促共和軍（卽討逆軍）進攻北京計畫已定前日開到廊房之共和軍前隊昨晚開始前進昨曉四時左右進抵萬莊附近（距廊房北方六英里）與定武軍前隊衝突定武軍失利而退共和軍直行追擊其本隊亦由廊房陸續開拔其中若干乘三列車北進矣此役定武軍死傷者約一百名被擒者十數名共和軍負傷者十數名云云共和軍卽由火車運到安定驛下車陸續前進司令爲段芝貴參謀爲曲同豐此卽東路司令部是也。

屬於張勳指揮之全體兵力有定武軍（步隊八營馬隊一營山砲六尊機關鎗七架）又第十三師之第二十五旅及近畿混成第一第二之二旅惟至昨日午后出動於萬莊方面之張勳軍有定武軍步隊二營及近畿混成第一旅而近畿混成旅尙未全部至該處但前駐永定門之定武軍三營業於前日午后向豐臺方面進發。

又昨日午前復增派原駐天壇之定武軍一營機關槍一架前往萬莊近畿混成第一旅第三團第一營（計爲五百四十七名）定武軍之山礮一尊等均已向豐臺進發云。

張勳軍自前日午前因偵悉廊房方面之敵狀卽令一部軍隊下車於萬莊探知前敵陳礮於廊房郊外以備來襲乃派出斥候隊監視敵軍之動靜至昨日午前四時敵之前衛漸次肉迫前面開始攻擊乃不能不應戰祇以衆寡不敵遂退却於北方前衛之衝突既經如斯然實際上張勳軍之防禦本隊原在豐臺附近其在萬莊安定方面者不過一部分偵察隊而已又聞張勳不聽萬參謀長等之諫止擬自行出馬指揮全軍對於警護各隊亦於昨日午后六時下令準備出動惟昨夜十時以前尙未出動也。

共和軍之兵力前日午后止出動於廊房方面者有第八師中之步隊第二十九團第三十團（但缺第一營）馬隊百四十名野礮四尊山礮十二尊機關鎗七架及混

成第十六旅之步馬礮全部至昨日午前山東軍一營（果爲山東軍甚屬疑問或云係第八師軍隊）并以汽車增派第三十團之一營該隊至昨日正午已與廊房之本隊會師云

共和軍之東路司令官段芝貴偕張紹曾及某中將於前日午后五時由天津乘火車北行夜半抵廊房遂統轄全軍當時共和軍已令斥候隊進行萬莊方面從事偵察嗣偵知定武軍之前衛主力約在萬莊南方四里之地點遂利用拂曉下令攻擊故共和軍之一部隊同時即開始活動竊行肉迫前敵午前四時半開戰至五時頃敵之前衛遂退却於萬莊方面探聞此次戰鬪兩軍俱有死傷共和軍之前衛見張勳軍退却更迫擊敵軍壓迫至萬莊村落段司令接此捷報旋令本隊出動先以一部分乘三車以與前衛繼續追迫至豐台方面云

近畿一帶戰雲瀰滿京師風聲鶴唳人情洶洶若一日秩序紊亂危及外僑生命財產亦未可知據聞日公使日昨特招京師警察總監吳炳湘步軍統領江朝宗兩氏

詢問能否維持京師治安。若有不逮之虞，應由外交團設法以圖保安。吳、江兩氏答稱：京師治安由中國政府力任維持，勿庸過慮等語。

日前黎氏已密命段祺瑞總理國務，並請馮副總統代理大總統職權，以維共和。段氏即日由津密赴馬廠，籌畫恢復之舉。組織討逆軍，已告成立。昨日晚帶同丁世源、李長泰、梁啓超、湯化龍、鮑貴卿等三十餘名及衛隊一百五十名，由馬廠回津。當時楊以德、張國淦、段永彬等在站迎迓，警察樂隊亦在站奏樂以表歡迎。段氏即入省長公署，翌早揭一門牌，書討逆軍總司令處字樣。至下午又改爲國務院辦公處。門首懸揭五色國旗，以誌慶祝。

清廷特派專使曹秉章赴津迎迓。徐東海、徐亦不以張勳此舉爲然，堅意不肯出山。爰倩曹代上奏摺一道，並致張勳、陳寶琛等密信數件。曹某業於昨日來京，復命據某重要人云：徐致張函略謂：如張肯率定武軍全數退出京師，三四十里渠可應命。來京否則決意不離津門一步。蓋不如是，徐以爲無向共和軍方面進言之餘地也。

直隸督軍曹錕已調動部下進抵蘆溝橋附近與跑馬場之定武軍對峙而尙未接仗外或對於曹錕態度頗滋疑竇茲據確實消息由曹錕朱家寶名義於五日遍貼告示於保定城內大要謂南京逃臣爲謀竊國柄挾持宣統實行復辟誠民國之蠱賊也今各省推國務總理段祺瑞爲總司令段芝貴爲東路司令錕爲西路司令本督軍素持改良政治之希望對於復辟之舉絕對反對至皇室優待條件仍宜承認云云蘆溝橋以南地方民家一律撤下黃龍旗曹軍自昨日開始活動想該方面亦將見兩軍衝突濟政府調遣該方面之第十一師所屬之一旅現有倒戈相向態度駐保第二十師現已開到南崗窪與第三師聯合然則兩軍衆寡懸絕勝敗之數可不待龜卜而知

自復辟以來至今日止聞外省反對確已發表者已有直隸山東山西陝西兩湖江西雲貴江蘇浙江兩廣奉天等蓋可謂之全國一致矣

是日下午五時鐘忽起風鶴全市大震蓋因在永定門駐守之定武軍忽將城門關

閉斯時。天橋一帶遊人尙多。聞此消息。莫不驚慌失色。意係共和軍逼臨城下。於是羣相奔跑。婦女小孩。哭喊聲各種。車輛疾馳。聲亂成一陣。前門大街鋪戶亦匆匆閉門。更可笑者。各鋪戶門前。翻飛之黃色龍旗。轉瞬間竟寂然不見。甚有扯碎棄於當途者。大柵欄各戲園之觀劇者。聞此信息。亦一哄而散。幸賴巡警極力維持。有三十分鐘間。秩序始定。當時巡警游緝兵及商團等。皆嚴備武裝。以防匪徒乘隙搶掠。提署江統領聞信。卽乘汽車至永定門。查視當時城外尙有遊人甚衆。不能進城。幸經江統領查視尙無闕城之必要。遂令開城。將人放入。斯時已七點餘鐘矣。前門外各警區之商舖受此一驚。卽不敢開門營業。人民等亦皆閉門不出。因之街市上除有多數軍警林立。外行人已極稀少。當時使館界美兵營亦在牆上安置機關槍。派兵施行戒嚴。而警察廳派衛使館界之保安隊亦異常戒備。

聞忽然發現此種亂象之原因。該兵在城外倉捕大車甚急。車奔兵追。人民驚慌。遂擁入城內。定武軍未察其故。急急將城門關閉。致有此閔。當紛亂之時。大街行人皆

往各巷口內奔避而各戲園內之聽戲人又往大街亂跑警軍傷人丟鞋失帽者不計其數如勸業場第一樓青雲閣等處之珠玉攤古玩攤以及其他各攤因匆忙荒亂之際損毀貨物頗多當時勸業場前門電綫恰忽折斷一綫幸該綫係一縱綫落在橫綫上故未傷及一人云。

本日早六時張勳特下緊急軍令令定武軍輜重營架設軍用電由南河沿至天壇由天壇至彰儀門直達蘆溝橋以備與第三師作戰時消息靈通於十二時已完全架設完畢並聞辮子兵開往蘆溝橋預備抵抗第三師者僅有一千名。

又京師警察廳吳總監因近畿反對復辟之軍隊雲集政府雖派重兵出京防堵並在京城各要地加派軍隊警察鎮懾惟以京師五方雜處良莠不齊難免不法之徒暗中惑鼓圖謀不軌除擬會同京兆尹步軍統領出示嚴禁外昨又通告各區業於地方警備即應注意勿得稍懈聞各區隊員亦已日夜梭巡分班輪值頗爲忙碌是日上午忽有飛艇一架高翔空中在京師方面飛行一匝始往南飛去聞本日亦

有飛艇五架向京師方面飛行據探聞此飛機係助共和軍之作用於早十時半鐘翔至宮城上迴翔一匝投擲炸彈二枚其一墜於乾清門外轟然爆裂炸斃一人及一狗其一墜於中正殿上爆裂嗣經探得詳細情形該飛機在皇宮內投擲炸彈凡三枚一彈落在乾清門外爆裂時炸傷侍衛一員並將伊克坦之轎夫一名炸傷旁有一狗亦被炸斃一彈落在御花園內炸傷太監一人一彈落在養心殿前之金缸內該彈因被水浸故未爆炸斯時張勳等皆在三所內議事並聞清帝已受驚成疾瑜瑾諸太妃等昨日俱未進膳云

是日聞清宮內之消息種種朱家寶授爲民政部尙書後已與清政府賀電表示承認忽昨日又給京中某友人一電略謂現與段合肥取一致之行動決不來京就職朱氏改換方針至此明矣

第十二十三兩師軍隊因張勳蠻橫過甚忽生反對復辟之心

王士珍鑒於時勢如此人心不死對於清帝復辟均抱消極主義擬日內赴津不問



清。家。政。事。

世。伯。軒。氏。自。宣。統。復。辟。後。卽。藉。口。因。病。請。假。至。五。日。尙。未。進。宮。其。贊。成。與。反。對。當。可。證。明。而。外。間。喧。傳。世。太。傅。逐。日。進。宮。辦。事。及。參。預。御。前。會。議。均。無。其。事。

是。日。僅。有。京。漢。路。於。上。午。五。時。開。來。火。車。一。次。而。北。京。開。往。保。府。之。火。車。行。至。京。西。蘆。溝。橋。地。方。卽。被。軍。隊。迫。回。

又。本。日。上。午。中。行。鈔。票。合。六。七。折。交。通。鈔。票。合。六。二。折。及。至。下。午。五。時。秩。序。闐。亂。後。各。商。店。對。於。中。交。鈔。票。卽。拒。而。不。用。矣。

警。察。總。監。吳。炳。湘。聞。此。警。耗。恐。有。地。痞。土。匪。等。乘。機。搶。掠。商。店。情。事。立。將。馬。巡。隊。保。安。隊。悉。行。調。出。派。在。各。處。彈。壓。鎮。攝。商。家。雖。稍。安。慰。然。於。定。武。軍。之。失。利。更。慮。其。敗。退。時。肆。行。搶。燒。莫。不。憂。形。於。色。

農。度。兩。部。近。聞。農。商。部。文。羣。自。聞。復。辟。事。起。已。匆。促。赴。津。南。下。清。室。新。任。農。工。商。尚。書。李。振。鐸。託。故。赴。津。未。回。錢。趙。兩。侍。郎。頗。存。觀。望。之。意。該。部。司。員。因。主。持。無。人。月。

薪無望亦無到部者以致門前冷落只有門役巡警守門度支部尙侍均於四日赴部接印具摺謝恩聞張鎮芳下堂諭一道前述上諭仰各員照舊供職並諭所有文書程式自即日起改用奏事體裁並奏請鑄頒度支部新印該部散值仍至午後四時云

自復辟以來滿人之有世界知識者無不私憂竊歎甚或慷慨憤激痛罵辯帥茲有旗民泣告同胞書可見其中心理之一班矣

溯自辛亥變起。先皇后不忍以元元淪亡於水火之中。推讓政權。先皇后之德義。彌高彌重。永昭千秋。而民國之待我皇室。待我旗族。六年來始終如一。恩高而義重。旗族小民。每念及此。未嘗不感激涕零也。詎蒼天太忍。變生不測。生一。張勳害我旗族。時倡復辟。人所切齒。卽吾旗族小民。有時聞之。亦掩耳疾走。個中情形。非吾旗族小民。毫無心肝。實不願得自絕之路。貽後世之唾罵也。嗚呼。逆賊張勳。野心不死。再倡逆舉。死我旗族。竟於五月十三日。脅迫我宣統帝登位。竊思張勳一漢人也。豈真願

我旗族入主中華哉。豈真願爲我旗族作萬世奴才哉。張勳之心。無非欲篡大位。窺竊神器。無隙可乘。不得已始迫我宣統帝登極。蓋窺我宣統帝年幼質弱。乘斯可潛盜國柄。效王莽之故智。請看先祖入關時。吳三桂初降我旗族。一旦無事。遂擁兵自衛。僭自稱王。謀反藩南。設吳三桂真心歸清者。胡欲謀反乎。張勳之心。固與吳三桂無異。以我旗族時勢。論此時景象。與先祖時之景象。迥不相同。緣先祖初入關時。銳氣尙充。故吳三桂雖謀反於南。遠數千里。平之易易。今則吾旗族旣無勢。又無兵。而張勳則朝夕旁宣統帝側。一旦有異變。則我宣統帝危矣。由此以觀。張勳之脅宣統帝正位。豈我旗族之好事哉。雖然。我宣統帝尙在冲齡。於國政毫無見解。醇王則惟利是圖。不顧生死。且眼光如豆。不能見遠。至瑾妃瑜妃。一女流之輩。雖胸有成竹。奈張勳之逼迫。何。世中堂固深明大義者。惜非張勳敵。至一部份之旗族。被張勳所愚。謂張勳此舉深明大義。故見此事。發現莫不歌功頌德。嗚呼。我皇室如此。苦衷我旗族如此。景况豈外人所得而知哉。今聞段總理已至馬廠。組織討逆軍。觀其宣言。深

知我皇室我旗族之苦衷之景况。蓋國是大定後。優待我皇室。處遇我旗族。猶如昔日。不能有絲毫差也。一言既出。駟馬難追。段總理既爲此說。他日必有以善其後。我旗族可勿深慮。况民國以信爲重。屆時又烏肯食前言哉。同人等商酌再四。知時機已至。故謹披肝瀝胆。特作此書。告我旗族同胞。曰我旗族有志者。互相聯絡。一方面請宣統帝收回成命。仍以國柄歸諸漢室。使孝定景先后安於地下。庶宣統帝既可不違。先后遺命又能保全。生命且可保。民國之優待一方面。奮力捉獲張勳。置諸國法。以謝天下。效忠我宣統帝。或將張勳謀斃。我旗族之血性男兒。雖犧牲少數之生命。究能保宣統帝萬世之安全。活旗族數十萬之生命。一舉數得。莫此之若。循此而行。對民國更可稍贖前愆。尤可鞏固段總理宣言之心。至康有爲名雖保皇。究屬迂腐。此次助紂爲虐。與張勳共倡逆舉。在漢族固視爲無用之人物。然而害吾旗族其罪難赦。吾旗族同胞亦應將其處死。以消此恨。嗚呼。吾旗族同胞時機至矣。萬不可失時乎。時乎不再來。吾旗族同胞萬勿等閑視此書也。

八旗公民泣血敬書

聞梁卓如有電話責康聖人。略謂不應主張復辟。致將曩日英名付之東流。一旦北伐軍直搗京師。爲國家計。爲箇人計。均不得良好結果。力請即日勇退。尙不爲晚。否則生命不保等語。康已墮入魔障中。非特不悟。且宣言與任公斷絕關係矣。據確實調查。自七月一日發表復辟以來。迄於今日。受清室政府密令。由中國銀行提交財政部。供中央臨時之用。費已有五百萬元之譜云。

天津電線電話不通。自共和軍與定武軍在廊房交戰。後電話已不通。至今早由京至津之電報亦不通。故京津消息異常不便。

本日午後七鐘。東華門一帶戒嚴。並於城樓上架有大砲。附近居民觀此情狀。異常惶恐。紛紛向他處避難者甚夥。

北京郵務局。因京奉鐵路被毀。交通梗阻。所有貨物信件。已不能轉運。故於日昨已飭各郵務支局。凡有由該路郵寄之信函物件。現已暫行停收。以免積壓。

清帝復辟後。國體已定。凡不適用於帝制者。悉應更改。故此廊房頭條畫舖。以及大

柵欄等處之。洋廣貨舖售賣之燈籠畫片等項貨品上繪有五色國旗者各該舖皆已撤除俾免招惹是非。

近日電報局接發各種電報非常遲緩如某處所接之公電四日下午八時由南京發者六日上午八時始到初五日上午九時由奉天發者六日上午九時半始到四日下午六時由漢口發者六日上午九時始到而津京相距咫尺由津至京之公電亦需十二小時當此危迫之時交通機關如此延滯其遺誤要公殊非淺鮮當局者無暇注意俾免前弊殊難免外人之指摘也。

聞張辦帥惟恐京內各界人等有與外省暗通信息者故將各路車站電報電話等機關皆派定武軍監護檢查並聞京奉鐵路未被拆毀以前張氏曾令駐屯天津之定武軍將該處與北京通用之電話機實行把守。

又把守天安門等處之辦子兵因距行營甚遠凡有所需如飲食等類卽至該處警察交通隊派駐所內隨意取用該所長警雖不堪其擾惟畏伊等之強暴不敢禁阻。

惟有忍氣吞聲而已。

京奉鐵路北京車站售賣車票。係收中交兩行鈔票。乃於復辟後南省人士聯袂出京者甚夥。不料車站票房竟利用時機拒絕紙幣。改收現洋。甚至不找錢。零如有詰問者。售票人始勉強付其乘亂漁利。可見一斑。又因旅京之官商眷屬出京者。途爲之塞。車爲之滿。本日竟停止開行。一般男婦老幼。因出京情切。未悉原由。覩此情形。有人哭者。有嗟嘆者。鬻集一處。猶欲久候。不去行李。則已堆如山積云。

近日出京眷屬。多將一切什物。木器賤價出售。聞有木商李某者。竟以現洋三千餘元購得價值萬餘元之物云。

西什庫天主教堂林主教。因京津交通斷絕。人心惶惶。所有中法教民及非教民。紛紛入堂避難。以致堂中有人滿之患。特函商法國駐京康公使。於昨日午後派法兵二十名駐該堂。嚴加保護。

七日即十九日。確聞辦兵大敗。已由豐台退入永定門。茲將兩軍形勢詳述如下。

一由萬莊退走之定武軍分乘三列車。昨日下午至豐台暫時駐車。兵士中潛逃者不少。今早十時駐豐台之定武軍約五百名分乘火車到永定門。即逃入天壇。

二永定門現有定武軍一營備礮一尊據守城壁。

三共和軍昨晚在安定附近露營。今曉開拔通過黃村而北進。

四豐台今早有流彈落於車站附近。凡三次聞係由長辛店曹錕軍所放之彈。

上午十時該處南方聞礮聲。殷殷約二三十響始止。

五跑馬場附近之定武軍退至彰儀門。其中一部分逃入城內。一部分在門外駐守。

六近畿混成旅所屬之兵士紛紛逃至跑馬場。蓋係由豐台方面退走者。

七第二十五旅在跑馬場附近爲張勳軍左翼之豫備隊。該旅現已由駐所撤至八里莊。

八目前情形如以上所述。然則兩軍決戰之地點必係永定彰儀兩門一帶。如斯則演出一場市街戰。恐所難免。步軍統領能否阻止市街戰以防秩序紊亂實屬一疑。



難問題

上述爲本日午前情形。迨至下午。陡有變勢。十二師及十一師均表示內應。共和軍以當張軍之形勢。故豐台方面之張勳軍已陷腹背受敵之窮狀。張勳遂令駐紮豐臺方面之軍隊退至永定門。卽近畿混成旅亦同時受同一之命令。現定武軍全部已退至永定門。入先農壇。與天壇卽近畿混成旅亦由豐臺方面退至原駐地。又在跑馬場方面之定武軍接撤。退命令後卽於晨時全行入彰儀門。至午后復東行歸天壇。但十三師已往八里莊方面。

又張勳於前日晚間對於十二師陳師長蕭安國與曹錕前衛懇請休戰。且通告將各城門之守備責任交與步軍統領衙門。第十二師陳師長與江朝宗答稱如定武軍解城門之警備交與步軍統領軍隊卽不進軍以謀京師之治安。蕭軍及第三師軍亦均贊同陳師長之意。見江朝宗遂將此旨轉告張勳。故各城門之守備自十二時起已由步軍統領擔任。由十三師確實調查真否。後兩軍復入休戰狀態。豐臺方

面之段軍接休戰之報告後因維持京師之治安亦無異議誓與陳師長出同一之態度惟第三師中有一團復入跑馬場

本日兩軍休戰狀態既如上述至夜九時定武軍一部約千名內外復入城內大概係當保護張勳自身與皇城警備之任倘此後無特別之事變發生京師治安當可維持惟處分首魁問題至爲重要至清室退位本不成問題第處罰張勳一派罪狀時定武軍有無暴動尙不能確斷耳

張辯帥自接豐台方面敗報後知命運窮迫乃憤各反對者之賣己遂於昨日急發通電布告各省大欲嫁禍於人以圖倖免其用心甚狡然電文中雖無負荆待罪之辭而認過之意實已可推測而知今將電文錄左

萬急各省督撫各提督各鎮守使各軍師旅長各省紳商學界同鑒我國自辛亥以還因政體不良之故六年四變迭起戰爭海內困窮人民殄瘁推原禍始罔非共和階之厲也勳以悲天憫人之懷（此當係康聖人語）而作拯溺救焚之計度非君主

立憲政體。無以順人心而回末劫。欲行君主立憲政體。則非復子明辟。無以定民志而息紛爭。此心耿耿。天日爲昭。所幸氣求聲應。吾道不孤。凡我同袍。各省多與其謀。東海河間。尤深贊許。信使往返。俱有可徵。前者各省督軍聚議徐州。復經商及列諸計畫之一。嗣以事機牽阻。致有停頓。然根本主義。詎能變更。現以天人會合。倖告成功。民不輟耕。商不易市。龍旗飄漾。遍於都城。萬衆臚歡。咸歌復旦。使各省本其原議。多數贊同。何難再見太平。不意二三政客。因處地不同。遂生門戶之見。於是主張歧異。各趨極端。或故違本心。率以意氣相向。或反持私見。而以專擅見規。遽啓兵端。集於畿輔。人心惶恐。輦轂動搖。勳爲保持地方治安起見。自不能不發兵抵禦。戰爭既起。勝負難言。設竟以此擾及宮廷。禍延閭里。甚且牽惹交涉。喪失利權。則誤國之咎。當有任之者矣。惟念此次舉義之由。本以救國濟民爲志。決無絲毫權利之私。攙於其間。既遂初心。亟當奉身引退。况議政大臣之設。原以興復伊始。國會未成。內閣無從負責。若循常制。僅以委諸總理一人。未免近於專斷。不得已而取合議之制。事屬

權宜。勳以椎魯武人。濫膺斯選。辭而後任。方切慚惶。爰於本日請旨。以徐太傅輔政。組織完全。內閣召集國會議定憲法。以符實行立憲之旨。仔肩既卸。負責有人。當即面陳辭職。其在徐太傅未經蒞京以前。所有一切閣務。統交王聘老暫行經管。一俟諸事解決之後。卽行率隊回徐。但使邦基永定。漸躋富強。勳亦何求。若夫功罪。惟有聽諸公論而已。敢布腹心。謹謝天下。勳巧印。

張勳命運窮迫。因此通電各省。作希圖倖免之計。乃於今早晉宮見宣統。親呈辭表。並奏一切善後。請命王士珍妥作經營。旋即退嗣康有爲亦晉宮。所奏何事。不得探悉。或謂康報告舉國反對情形。奏明退位不得已之理由。擬草上諭。呈宣統鑒核。云張軍屢戰屢北。幾有不能支持之勢。此既確鑿事實。無可諱言。據政界可靠消息。本日張勳宅中。自早五時至午後二時。連開軍機密要會議。至五次之多。列席者除萬繩栳及張勳之親信人外。尚有吳炳湘。江朝宗。雷震春。梁敦彥。張鎮芳等九人。所議何件。因防範甚嚴。不易探知。僅聞張鎮芳擔任派人誘勸討逆軍左司令段芝貴。因

張與段有金蘭之誼。故也。旅雷張出京。竟爲共和軍捕虜。聞雷張均係巨燧。在羈囚中。猶相呼吸自如。卽司令念舊特別優待云云。

昨日討逆軍段總司令通告云。討逆軍總司令段爲通告事。復辟之禍。危及國基。逆賊張勳。雖陰謀甚久。此次發之太驟。爲我軍警同人所猝不及防。當時雖被脅從。其情實堪共諒。故追論禍首。實惟張勳一人。况該逆向以異形自詡。無教育無紀律。迫壓軍警。早爲同人所共憤。本日早間。我軍進攻萬莊。逆軍大潰。業已追過黃村。該逆勢已窮。感恐不免大掠而逃。務望我軍警同人盡力防範。保全地方。該逆張勳罪大惡極。勿令漏網。有能得逆賊張勳正身者。不問生死。均賞銀十萬元。以酬勞勳大功。在前。其各奮力圖之。特此通告。咸使聞知。

日來都中警報頻傳。人民萬分憂懼。遷徙者途爲之塞。中國銀行因此之故。已將一切貴重物品。送東交民巷某外國銀行代爲保存。該銀行在內外城附設之兌換所。因近日現款缺乏。不敷開兌。故於昨日起。已將兌現停止。凡領有兌換籌碼者。概皆

兌。以。銅。元。票。並。仍。以。十。元。爲。限。規。定。之。幣。價。每。元。兌。付。銅。元。票。十。三。吊。四。百。文。聞。昨。日。中。鈔。價。值。較。前。日。略。有。增。漲。云。

昨日上午飛來京師之飛機一架在京城內圍繞一週當由機上拋擲多數傳單聞警察保安隊曾拾得此項傳單係共和軍投與張大帥之檄文內有擬用炸彈毀其宅第因恐誤傷人民生命等語該隊不敢隱匿即將該檄文呈送警廳各機關因前日皇城炸彈之警耗俱各相顧失色聞已專使往航空學校接洽懇求勿再放飛機入城是張軍及復辟派之膽落可知也某記者有記一篇詳其事錄之即可知當日空軍隊之舉略矣。

●破天荒之空軍獨立始末記

▲航校人員之義憤

▲拋擲炸彈於皇城

▲擊退逆軍於豐台

霹靂一聲。清廷復辟。凡屬愛國男兒。無不奔走呼號。以圖恢復我燦爛之共和國。當斯時也。航空學校校長。見清廷僞諭頒來。卽髭裂髮指曰。中華民國。果從此而逝耶。然某在當盡吾一分子義務。以謀挽救。惟空軍威力不能單獨施行。必有他種軍隊爲之掩護。其根據地方可活動。故雖經全校人員之贊助。仍持鎮靜態度。復出死入生。聯絡附近各軍隊。迨至四日時。機成熟而討逆航空隊產出。與各討逆軍協同進行矣。茲者共和復活。張逆炤消。豈非七日凌空一擲之效力哉。甚矣飛將軍之威力也。當是時記者。卽蒙寵召。隨侍戎間。故對於空軍作戰。知之最詳。前以交通斷絕。未能逐日報告。今特將數日經過戰鬪情形。泚筆誌之。雖係明日黃花。想閱者對此破天荒之空中戰爭。記載亦所樂聞也。尤望將來對於航空事業之進行。三注意焉。

(一)七月五號。南苑各軍已與第三第八兩師接洽。妥協預行攻逆。航空隊總司令秦國鏞。卽於午後五時遣飛機一架。赴永定門豐台一帶偵察軍情。並威嚇逆軍。嗚嗚聲起。吾知逆軍聞之。當不寒而慄矣。

(二)六號早五點五分派飛機一架，至京城內拋發警告。六點五十分又派飛機一架，赴黃村蘆溝橋永定門等處偵察逆情。是時逆軍尙無何等特別動作。七時半復派飛機一架，往長辛店附近偵察逆情。畢即飛進西直門入皇城拋擲警告。(告文另見)作示威運動。期逆軍因畏而退，以免城內塗炭。八時安全而返。午後五時半又派飛機一架赴廊房通信，聯絡各軍。七時半達到任務而還。七時半更派飛機至廊房通信。雖經狂風驟雨，仍達到任務而回。我國航空之進步，不得謂之不速矣。

(三)七號六點半鐘派飛機一架，賚陳督練報一件。至馬廠呈報段總司令。七點廿五分又派一架往豐台拋擲炸彈數枚，即將逆軍擊散。十時復派飛機一架，至豐台見逆軍逃遁，乃轉入皇城拋擲炸彈數枚，迫逆速退。迨至午後五時司令方擬再派飛機進城攻擊，忽接王參謀總長電稱：上午飛機所擲之彈炸傷數人，清廷恐懼，某已派代表來貴處接洽，請暫毋飛入禁城。日內自有辦法等語。



當時司令聆此電話。知清室業已膽寒。且王氏又以前之參謀總長。揆之公誼。私交。似可略此一個人情。做在王氏一人身上。故當卽允許。並聞偽清師傅梁鼎芬。深恐飛機再行進城。復運動日公使。以人道主義勸阻空軍。聞日使卽以恐係航校演習。道經皇城。誤墮。答覆云。如此可見公道自在人心矣。

此次空軍獨立後。有一最可喜之事。則動員令一下。全校人員。無不歡欣鼓舞。所有學員。無論老班新班。均磨厲以須。爭先恐後。惟恐不派其服務。由此益見該軍同袍之勇於舍生取義也。

### 附空軍討逆佈告文

此空軍於六日放飛機一架。翔至城內所投下之警告書。特錄於左。

爲佈告事。照得駐京城內諸軍隊。皆我同胞。素無私怨。惟以民國成立於今六載。世界各國靡不欽頌。張勳何人。敢以私意。背叛民國。以復辟欺我全國人民。並害清室。且以倉卒專橫。勢力迫脅京內同胞。竟使素來擁護共和之軍人。爲不忍糜爛計。一

時。曲。爲。附。和。動。搖。國。本。塗。炭。生。靈。國。鏞。不。敏。隨。同。志。諸。軍。長。後。率。領。空。軍。以。速。解。決。惟。念。城。內。諸。軍。平。日。共。事。有。同。僚。之。誼。迺。先。警。告。無。論。附。和。首。逆。尅。日。解。散。俯。首。投。誠。復。我。民。國。以。副。天。下。公。意。倘。執。迷。不。悟。卽。以。炸。彈。從。事。玉。石。俱。焚。後。悔。何。追。謹。佈。悃。忱。惟。希。鑒。察。特。此。佈。告。空。軍。討。逆。司。令。秦。國。鏞。率。飛。行。全。體。人。員。警。告。

戰。事。日。亟。流。血。之。慘。知。所。不。免。乃。兵。禍。未。臨。而。居。人。之。死。於。非。命。者。接。踵。相。告。吾。民。何。辜。罹。此。荼。毒。哀。哉。

本日午後五時餘前門內東交民巷西口外有人力車一輛拉一某甲身穿白褲褂上鮮血殷殷後有二人隨車以手扶持某甲胸背向北而去聞某甲係在豐台地方誤被流彈所傷故經同人將其送往東城某醫院調治

警察總監吳炳湘因前日定武軍無故闖城遂致市面大受驚擾彼時若非巡警竭力鎮懾地方秩序難免不被破壞茲爲獎勵該警士等勤勞起見昨日發出現款三千元交給內外城各區隊以充巡警獎勵又因現在地方吃緊端賴警察維持庶幾

商民可獲安甯。故於日前已禁止廳員不准離署。並自總監以下。皆在廳內駐守。俾免延誤公事。其內外城各區署長。亦不准稍離職守。設有事故發生。卽由電話隨時通知。以便核奪。

大柵欄祥義綢緞店之護院人某甲。於日前市面驚亂之後。卽擦修快槍。以備不虞。不料。忘將彈子取出。竟撥機關。遂致。倅然一聲。彈由槍口發出。擊在牆上。復又撞回。碰在本店學徒人頭部。受傷尙輕。該彈又將一舖夥胸部洞穿。而過受傷頗重。當卽送往醫院救治矣。

京奉鐵路廊房車站間之鐵道拆斷後。京津之火車。已兩日不通。茲於昨日上午九鐘餘。前門車站有機關車一輛。搭挂客車數輛。上揭英國旗幟。車內滿載客人。向天津方面開去。下午五時半到津。京津間始通車矣。

京中謠詠繁興。商民人等皆紛紛遷往天津。而京西之臥佛寺。碧雲寺。消債寺。四平台。龍王堂等處。房屋亦皆爲之滿房。價因以頓增。城內外各商攜貨前往售賣。及續

往躲避者不絕。於途雖係大和尙發財之機會。而清涼之地則已塵囂布滿矣。京南萬莊一帶。共和軍與定武軍開始戰鬥。槍炮之聲。晝夜不息。因而附近村民。率皆棄家逃避一空。茲聞是日午後七時間。風雨大作之際。西便門外白雲觀地方。忽然發現共和軍馬隊一小隊。見該處有禁衛軍防守。始行退去。

連日戎馬倥傯。風雲吃緊。京內商舖住戶。爲之震動。恐懼異常。及至昨日。定武軍忽然闖城。商民驚擾。後竟有虧累之商店多家。乘機歇業。或棄鋪逃走之事。遂至市面益形蕭條。

八日卽二十日。復辟派見定武軍敗。大起驚惶。紛紛辭職。請去圖保身家。卽崛強之辯帥至此亦漸軟化。而首先請退。於是矯誣之上諭一變。前此態度焉。

張勳奏各省稱兵羣來咎責。懇請開去。差缺一摺。應卽准如所請。開去內閣議政大臣暨直隸總督兼北洋大臣各差缺。其駐京軍隊仍著嚴加約束。保持秩序。內閣政務卽由王士珍等妥慎辦理。並著俟徐世昌來京會同籌商善後辦法。欽此。

內閣議政大臣度支部尙書張鎮芳奏請開缺一摺張鎮芳著准其開缺欽此

張鎮芳現在開缺度支部尙書著楊壽梅暫行代理欽此

陸軍部尙書雷震春奏請開缺一摺雷震春著准其開缺陸軍部尙書著陸錦暫行代理欽此

度支部右侍郎黃承恩奏請開缺一摺黃承恩著准其開缺欽此

段總司令因共和軍攻城在卽慮及京師治安特電囑王江吳三要人注意電文如左。

火急京王參謀總長江步軍統領吳總監均鑒本軍東路四個縱隊本早四鐘在廊坊進攻逆軍該逆抵抗一時半向黃村方面大潰奔逃現仍追擊中西路仲珊弟所率之三縱隊亦已進攻尙未得報戰况所有京城地方秩序使館界內外之外人暨清室之安寧均請執事竭力擔任維持叩禱叩禱祺瑞魚印。

復辟形勢愈趨險惡不日卽將實行取消昨日宣統帝特派某貝勒至和蘭公使館。

向外交團聲明稱此次復辟純出張勳所爲與清室無干又政界確息國務院交通部農商部教育部四機關對於清政府均持反對主義雖經萬繩栻沈曾植竭力誘勸而該四機關之人員誓死不作滿清臣子以致該四機關已演成空城計矣又一消息張勳現因四面受敵各機關政務復又驟然停頓特擬將各行政機關人員之薪俸提前發給五成以資誘人附逆而免無人辦公然一無效果云

本日聞馮副總統及海陸軍有通電宣布張勳罪狀一致討逆京師人民益知辯帥之運命不出三日矣

一馮副座電 國家以人民爲主體經一度之改革人民卽受一度之苦痛國璋在前清時代本非主張革命之人迨辛亥事起大勢所趨造成民國孝定景皇后禪讓於前優待條件保障於後共和國體民以安之約法謀叛民國者雖大總統不能免於制裁清皇室亦有倡議復辟置諸重典之宣言誠以民生不可復擾國基不可再搖處共和國體之下而言帝制無論何人卽爲革命國璋今日之不贊成復辟亦猶

前日之不主張革命所以保民國亦所以安清室（中略）乃安徽督軍張勳奉命入京調停時局忽以兵力圍護清宮逼勒清帝擅行復辟自稱政務總長議政大臣又捏造大總統與陸巡閱使暨國璋勸進之偽奏進退百僚行同兒戲夫禪讓之詔優待之條著在史書傳爲佳話今乃一切破壞之玩冲人於股掌遺清室以至危是謂不義自民國成立延及三年方得各國之承認變更國體是何等事今以各國承認之民國變而爲非國際團體之帝國以一手掩盡天下人耳目中外疑怪駭人聽聞是謂不智近年國家多故天災流行金融滯塞商民愁苦正賴安居樂業汔可小休乃無故稱兵閭閻惶惑分裂之端已兆生民之禍安窮是謂不仁保全元首擁護共和各省均有宣言卽該督軍亦電稱不得別圖擁戴乃狐埋狐搯反覆無常欺詐同袍蔑視國法是謂不信若任其橫行不加聲討彼恃京師爲營窟挾幼帝以居奇手握主權口含天憲名器由其假借度支供其虛糜化文明爲野蠻委法律於草野此而可忍何以國爲是用誓掃妖氛恭行天罰刻日興師問罪殄此元凶諸公憂國之

忱。過於國璋。尙望慨賦同仇。各據義憤。(下略)

一海陸軍電 民國成立。於今六年。民心既一。國本久定。何圖張勳等逆。狼子野心。凶謀突起。竟於七月一日。擁前清幼帝復辟。海陸軍將士。聞此警耗。怒髮衝冠。切齒北向。試思五族共和。猜嫌久泯。清室優待。情禮兼至。何所仇於國家。而造此逆謀。不特四萬萬人。艱難締造之共和國體。將爲所絕。四千年之文明國家。將爲所覆。且逆世界進化之潮流。招萬國輿論之侮笑。將何以自存。我海陸軍將士。對於中華民國。構造維護。艱苦備嘗。扶危定傾。既義之不容辭。亦情之不獲已。誓將殲除凶逆。永奠邦基。擊楫中流。誓無反顧。各省督軍省長。暨文武將吏。手創共和。同伸大義。斷不忍視此垂絕之國命。不一援手。伏願卽日出師。揮戈北上。掃帝制之餘孽。杜漢奸之蔓延。非惟同胞幸福所關。亦世界安甯所繫也。

段合肥與諸同志在馬廠組織討逆軍。進攻京師。山東督軍張懷芝爲防止徐州定武軍北上。於五日上午十時。抽調第二十團所屬之第一第三兩營。及混成團派駐



韓莊。張督軍慮兵力寡弱。更將第十七團添派其第一第三兩營。於五日晚十二時拔隊。第二營於六日下午二時拔隊。前往韓莊云。又聞五日上午八時。由浦口北行之火車。到濟南時。有定武軍稽查一名。兵士四名。搭乘該車。當經魯軍將該兵等解交軍法科拘禁。

記者昨晤某要人。據其所談如左。南方派對於張勳之復辟。本立於對抗之地位。乃消息所傳。反似袖手旁觀。致民黨所目爲專制魔王之段祺瑞。却盛舉討伐復辟之首逆。洵堪稱爲奇怪之現象。若此際無段祺瑞蹶起倡義。恐北方各都軍。附和張勳。益鞏固其根底。亦未可知。故謂段祺瑞爲共和之偉人。與黃興蔡鍔並稱。恐亦無異議。要之中國國民。對於段氏。應少表感謝之忱。始爲至當。孰知孫中山一派。懼段氏功高。矯橫益甚。竟主張非掃除北洋一派。則民國前途實堪寒心。乃親自出馬。向廣東遊說陳炳焜。以謀西南各省之連盟。如果所傳屬實。爲中國前途計。誠屬可悲之現象。號稱公明之民黨。不應爲此種舉動。又民黨各分子。現在畫策。擬用所謂以毒

制毒之手段。希望馮段互相鬪爭。占漁夫之利。雖然。段爲總理之行動。實不免過於頑固。因欲貫徹無理之主張。蹂躪約法之形迹。亦甚不少。假令段氏此次驕矜自己之功勞。無公平之見地。稍有偏袒之行動。則民黨必蹶起反抗。恐中國之天地。將化爲慘殺之戰場。深願段氏勿驕矜此次討逆之偉功。廣納民意。整理政局。民黨亦顧念國家南北妥協和衷。共濟則中國前途庶乎有彀。否則中國之將來。恐無救亡之法耳。

李經羲氏爲張勳所欺。買買然欲組內閣。至復辟內幕醞釀已熟。彼又懵然不知。大爲世人所笑。已記前節。茲忽得其通電自白之文。其可憐情狀。首尾若揭矣。然後知蘇長公惡人猶蝮蛇之言。不可不念也。李氏之比匪夫。又誰怨而張勳異日以爲他人。賣已蓋亦一自反哉。

六月三十日午夜奇變。中外詫爲情理所無。蓋以張勳在津在京。接見者碩。酬對外使通電各省。宣告軍人。罔不以維持元首。鞏固國體爲言。又當諸難已解。組閣將成。

卽有異謀。無可藉口也。此變成於三四日內。禍自外來。若無強援。微服入京。又無要人證明。外交可恃。雖有僉壬密圖。傾覆計已失敗。難惑動心。當外援來甫一日。閉伏幕室。義得密告。疑之。然無形迹。可執。惟圖間接消弭。嗣見外援移寓。報者謂別有政爭。不至發生急變。不圖卽夕禍起。兵動時。贛館笙歌。猶未徹也。義於是夕兩鐘聞警。王聘卿得報。僅先一小時奔馳。止兵退而復集。義急赴江朝宗宅營救。王江已被勦。強邀赴會。經義後至。嚴關拒入。黎明王江回述勦言。無可挽回。在座諸奸。則條條分辯。謂外交決不干涉。無異承認。各省多數復電同意。惟財政尙須籌備。議舉勦卽入宮。宣詔云。次日義欲與勦面論。屢通不報。羣小疑怒及義。自恨無力反抗。遂於七月二日夜。盡出險。到津。聞芝泉已赴馬廠。誓師馳書求伸義憤。經義智昏力薄。負罪無極。復有何顏。求明心跡。惟欲及吾目未瞑。一述經過真象。庶國人洞知義罪所在。不至誤於訛傳。則經義雖死之日。猶生之年。張勳夙抱復辟宗旨。義非不知。惟聞近論改變。去冬蛛絲馬跡。復經一度消滅。月前各省發難。徐州一會。羣帥推爲盟長。義

知勳性夸大。不爲維持。必爲主張。其時大局糾紛。會師闕下。賢碩皆苦引嫌。設竟排難。無人久恐禍生。不測。義心目中。妄以爲繫鈴解鈴。非勳莫屬。又欲動以非常名譽。打消夙昔。主張顯則鞏固國基。免致疆土破裂。陰則保全清室。使存永遠尊榮。衷曲所懷。未敢較發。嗣聞公府有電。諭以調停。又聞勳頗自負調人。謂非奉有明令。無權取重同列。正在馳電詢商。勳使過津。復爲得意。并述李盛鐸復命還京。亦以所要上白。府令雖下。仍未滿意。義旣懷挾前兩種目的。遂以用人不疑之說。貢之公府。二次令下。勳復遲行。義疑而遣問。便中密探心志。答詞則謂夙願無諱。惟時機太不合宜。不忍愛而反害我。一六十老翁。何力久。輔冲人。萬一不幸。危險太重。雖有勸。聳決不可從。義向未與勳共事。誤信爲明通爽。直旣以忠愛爲心。決不忍爲仇報。實不虞包藏狡謀。利攬大權。終爲僉壬煽惑。一朝反覆。如此尤痛心者。世太保陳世傅老成忠主。力勸寢謀太妃中。亦有泣阻者。足見清室毫無此心。乃皆被勳輩揮斥。強制獨行。設國人不諒清室無力禦暴之苦衷。事後橫生猜議。多所削損。不獨糜勳百體不足。

蔽。辜。卽。如。羲。輩。舊。僚。目。覩。慘。禍。力。不。能。救。而。且。躬。與。其。事。設。有。不。測。生。何。以。見。世。人。死。何。以。對。宗。祖。泣。血。椎。心。惟。望。事。定。之。日。重。誅。羲。輩。在。事。者。以。謝。薄。海。深。察。清。室。受。逼。根。因。無。損。我。故。君。毫。末。也。目。下。義。師。雲。集。合。力。包。圍。勿。使。挾。負。而。逃。兼。開。一。面。之。網。容。其。窮。蹙。知。歸。毋。殘。京。闕。卽。或。困。鬪。負。隅。不。難。尅。期。恢。復。從。此。南。轅。北。輒。消。除。意。見。人。心。果。皆。悔。禍。庶。幾。劫。運。可。回。庸。劣。如。羲。月。來。含。垢。忍。尤。本。欲。求。達。兩。種。目。的。向。我。國。民。謝。罪。而。去。今。乃。種。因。結。果。凡。百。事。與。願。違。共。和。可。覩。傷。尅。已。多。清。室。卽。存。感。想。非。昔。凡。屬。在。事。之。人。無。不。躬。負。重。慝。羲。則。息。影。已。久。抱。疚。尤。深。至於。有。議。羲。假。力。固。位。之。說。此。僅。個。人。人。格。關。係。何。暇。置。辯。惟。念。兼。旬。以。來。爲。曲。全。大。局。多。受。困。難。如。赴。京。堅。約。同。行。商。明。只。認。維。持。不。能。就。職。已。曲。諒。矣。乃。到。京。一。難。未。解。卽。立。強。以。任。事。告。以。羣。情。未。洽。信。用。何。存。勳。仍。一。意。孤。行。斥。羲。怯。餒。後。見。羲。苦。商。聘。卿。不。允。復。曰。以。無。政。府。歸。責。於。羲。羲。揣。勢。難。單。騎。出。京。萬。不。得。已。始。有。任。期。三。月。之。宣。告。張。勳。言。行。不。顧。信。義。全。無。通。電。任。意。誣。罔。授。權。羣。小。爲。之。賣。友。罪。小。誤。國。罪。大。羲。今。證。明。張。

勳。爲。造。惡。構。亂。險。人。無。論。對。於。何。方。均。皆。罪。不。容。誅。至。於。復。辟。萬。不。能。行。於。今。日。時。代。世。有。通。論。無。待。義。言。義。雖。始。終。不。預。密。謀。力。圖。消。弭。而。識。闇。受。欺。事。敗。垂。成。尙。復。何。說。經。義。惟。望。諸。公。聯。合。芝。帥。共。伸。撻。伐。早。奠。民。國。速。救。清。室。義。雖。衰。朽。敢。辭。奔。越。再。此。電。恐。難。遍。達。諸。公。接。覽。後。請。賜。照。轉。連。日。困。於。時。勢。範。圍。發。電。稍。遲。揮。涕。茹。辛。伏。惟。亮。察。李。經。羲。叩。支。

本日直隸曹督軍布告云。爲布告事。照得民國成立。於今六載。五族共和。人民無擾。乃張勳以南京之逃臣。保皇之餘孽。膽敢猝發逆謀。背叛民國。名爲擁戴宣統。實則自私自利。迫總統而退位。強清帝以登極。種種逆謀。無非爲己。本督軍維護共和。誓保民國。正以憲法未妥。力謀改良。該逆竟敢挾天子以令諸侯。叛民國而稱大臣。非倒共和。直欲亡國。自應同伸大義。合力進討。茲經各省公舉國務總理段爲總司令。段上將芝貴爲東路司令。本督軍爲西路司令。聯合南北各省。共發義師。尅期北上。掃除妖氛。以奠大局。除電京內各軍保護外。人力維治安外。合行出示布告。爲此

告仰軍民人等一體知悉。須知此次復辟。係被張勳逼迫。並非清室本意。仍可照常保護。張軍爲數甚夥。亦不乏洞明大義之人。倘能倒戈。一律優待。自告之後。各處軍民人等。均各照常安業。毋得自相驚擾。致干未便。一切法令。亦各遵守民國章程辦理。倘敢故違。卽以從逆論。其各凜凜毋違。特告。

本日市面情形。自郊外休戰。城內人心亦稍安定。前門外止有兩家戲園演戲。大飯館冷落無人過問。八埠樂戶亦俱蕭條。惟觀望風勢之行人尙夥。而前門大街之夜市。昨晚竟未停止。商民鎮靜可見一斑。

鋪商因紙幣價格非常跌落。竟或拒絕不用。本日下午西城一帶之錢商臘鋪。多將銅元收起。有持紙幣兌換者。該商等卽拒而不換。各鋪商見此情形。亦多不行使紙幣。以致一般居民頗形驚恐。

又東華門南河沿。爲張大帥住宅。門前衛兵甚衆。該處住戶等早已不安。及至日前。飛機向宮內拋擲炸彈。後街面遂又互相喧傳。謂飛機將往張大帥住宅內投擲炸。

彈。遂。至。該。處。住。戶。大。起。恐。慌。聞。於。本。日。已。多。搬。家。躲。避。

又聞豐台車站鐵路上各項職員等因共和軍與定武軍將在該地決戰。炮火相交。殊屬危險。恐誤被流彈所傷。於日前偕同眷屬來京避難者。約有五百餘名云。

共和軍與定武軍連日在京奉鐵路各站地方交綏。京師方面頗形震動。茲於日前外交團方面。惟恐共和軍逼臨城下。京師秩序必致破壞。故於日前由天津運來美兵九十六名。日本兵一百數十名。法兵八名。安南兵十八名。並帶子彈二十餘箱來京。衛護使館。及保維僑民財產。

復辟後之黃色龍旗。飛揚甚盛。未及三日。共和軍起。前門大街之商家。因受關城之驚擾。遂將龍旗捲藏。已不敢揭掛矣。而內城商戶。尚依然揭掛。及至本日。朝陽門忽被共和軍侵入。斥令商家將龍旗除去。於是東四牌樓南北各商鋪之龍旗亦俱杳然。惟餘西北城之龍旗。現仍翻飛於街市。不敢撤去。

復辟後一斑無識之滿員。皆歡天喜地。呼朋引類。宴飲遊樂。前晚石頭胡同天和玉



飯店內有秦甯鎮總兵端緒與其友輩在該處宴樂。筵召某名妓侑酒。詎該妓因避亂事已經匿往他處。端某疑其抗召。於是大發雷震。在飯莊內大罵。嗣經同座極力排解始罷。

本日上午六點餘鐘。天橋地方有辮子兵數名。在該處拍賣包米。其價極廉。該米多被附近糧店購去。並聞辮子兵賣米之故。因將移軍他去。恐輜重爲累也。段軍討逆。其宗旨頗與國會議員相出入。茲得國會議員討逆善後之通電文。可覆接也。民國成立。六載於茲。政變迭遭。幾無宵日。今則逆賊張勳。王士珍。江朝宗輩。且挾宣統復辟。以推翻我鐵血締造之民國矣。禍患方殷。未知所底。往事不忘。來者之師。同人九死餘生。事皆親歷。含垢忍辱。已非一朝。若不將此次兆亂之源。一一揭出。恐覆轍相循。敗亡無日。勢不獲已。各罄所懷。非以挑短。實計從長。邦人君子。幸詳審焉。溯自金陵建國。五族言和。政府北遷。綱紀廢弛。不得已而有贛甯之役。國人不察。而洪憲之禍以生。賴我東南義師一舉而再奠共和。雖曰日月重光。天下固已騷然。

矣。當局者果有悔禍之誠心。自宜愆後懲前。力循法軌。不謂一年以來。政無常範。策出私門。護國者未言有功。叛國者反膺上賞。視民軍加寇仇。引帝孽爲腹心。淆亂是非。弁髦約法。甚至暴民團包圍議會。督軍團叛國獨立。此何如政象乎。國人思之。項城之亡。誰實致之。某公之敗。誰實使之。督軍之叛。誰實主之。此蓋一二陰謀家勾結帝孽。欲利用權要之威力。以抑新進之潮流。而遂其壟斷政權之私。不遂所欲。雖以詭謀陷人於非義。而不顧而人亦不悟。其非以致釀成今日之奇變。追原禍始。厥罪惟均。茲當義師首舉。復有數義告我國人。此而不得。非所敢言。

(一) 擁護臨時約法 約法爲組織民國根本。約法若失。其效力則破壞。民國根本。國必不國。雖有聖者。難與言治。故首宜擁護約法。

(二) 國會擇地自行集會 國會爲民命所託。約法無解散之明文。此次違法解散。當然無效。故次宜擇地自行集會。

(三) 請副總統依法繼任組織政府 按照約法。大總統有障礙時。副總統得繼任。

今大總統既失其自由。當然由副總統繼任。依法組織政府。以處理政務。而杜野心之漸。故三宜請副總統繼任。依法組織政府。

(四) 創立神聖共和軍五師駐國都所在地。國都爲政令從出之源。不可時有動搖。負其責者端賴守法軍警。若北京軍警。不知法律爲何物。專以權力爲從。違忽而前清。忽而民國。忽而洪憲。忽而又民國。忽而又前清。國號屢易。職守依然。若不變更。後患方長。法國革命時。情境與吾相同。法人乃創此制。專以擁護共和爲職志。故其國基始固。吾宜倣而行之。組織神聖共和軍。駐在國都。如有叛亂者。卽行征討之。則奸宄自消弭矣。故四宜組織神聖共和軍。駐在國都所在地。

(五) 繼續議定憲法。憲法爲國家根本大法。所以範圍百世者也。開國六年。革命三次。而大法未立。甚非圖治之道。故五宜議定憲法。

(六) 非法命令認爲無效。命令變更法律者無效。自叛軍違犯京師以來。大總統居於武力之下。所發命令均屬違法。不能認爲有效。以妨亂政之階。故六宜非法命

令認爲無效。

(七)取消清室優待條件 優待條件爲民國特殊之恩。歷代亡國之君均未享此待遇。本無存在之理。由今既叛國。當然取消。若仍存之。是獎叛也。後患何堪設想。故七宜取消清室優待條件。

(八)懲辦逆黨 稱兵叛國。國有常刑。稍予優容。卽釀大亂。曩者叛國諸人。未能盡法懲治。故政府威信墮地。今倪張稱兵於先。張康叛國於後。若不一併懲辦。恐輕重失衡。起軍人玩法之心。而事益不可爲。故八宜懲辦逆黨。

(九)遣散非法軍隊 軍隊之亂。至今已極。故其受禍最烈。今日救國。非解散非法軍隊不可。例如定武軍。安武軍。禁衛軍。步軍統領衙門。以及綠營。旗營之類。此項軍隊。專以擁護私人。障害國家爲目的。若解散於平時。小之糜爛一方。大之牽動天下。不如趁此時機。厲行解散。况此輩多屬判軍。在法已無存在之餘地。乎。故九宜遣散非法軍隊。

右列九項。經同人反覆討論。僉認爲此次興師討賊必要之件。凡我國民。其各矢志。忱努力同心。始終勿懈。務期達到目的。有一不備。卽不罷兵。勿姑息養奸。毋依違遷就。就本拔本塞源之決心。作一勞永逸之計劃。兵以氣勝。衆志成城。其有倡言保持特殊勢力。以遺患於我國家者。望我國人其共圖之。旅津國會議員吳景濂等叩陽步軍統領江朝宗氏。於午後往訪張勳於私宅。勸其無條件投降。謂退位上諭。行將發出。共和軍亦已迫臨都門。此際如堅持頑強之態度。不僅部下兵士全遭屠殺。卽閣下亦難免殺身之禍。莫如解除武裝。降心段事。以保一身之安全。云。張勳聆言後。毫不首肯。江氏遂憤然蹴席辭去。後定武軍各參謀。齊往諫張。說以依從江氏之勸告。爲有利。張勳亦毫不爲動。反謂馮國璋徐世昌與多數督軍。均主張復辟。未斷行復辟以前。均有函電往還。擬不日將此種文牘發表於日本新聞紙上。以正曲直。而誅此輩狡猾陰謀派之用心。至午後六時。張勳尙未表示退讓之狀態。又聞一息。張勳處於此四面受敵進退維谷之境。頑然仍持強項態度。仍主張左列條件。

一實行君主立憲。一統管維持京師秩序。一統管京師至各埠間交通權。

九日卽二十一日。聞段總司令已通意張勳。令其無條件投降。許保全生命私產。必俟張勳允服後。始晉京整理一切。聞張氏態度強硬。仍執其故態不變。且聲言須徐東海來京面質。後始有解決。又聞段氏知張氏野心未死。決意以武力對付。居人洵洵皆言禍益迫切矣。永定門方面。揭有如左之布告。知段軍來期不遠矣。

討逆軍總司令段爲通告事。此次張勳首逆。純係一人之私。罪有攸歸。法無濫及。所有該部將士。不乏深明大義之人。如有自拔來歸。繳械效順者。一律赦免不究。特此通告切切。又一探聞昨日安定門外。亦貼有此佈告云。

據確實消息。段氏業於日昨駕抵廊房。紛傳擬於今日晉京。惟張勳態度尙未決定。恐段氏晉京之期亦不能豫斷。大約段氏入京之期。須俟張勳承諾無條件降伏。將所有軍隊解除武裝後。始能確定。另一消息云。討逆軍總司令段芝泉。昨由天津起。旆進抵廊坊。擬先令軍隊入城。預防意外。然後擁旆入京。其期大約在今明日內。合

肥入京後。新選任之內閣員。亦一律入京。

段總理在天津暫設國務院辦公處。選擇各部總長人材。以便組織正式國務院。聞其名單如下。外交汪大燮。財政梁啓超。內務湯化龍。交通曹汝霖。教育范源廉。農商張國淦。陸軍段氏兼任。司法海軍尙未得人。已由段總理電請馮代理總統依法任命。一俟覆電到後發表。大約今日即可見諸事實。

討逆軍業已進迫京師。復辟派處於四面楚歌聲裏。希圖兔脫。雷震春張鎮芳一時匿居六國飯店。於今日出京赴津。行至豐台時。被共和軍拿獲。又馮麟閣在天津新車站被逮。捕惟康有爲微服出京。未聞被捕之耗。可見其腳長善跑。又議員梅光遠亦在豐台被捕。聞與張辯帥大有關係云。

張勳辭職後之都門現象。自七月一號復辟。易民國爲大清。傳諭商民徧挂龍旗。一切公私簿冊文告。均改稱宣統九年。辯子軍橫行市面。氣燄方張。商界行旅。多被侮辱。莫敢誰何。迨討逆軍起。辯軍迭次戰敗。昨日下午。張勳鑑於大勢已去。禦敵無

能特正式辭去各項要職并通電各省說明復辟事由爲個人飾非卸罪今日已發表清諭嚴飭張勳約束軍隊任王聘卿以善後辦法都門人心漸定現象亦較前數日爲佳前門大街各商店門首全不見龍旗招展中華門左右亦無辦軍防守西站京漢鐵路已照常開車出京眷屬頓形稀少步軍統領江朝宗現出一安靖民心維持地方之佈告已將宣統年號削去只記陰陽歷月日環觀者甚衆間有一二辦兵頭纏白結身著藍布舊衣態度狼狽不堪在市購物似將去而之他與前日情狀如出兩人又中交兩行鈔票價格稍昂惟尙無一定市價某處曾發現討逆軍佈告（見前）閱者面有喜色道路車馬漸覺衆多不似前兩日之沉寂觀此現象都門一隅不久當恢復原狀而張勳之去留頗惹人注目矣

此次民帝兩軍交綏帝軍已被迫窘張勳自知無法挽回曾向某方面哀交設法轉圜惟民軍方面要素罪魁聞其姓名爲劉廷琛萬繩棧陳曾壽王乃徵章侵陳毅張鎮芳等七人劉陳王等爲煽惑張勳最力之人民軍指名要素交出正法以示大懲



該等自作孽。恐不可追也。

永定門外之共和軍。有第十一師之騎兵一連。而騎兵大隊本部。則設置於永定門外之東方。四十二團之一營。則橫斷於京津線之附近。第十一師第二十一旅司令部。則設置於永定門外之西方。前衛司令官亦在焉。騎兵之主力及其司令部。均在附近森林中。第十一師之主力。則集於沿途。第十一師及第十二師之司令部。依然在南苑。類與前衛司令部傳遞消息。極形繁忙。

張勳等預計復辟軍敗。擬由德勝門逃出。繞道取京綏路。以入蒙疆。曾於德勝門裏古廟水窪之地。暗置野礮二尊。一指西。四牌樓大街。一指德勝門大街。又備機關槍四架。皆係反指。向南預備將來敗退。由德勝門逃出時防禦。追軍聞張軍於前日。又已潛行移礮。僅遺機關槍兩架。在積水灘側廟內。該處居人深懼。一旦變起。礮力所及。地方糜爛。殃及池魚。無不心驚胆落。

張勳因目下形勢益加嚴重。因窘迫憤恨。宣布去年徐州第一次會議議場之紀事。

據張勳。云。會議時。馮。氏。段。氏。梁。啓。超。徐。世。昌。均。允。協。助。復。辟。之。舉。云。

宣統復辟。京城龍旗飄揚。至討逆軍逼近都門。各商鋪已將龍旗捲收。今日上午。各部院各機關步軍各官廳及警區全城鋪戶。均將龍旗一律取消。不日又當還我五色國旗之自由矣。

張大帥運籌幃幄者。有惟康南海之策畫最多。此次復辟。南海來京。拜跪清廷。効忠幼主。自無異議。然聞南海與張勳暗中頗生齟齬。因南海係主張虛君共和。恢復帝制。視爲後圖。張勳初亦聽從此計。到京之後。忽變爲猛進態度。自信太重。視天下太輕。南海之言。漸不能入。於是移出張宅。暫居於聖人府。今見共和軍起。大事已去。南海擬卽向清廷辭職。潔己以退矣。

清室逼於張勳之要挾。收回政權。情知重違民意。必召禍端。兩太妃與宣統帝終日哭泣。嗣因各省反對。急思收回成命。以息爭端。昨會開御前會議。詢謀僉同。大約今日。明日卽以上諭發表。並擬飭張勳速返徐州。由王士珍調停兩方。不得再有戰事。

定武軍因衆寡不敵。現已勢孤力窮。故有休戰之請。現聞王士珍江朝宗吳炳溯等。因恐共和軍衝入城內。與該軍激成巷戰。破壞京師秩序。故請張大帥先將天壇內之軍。遂調出城外。聞張大帥亦已首肯。擬將該軍移往東直門外孫河地方駐屯。（按此未實行）

第十一十二十三師全體加入討逆軍後。張勳得悉異常懼怯。尤恐個人身家生命不保。故又調辦子兵五百名。帶機關槍四架。保衛南河沿之私宅。自辭去內閣議政。大臣確已三日未敢出門。噫。張勳之胆量如何可概見矣。

京師總商會因定武軍屢次戰敗。行將退走。惟恐該軍有乘機焚搶情事。故懇請駐紮給孤寺之潘統帶。介紹與定武軍統領李紹臣接洽。要求保護。如有所需。商會擔負供應等語。聞李統領頗明大義。當已允許。擔任保護。力維秩序。

南苑內陸軍第十一師第二十二團軍兵一營。於今日上午六時餘。突然闖入永定門內。佔據城樓。嗣經軍警督察長馬龍標。會同永定汛守備王德勝。急馳至永定門

外地藏庵該團辦公處。與該團長交涉。請勿驚擾商民。以維現狀。該軍長官始發令將佔據城樓之軍隊。調出城外矣。

復辟之事。行將取消。內外城商鋪住戶。亦將黃色龍旗撤除。而共和軍雖已逼臨城下。惟皆切實告令商民。勿得驚恐。決無巷戰之事。至（豈知禍在眉睫）定武軍方面。亦頗知自愛。由休戰後。凡該兵等。未解除武裝者。不准出遊。因而商民覩此景象。率皆放心。故於昨日起。市面已漸有恢復舊觀之狀況。

共和軍與定武軍在京畿方面交綏後。西南一帶莊田。多被兵馬踐踏。農民所受損失已鉅。不料一班土匪盜賊。因見農民紛逃避難。遂在途中劫搶。或逕入其家。掠取財物。該匪徒等。其敢如此行動者。由於各村莊駐屯之游緝隊兵。皆已撤入城內之故。

近畿第二混成旅旅長吳長植。少臬經張勳強命。派第四團第一第二兩營。赴廊房抵抗討逆軍。實出於不得已之舉。惟該軍並無與第八師接戰。現聞吳旅長以第一

混成旅長張錫元實行加入共和軍。吳氏亦於八日晚間與滿清政府完全脫離關係。與張旅長取一致之行動。

共和軍連日與定武軍開戰以來。所有商販均已裹足不敢入城。遂致京內如菜蔬鮮菓等類俱已缺乏。因而各門稅局竟致無稅可徵。至京奉京漢兩路雖已通軍。然並未輸運貨物。

十日即二十二日。共和討逆軍曰益接近。而張氏對於無條件之投降不肯屈服。勢且決裂。此兩日正在危機一髮中矣。

張軍由萬莊敗至豐台。因共和軍之迫擊甚烈。復由豐台退至城外。竄入天壇。現共和軍已迫臨城下。張軍已因陷形勢所趨。無論如何恐亦不能不演市街戰。各國公使有所見及。此日來特開會協議。結果擬令京師免遭流血之慘禍。特向張勳段祺瑞有所提議。大概欲令張勳及其部下解除武裝。使共和軍保證張氏之生命財產。荷蘭公使以主席之故。特將此意通告張勳。而張勳尙頑然不應。荷蘭公使因於今日。

復訪日本公使館有所協議云。茲錄荷蘭公使送步軍統領衙門公文如左。外交團原不願干涉中國內政之問題。惟現在北京恐發生流血之慘變。是以不能不提出免此巨難之方法。然據外交團所看最有效力者。一面令已經辭職之張帥及其兵丁將其武裝交與有責之當局。一面令段上將宣言擔保張勳及其所屬決無性命之虞。聞雙方尙未承認云。

●共和軍提出之條件

據現接天津電話稱段祺瑞將左列三條件提出告張勳云。

一 保留清室優待條件。

二 取消皇帝稱號。

三 解除張勳及部下之武裝並保護其生命。

張勳聞之答曰第一同意第二不同意第三不解除武裝自率兵返去徐州聞共和軍大不滿意。

探聞張勳於今日午後召集營長以上之軍官於私宅徵各軍最後之決心。大概謂君等本無何等罪狀如欲長保生命者即解除武裝速還故鄉各安生業如欲共生死者即留此處嚴督所部誓共生死各軍官均答稱願同生死（孰知張氏竟背其言）

討逆軍近抵都門。至今日下午止。永定門得勝門齊化門三面。已有多數軍隊。分別扼要駐紮。靜待司令指揮。探聞張勳態度仍然頑強。大有背城借一之概。現已令其部下將陸軍部軍需處所儲之子彈用大車三十輛裝載送至南河沿張邸預備迎敵。但城內人民日來已十分惶恐。雖有軍警維持秩序。而討逆軍要不能不特別注意以防萬一之禍變也。（聞此子彈係雷震春所贈與）

昨夜十二點餘鐘。永定門外之共和軍。忽放排槍數次。因而天壇內之定武軍。認爲敵軍前來襲營。遂整隊以待。候至天明。見無敵軍。始歸營休息。茲聞城外共和軍放槍之故。係因口號錯誤衝突。其傷人與否。尙未詳知。並聞天壇內定武軍恐被敵軍

包圍。乃將天壇周圍牆壁穴穿十九處。以便抄襲敵軍。

今日下午一時餘。天壇內定武軍將機關槍三架。子彈兩大車。運往東安門內南河沿。並聞張勳因共和軍逼迫甚緊。現擬負固自守。決不離開北京。故於昨日將南河沿一帶各要路口。皆設置土袋。以作防壘。並將東安門內大橋地方。施行戒嚴。

又聞張勳今日派兵至陸軍部軍械庫。搬取機關槍若干架。並將子彈裝載大車三十輛。確已運往張宅馬號內堆積。以備急需。(見前節)

又聞張勳鑿於日前飛機向皇宮內拋擲炸彈之事。特在景山上及北海之白塔等處。各設山礮二尊。機關槍一架。以擊飛機。又張勳今日密令天壇內定武軍統領李輔廷。如不能敵抗共和軍時。即退入大清門。昨有人見大清門內兩旁。已藏置多數土袋云。

代理大總統馮副座於昨早十時。業已就任。各文武官均行祝賀式。市內每戶均挂五色旗。以表祝意。



大總統黎元洪任命段祺瑞爲國務總理。又將總統之印。交與段祺瑞。轉呈馮副總統。昨早馮副總統暫理總統之職。權在南京。組織臨時政府。今日已發見命令矣。

### 大總統令

長江巡閱使安徽督軍陸軍上將張勳久膺民國重寄。不知竭誠自効。阻兵怙勢。包藏禍心。此次藉命入都。陽計調停之名。陰行叛逆之實。動搖邦本。淪陷神京。罪惡貫盈。敷天同憤。張勳應卽褫去本職。并褫奪軍職。勳位著傳知前敵各軍。嚴拿務獲。盡法懲治。以申法紀。而快人心。此令。

此次逆賊張勳假名盜國。竊踞神京。經國務總理段祺瑞組織討逆軍。聲罪致討。督師進剿。疊挫逆氛。現已將次合圍。盪平之期。卽在指日。所有各省軍隊。除業經調遣外。均應各駐原防。維持地方秩序。並諭禁所在軍民人等。勿得藉端號召。致滋紛擾。此令。

直隸省長朱家寶着免本職。此令。

特任曹錕兼署直隸省長此令

特任齊耀琳暫兼代江蘇督軍此令

特任倪嗣冲兼署安徽督軍此令

國務總理段祺瑞

復辟於茲旬日。除吉林外。各省全行反對。現段祺瑞所率之共和軍。已迫臨城下。卽從來駐居京師附近諸人物。旁觀形勢。至日來亦採反對態度。致令復辟首謀之張勳。遂陷於四面楚歌之中。探聞張勳某幕僚。竊託某國公使。懇其保護。公使團爲維持京師治安起見。速促徐世昌來京調停。現正在運動之中。成否尙未可卜也。某新聞記者昨往訪張氏於南河沿之私宅。見其庭內警戒。祇護兵數名。與從前無少異。惟造訪之客。較曩日似稍減少。記者入室少坐。張氏如舊莞爾蒞臨。第眉目之間。頗露憤慨不滿之色。與旬日前喜不自勝之容貌。似相徑庭。蓋旬日前爲斷行復辟之日。今爲取消復辟之機。無怪其然也。張氏對於記者頗多吞吐之辭。據云。此次起事。

決非基於私心。爲予個人之名譽利益而發。不過爲國家。爲皇帝。達予宿願。與同志斷行而已。觀反對復辟者之通電。多謂予爲自私自利。其實彼輩亦不過藉辭以攻予。予安能受予所以不肯背城借一者。實顧慮京師之治安。欲平和解決了事也。至託人保護予個人之生命。甚非予之所望。予所希望者。只皇上依然踐位。其他無論何等條件。均甘坐受。予一人之生命。更不成問題也。段祺瑞提出條件之說。尙非事實。若段不容予之主張。予當率我數千健兒。爲國家爲皇上。決一死戰。外間聞有予已潛逃之風說。〔畢竟走此一着〕有何潛逃之必要。卽一戰而授首。亦最痛快。言至此。幕僚某從傍告予曰。人皆勸大帥之家族避難。大帥不聽。現夫人及一如夫人與六個世兄均安居。此間張氏復繼續謂徐東海來京。尙須時日。決非一兩日內所能命駕。段氏入城之說。亦非事實。馮國璋原來贊成復辟。此次貪戀眼前之大總統地位。遂利用機會。表示反對。有人勸予暫時隱忍。以待機會。予以爲失此好機會。更有何時記者。復問閣下行將將徐馮二氏贊成復辟之函電發表。是否有其事。張氏

顧左右而言他。記者遂告辭而退云。

自張勳兵敗奏請辭職以後。一般人之推測。均謂宣統退位一層。不久即將宣布。而遲遲至今。尙未發布退位明文。不免滋人疑竇。茲經確實調查。未宣布退位之原因。有數種。(一)張勳雖然辭職。其態度非常強硬。曾對人言言必載死。而後已。(二)徐世昌尙未來京調停。無人。(三)清廷大臣辭職者。辭職請假者。請假所餘。王士珍。陳寶琛。二人耳。故不敢作主。(四)清帝退位。仍要求照舊享受民國之優待。非有調人不易成功。有此四種原因。所以清帝退位明文。至今日晚八時止。尙未發布。

京師各公署於復辟後。所有公文稿件。即改用宣統九年字樣。茲於日昨聞各公署所行之公文。又皆改正用中華民國六年字樣。並聞步軍統領衙門。京兆尹公署。警察廳。將於今日會銜出示曉諭商民。一律改正矣。

永光寺中街某姓。因拒掛龍旗。曾被巡警催責。迨飛機拋擲炸彈後。龍旗竟歸暗行消滅。某姓乃向催掛龍旗之巡警佯問曰。貴區所掛之龍旗。究係何處製造。需價幾

何我欲仿造。以免催責。該警士笑而答曰。你不用斟酌。這是真正搗亂的事。共和軍與定武軍戰於京奉京漢路綫附近。以致火車不能通行。所有郵遞亦皆停止。現在復辟已歸失敗。各路火車已皆通行。故經郵務總局昨已通知各支局。照常收發郵件。

前門東車站票房。前因搭客衆多。卽改收現洋。對於中交紙幣。竟敢拒而不用。凡遇錢零。亦不找給。茲聞近因弊竇已被報紙揭出。乃以靈敏手腕。運動本站正副站長。聞該站長等爲遮掩人耳目起見。每值售票時。輪流在票房明爲監查。實則仍任伊等所爲。欲爲大約。其中必有利益以霑之條件也。

日前張大帥卽將各路車站以及電報電話等項交通機關。悉行派兵監守。現在共和軍已逼臨城下。定武軍力不能敵。帝制取消在卽。故今日午後八時餘。已將各車站及電報局等處之辮子兵。一律撤去。

清帝復辟後。民國政客紛紛出京避難。遂致向不敷用之電話機。竟騰出二百四十

餘號而京津間之電話機關又被定武軍監視因而人皆不敢通電聞電話局核計本月份之預算損失頗鉅。

前門外各商店因聞郊外停戰大局可望和平解決故於前日皆放心營業市面亦漸復舊觀今日忽聞定武軍籌備戰壘不肯屈服於是大爲驚懼因而西河沿廊房頭條等處金店銀樓於下午七時即已各自閉門戒嚴大禍臨頭知所難免矣。

近日主謀之康聖人聞有微服出京之說又一消息謂藏匿某國使館並未出京其門生徒黨自梁任公氏通電話責文字上已斷絕師生關係外（見前節）其餘通電勸告者頗多聖人亦知自悔此數日已不與張氏鬼混頃見唐麟一電綠之以供衆覽。

萬急北京探送康南海先生鑒聞京變傳公主謀驚惶莫知所措不寢二夕病莫能起公之於麟愛護之深不啻骨肉私情若是豈不知感然復辟之舉背逆潮流有識者皆以爲不可且偏安一隅立見傾敗噩耗傳來湘人憤慨莫可名狀是爲公義所

不容昭然。若揭公一片孤忠。知公者皆能爲公諒。然守夷齊之節。不仕民國可也。何必作此死灰復燃之舉。肇清室滅亡之禍。陷人民塗炭之中哉。夫今日之事。公固以一身殉主義。苟兵連禍結。南北操同室之戈。外人收漁者之利。亡國之咎。誰實任之。麟感於私情。迫於公義。明知逆耳之言。敢作盡情之告。乞念國家之危亡。生民之困苦。出黎公於囚中。退清帝於大位。消弭巨禍。還我共和。則天下之毀公者。皆轉以譽公矣。泣血陳辭。伏希鑒察。唐麟叩支。

馮河間於七日就代理大總統職。通城文武暨紳商學各界。午前十時齊赴府叩賀。車水馬龍。頗形熱鬧。各機關停止辦公一日。各商店均懸五色國旗。以表慶祝。馮於十一時在府舉行就職體禮。禮堂卽設在頭門內之大堂。當中海陸軍軍官暨政商學各界均按次序排立兩旁。馮出氣度軒昂。就香案前向國旗行三鞠躬禮。禮畢。作樂樂止。乃受海陸軍軍官暨政紳商學各界致賀。行三鞠躬禮。禮畢。復作國樂。樂止。馮代總統簡略演說數語。謂張逆謀叛。國本搖動。今叨天之幸。張逆已成囊中之鼯。不

日即可殲滅。今鄙人受國人委託。遵照約法。暫代大總統職權。以收統一之效。今後所期望於我海陸軍軍官者。在齊心合力。維護國家。勿爲越軌之舉動。違背我軍人之天職。勿作一人一姓之奴。喪失我軍人之名譽。同仇敵愾。盡殲醜虜。光我華國。惟我海陸同胞。共起圖之。演說畢。齊呼中華民國萬歲。大總統萬歲。旋攝影以誌紀念。馮國璋就代理總統職電。上海孫中山岑西林唐少川汪精衛谷九峯張鎔西天津梁任公湯濟武王又山熊秉三汪伯棠吳濂伯任志清范靜生蔡鶴卿南通張季直諸先生鑒。國家多難。復辟之事。竟成事實。國璋聞變以後。連電各省。與諸帥籌商。出師聲罪致討。所有檄文通電。業經公布。當蒙省察。賴各省各軍之力。同伸義憤。數日之間。近畿師旅。進規京師。大局可望迅速底定。黎大總統因變起倉卒。出避外署。冬日來電。引擬大法。囑以代理之任。各省將吏及諸賢達。更復函電紛馳。責難無已。國璋自維才望勳勤。無一可勝重寄。而念國家政權。不絕如縷。法律事實。又無可諉。不得已。遵於七月六日。宣告恭代。權在南京就職。一俟此間軍事布置就緒。卽當北



上遠瞻京邑。浩劫方興。仗邦人愛國之誠。冀可挽回萬一。藐然之身。忝權重職。兢兢在疚。不知何以塞人望而保此國命。諸君碩德宏猷。手造民國。爲國璋所欽佩。此次變作。尤能以義聲倡率天下。使將士吏民。益明向背。國璋爲國捍衛。幸附同心。倍增勇氣。當茲絕續之會。更需究濟之謀。尙祈在遠不遺。隨事指導。非獨國璋一人之幸。宇內蒼生。實利賴之。翹企待命。不勝拳拳。國璋陽。

十一日卽二十三日。上午尙聞段氏提出條件。惟張氏無何等解決。至下午而風聲漸緊矣。

自廊坊一役後。張軍逃入城內。張大帥憑藉宮牆。負隅固守。自信不可灌。不可熏。以爲得計。共和軍方面投鼠忌器。務欲和平解決。以免流血之慘。迭經向張勳勸告。投誠。詎張勳執迷不悟。拒絕共和軍提出之條件。段總司令決計用武力以作最後之解決。昨電命汪大燮向外交團領袖荷蘭公使致正式之通告。大致謂本總司令務欲和平解決。迭經勸說。張勳竟無效果。決定用武力解決。勢出不得已。務期局限戰。

區以防戰禍之蔓延。特此通知。當經荷公使向各公使通知矣。

又聞近逼城下之共和軍將於今晚豫備一切自明早起開始攻擊云。

附錄段氏對於張勳之最後勸告事實

昨晚王士珍等三名往訪張勳勸告渠承諾段氏所提出之條件。以免京師數十萬無辜之民罹無殃之災。張勳早有決心。雅不願承認此遺羞之條件。遂斷然拒絕之。王等乃將此旨通知段氏之參謀曲同豐傅良佐等於六國飯店。曲同豐當即以電話報告段氏。復於翌晨向天津出發。顧段氏再以同一之條件試最後之勸告。特傳知徐樹錚傅良佐兩氏。徐等復將此旨轉傳王士珍王氏。明知張勳不復容納。不便親往張宅爲無益之忠告。乃將段氏最後之勸告用公函通知張勳。和平能決之說。蓋斷然無望矣。

本日下午戰機已迫於眉睫。蓋因段祺瑞提出之條件業被張勳拒絕。兩軍衝突。茲爲事勢所不能免。聞段氏已派人至某國公使館。非用公式的陳述戰爭難免之苦。

衷。要。求。外。人。之。居。住。於。南。池。子。附。近。者。速。行。遷。移。以。避。戰。禍。

又。聞。段。氏。擬。用。良。法。戰。擒。張。勳。使。居。住。外。人。與。市。民。之。生。命。財。產。不。被。損。失。攻。擊。時。間。擬。於。白。晝。行。之。以。期。成。功。決。不。延。至。夜。間。且。攻。擊。之。重。要。地。點。擬。專。注。於。南。地。子。附。近。惟。張。軍。昨。日。開。軍。事。會。議。結。果。決。計。枕。戈。背。城。爲。清。帝。決。一。死。戰。故。段。氏。計。畫。能。否。完。全。達。到。目。的。尙。未。可。知。現。張。軍。對。於。共。和。軍。之。防。戰。業。已。準。備。如。大。清。門。及。其。他。舊。宮。城。外。郭。各。門。均。已。壘。積。土。囊。各。城。門。之。部。署。亦。已。分。別。駐。紮。以。策。防。備。共。和。軍。之。攻。擊。部。署。軍。事。計。畫。秘。密。難。以。探。息。茲。僅。將。各。軍。駐。紮。地。點。排。列。於。次。

步 兵 三 營

朝陽門外騎 兵 百 四 尊 十一師所屬  
礮 四 尊 十二師所屬

機關槍 二 架

安定門外與德勝門外之間 第一師

西直門外 第十三師

彰儀門外 第三師

永定門外之共和軍。至夜間城門閉鎖後。即進至城根脚下駐紮。俟朝陽門開後。再行退却。

清軍之防備部署。由張勳於今日午後四時。召集各軍官開軍事會議。議決。各自努力。決一死戰。旋即部署一切。茲探聞其大要如次。

朝陽門方面 定武軍東路諸隊

彰儀門方面 定武軍西路諸隊

永定門方面 定武軍南路諸隊

皇城及南池子方面 定武軍中路諸隊

就以上情形。而觀兩軍戰機。實已迫於眉睫。開戰之期。爭此一刻。勝負之數。無庸諸慮。所可慮者。京師數十萬之生民。恐無辜而難免池魚之災耳。嗚呼。

此次段總司令與師討逆。除東（段芝貴）西（曹錕）中（陳光遠）三路司令。互相進兵。直抵都城外。茲復有義勇隊軍士。業於數日前便裝入京。其宗旨係竭力維持京師地面治安。保守中外秩序。預防定武軍之擾亂。該隊軍兵約數百名。就中密探五十餘名。調查員六十名。見義勇爲該軍隊。似具此氣概。聞多屬藍秀豪將軍舊部。故內容非常整肅。

京師風鶴。中聞外省。對於徐州之處理法。種種亦於辯帥大有關係者。

南京馮河間。以徐州爲張勳老巢。爰於五日晚間。特派禁衛軍二營出發。渡浦沿津浦路綫。規復徐州。張文生聞耗。卽頑顏抗命。先發制人。拆燬徐州附近軌道一段。割斷沿路陸路電綫。交通一時中阻。馮乃復令倪嗣冲節制該處軍隊。張自知無力抵抗。遂變其態度。通電馮段二公。陳述彼未贊成復辟。并謂進諫無從。惟有飲泣。此後當服從命令。已將所部軍隊。飭令一律剪髮云。

日前傳聞山東督軍防阻徐州兵北上。業已發生戰事。茲得確信。乃係防堵戒嚴。並

未。實。見。戰。禍。其。詳。情。具。錄。如。左。

魯省對於滕嶧境內津浦鐵路之防禦及不准徐州軍隊北上各計畫均極嚴密。今將張督軍所布軍令詳錄於次。其關於鐵路者計二條。(一)凡津浦車站屬山東界線者所有存車除正式交通足用外一概扣留。(二)車站售票均以津浦路線爲止。不准售京奉等路通票。其關於軍事者昨復電令駐紮滕縣之陸軍王團長翰章會同總司令施鎮守使從濱。凡屬自徐北來軍隊均須嚴加檢查。計頒軍令五條。(一)徐州軍隊乘車北上如到滕縣車站該軍應令其停止不准擅自通過。(二)徐州軍隊如受勸阻即令其移駐車站附近由該團長報告本督軍靜候命令始准行動。(三)徐州軍隊如乘車至滕縣經本軍令其停止不聽或強行通過或以武力反抗時該軍即施以攻擊不得徇縱。(四)該軍駐在地附近如有土匪該軍負勦辦之義務。(五)該軍於滕縣車站無論貨車客車凡有北行者均須精密檢查如有暗運軍火危險品物或著便衣暗帶手鎗炸彈等事即行逮捕按軍法訊辦連日以來凡服

定武軍裝服徽號者。無論執持鎗械與否。概行扣留。送辛莊軍警看管。並不虐待。現聞沿途計共扣留十餘人。故山東界內鐵路。每日通車。已無定武軍人足迹。至於濟垣。向有該軍常住坐探。據某機關調查所報告。聞有數十名之多。恃其勢力。往往生事。人皆畏其蠻橫。莫敢誰何。惟自嚴加檢查。而後現已斂迹銷聲矣。

康有爲自張逆電召入都後。眷屬本留滬上。茲以義軍直逼京城。張逆不日出走。爰特密電滬寓。令速避地香港。該寓得電後。昨已倉卒成行。全眷均赴香港云。

### 頃傳來大總統令

外交總長伍廷芳着免本職此令

張勳叛國該軍各統領原駐防所未經隨同入京事前當未與謀順逆所在各應曉然著將該軍隊改歸倪嗣冲節制並著察看情形果明大義不予株連倘或觀望抗違國法具在決難曲貸將此傳令知之此令 國務總理段祺瑞

徐東海來京與否。近日以來。言人人殊。惟聞徐氏於今日午前十一時半。致電現在

居中調停之江朝宗氏。明示和解之條件。內容大別爲三。(一)定武軍解除武裝。(二)保護張勳及其家族。(三)保存張勳之私有財產是也。此種條件。殆與前日段氏所提示之條件。毫無別異。聞該條件。係徐氏在天津與段氏協議之結果。所致張勳接通知後。大爲憤怒。決不與以答復。故徐氏亦暫不來京。

帝制禍首張氏。因兵微將寡。難以迎戰。乃退處皇城。以待救援。嗣以共和軍逼迫緊急。四面楚歌。故於日前。聚集大小將士。決定同心抗拒。負隅自守。又自謂如不能守時。卽焚掠北京。禍及外人。然後自戕。決不作俘囚遺笑。後世等語。因而商民聞此。信息莫不震恐。嗚呼。辦帥與民何仇。

中華門及東西長安門。被定武軍佔據後。卽將交通隔斷。因此中央公園大受影響。遊人絕跡。嗣後該園董事等。極力維持。始改由南府河沿地方。另闢新門。以便遊人出入。不料定武軍戰敗。退入京內。後卽駐於天安門及公園內。遂致園內各茶社飯館。現已閉門歇業。



定武軍負固自守。不肯退出城外。因而京內難免巷戰。慘禍惟聞。一般土匪。因搶掠機會。已到。故於日來三五成羣。身着短衣。沿街遊行觀望。風頭聞南營鮑參戎得知此信。因所管地面商務繁富。亟應切實保護。故已飭令各汛將官。設有戰事發生。卽令兵士以保護商家不受土匪搶掠爲第一要務。

聞張勳現已決定負隅固守。不惜糜爛京師秩序。故將東安門沿皇牆一帶地方。已皆築設戰壘。今日在大清門駐紮之定武軍。已將大清門關閉。兩門堆積土囊。僅留東門。以便該軍出入。各處辦子兵。皆已十分戒嚴。

十二日卽二十四日。予於睡夢中聞槍礮聲隆隆不絕。知戰禍已發。時三時有半耳。所居局中各門嚴閉。以防不測。不能出探消息。是日市井遮斷。交通食物無從購取。幸局中備有薪米有飯。無蔬藉免枵腹。至午刻礮聲稍止。始有消息傳來。因拉雜撮錄如左。

第三師步隊於昨晚三時由彰儀門入城。卽至先農壇布置。該師砲隊在月壇布置。

砲列至四時二十分。同時攻擊天壇。定武軍鎗砲齊放。威力極猛。定武軍拚死抵禦。竟不能支。至上午十一時。已經投順。改掛五色旗。惟尙未完全解除武裝云。又聞定武軍死傷者約十四五名。第三師損害較多。聞因塗逕未熟。占地不利之故。

八時至十一時。張軍四十餘人。佔據正陽門城樓。布置機關鎗。抵禦共和軍。於是前門大街一帶。全在瞰射界內。共和軍由肉市西河沿前門大街等商店樓房上。擊射。嗣又轉東西車站貨場內。夾擊定武軍。因三面受敵。遂棄城樓。退入大清門內。定武軍傷二人。死一人。該方面雖交戰較久。然兩軍所用武器。均以快鎗及機關鎗。故除電線玻璃窗。太平水缸。稍有損害外。別無大破壞。僅見一人斃於流彈。屍委路旁。耳前門東西車站。站長車。守逃避一空。兩站僅有鐵路巡警武裝嚴守。

本日兩軍交戰時。人民蒙池魚之殃者。固屬不少。而外人方面。觸彈負傷者。亦有之。上午八時左右。有外國人二名。在城壁上觀戰。中流彈負傷。又日本兵士一名。服務步哨時。足部負傷。法兵一名。美兵一名。均中彈負傷。惟美兵傷重。竟致斃命。又聞美

婦人亦有傷者。

張軍被擊潰散後。至五時。京中秩序漸次恢復。步軍統領公署及警察廳。均改掛民國五色旗矣。

又一消息。所有張勳前發之滿清龍旗。均於昨日實行焚燬。

數日來形勢日趨險惡。至昨日午后。益告迫切。入夜。共和軍徐徐開始活動。從事部署。至今日午前三時左右。遂由勳陽彰儀二門進城。張勳軍則自昨日午后三時。亦開始戰鬥準備。以景山爲砲兵陣地。而步兵陣地。由西四牌樓西單牌樓出公府。沿外壁至中華門正陽門。復東轉出南池子。至東華門西安門一帶之皇牆。惟張軍集中勁旅。乃在駐紮於天壇之步砲兵約二千名。故內城之防禦總數。僅不過一千八百餘名而已。夜九時。王士珍用電話告張勳。囑其特派唐某來宅。協商關於調停之要件。張勳即遣唐赴王宅。而所提出之要件。依然與前次無異。張勳於是斷然拒絕。王氏見張勳固執。遂將段軍公式通告外交團主席荷蘭公使。將不得已不能不交。

戰之旨示知張軍云。

是日南河沿張宅。因有不能不應戰之決心。比平時反形沈靜。至昨午後十時。軍務處似籌畫忙碌。至於平日執務之文官各室。殆無人影。不勝蕭條。凡來訪諸客。均由張勳親自接見。談吐依然豪爽。頻謂明日決戰。必以身殉。頗現一種覺悟狀態。十二時前後。張勳照平時習慣。就寢一小時。猶有訪客四人來。張不願起床。令萬參謀長代爲應接。客謂應令張勳之兒女避難。他徒萬參謀長答稱終難得其允諾。且極慷慨。客因萬之諫。張不力。不足以動其心。雙方辯論頗形激昂。客遂侵入張夫人之寢室。企強奪其兒女爲衛兵所防。不果。復求致書張勳。因寢室封鎖。不克傳遞。客等因疑張業已自殺。且有以張比文天祥者。白髮之老客亦不禁感慨無量。見目的難達。遂辭去。有某君建議。謂張勳之一切往復函牘。可爲將來參考。關係重要之物。莫如將此等函牘運往。外間以傳。後來某君偉其議。遂集書類。納諸箱內。擬先運往某處。中軍監某恐運出行李。消磨士氣。不允所請。時針指午前三點半。距敵軍來襲之

期不過一鐘。張宅之僕役輩均顏色慘愴，毫無生氣。戰戰兢兢，極願速行避難。尙爲中軍監所不許。

黑夜將明，東方漸白。將士悉啣枚待命，態度極其悲慘。至午前四時二十分，鎗聲遙自天壇方面首起，漸次及於前後左右。悉爲砲聲所繞，尤以距離東方甚近之處爲急。激機關鎗之響起於數百米突之間，鎗彈自東飛來，勢如雨下。砲彈亦爆發於空中，危險之迫刻甚。一刻此時，張勳始起而至池內，笑倚此中棹上，身穿純白之長衫。右手握團扇，時輕搖，態度極鎮靜。與平時無異。惟僕婢輩周章狼狽，言不成聲，極呈醜態云。

先是共和軍總司令段氏特派汪大燮赴荷蘭公使處，告以將武力解決不得已之苦衷。及兩軍配置情形，惟戰機雖迫，張勳決死之志亦愈強固。聞有某外國人前晚至張宅勸告，且曰：足下決死爲宣統戰，誠屬不得已。願將令眷屬速行避難。張勳當卽謝絕，並謂同死而已。某外人遂辭歸。翌晨開始攻擊，共和軍之壓迫愈甚。至包攻

張軍於南池子方面。張勳之命正迫於眉睫。忽有一汽車乘坐二外人。冒彈雨至。先將張勳眷屬護送。至德國醫院復駛回。至張宅。偕張勳至荷蘭公使館。懇請保護。其避難實情雖不詳悉。或死期逼迫之際。預擬逃亡。殆早與荷蘭公使有所相商定歟。第又有謂荷蘭公使親至張宅。告張勳以有利之條件。願否調停。張勳當即諾之。荷蘭公使即謂此處已危險。未便會商。請同余往。張諾之。遂乘汽車至荷蘭公使署。到後。即告張曰。已戰敗矣。不如停戰避難。於此張不聽。將他去。嗣爲衛隊所阻。始切齒罷行。又聞萬參謀長亦避難。荷蘭公使館云。

共和與復辟兩軍。因調停不成。遂出決戰。共和軍昨朝開始攻擊。砲聲不絕。彈丸落下者極多。致復辟首魁之張大帥。遂不得不避難。東交民巷。臨行時。自將其壯大過於王侯之第宅。付諸一炬。今觀其第宅附近之情況。則慘况歷歷在目焉。由東華門左右至張宅一帶。見有九個辮子兵之死骸。橫於道途。附近落下之彈丸。破壞牆壁家屋電線等者甚多。張勳之裝甲自動車亦爲敵彈所中。邸內餘燼尙未

全滅警察隊。正在從事消防。試入其門。則左廂有壯麗之洋房。卽爲其愛妾眷屬等所居者。及其洋式之應接室。殆半爲燼餘。以華美富麗之邸宅一朝化爲灰燼。而毫不顧惜。邸宅前幕宿之辮子兵。今已不留片影。幕棚破毀狼藉不堪。入目外人之往觀。其慘狀者。頗極雜沓。

戰事甫停。共和恢復。而客軍蜂屯一切善後辦法。尙待磋商。都城地面。經一日十小時之礮轟彈擊。人民已膽落心悸。又因軍隊複雜。恐有土匪流氓混跡。其間傍晚再演出搶掠慘劇。刻據確聞。軍警兩當軸已下。特別戒嚴。令自午後六時起。凡通衢要道均禁止行人往來。並諭居民緊閉門戶。又傳出特別口號。凡各區警士及各段游緝隊。夜深梭巡。互傳口號。有不符者。卽以奸細論。此亦軍警應負之責任也。

本日共和軍開始攻擊定武軍之後。內外城之游民土匪。皆奔至街衢。預備乘機搶掠。不料街面軍警俱各嚴重彈壓。並將伊等驅入巷口。該土匪見無隙可乘。遂皆悻悻而返。

昨日地安門外什刹海北河沿地方。有一辮子軍扭住一賣報人拳擊脚踢。痛毆不已。幸經行路人極力排解。始將賣報人放去。聞其衝突原因。辮子兵購買新聞紙一份。見所記載。多係攻擊張勳之事故。爾發怒毆打賣報人。洩憤云。

又聞帝制禍首張勳。倔強負固。昨當礮火相接之時。曾派人至宮內阻止。清帝出宮。謂必能迫退共和軍。聞清宮太監等莫不大罵張勳禍害清室。

第十三師與張軍接戰時。新華門之接待處。收文處。司閤處等室。不知被何人將屋中器具全數打毀。損失物件不少。

昨日撤大清門。復換爲中華門。當時一事頗有趣味。先是實行復辟第二日。土木工人等撤中華門。換爲破舊大清門。後工人等即將支搭架子之木桿。放置於該門之左右。始終並未搬回。至辯兵投降。張勳逃匿。復於昨日撤大清門。換爲中華門。而支搭架子之木桿。仍是初次支搭架子之木桿。未搬回者。於是一般好事人等多所批評。有人謂該工人等當換中華門時。即知大清門不能持久。所以搭架木桿。即不搬。



回。以。便。下。次。再。用。亦。有。人。謂。該。工。人。等。怠。惰。成。性。此。事。適。與。性。合。上。言。未。免。過。譽。兩。說。均。有。理。由。未。知。孰。當。要。之。亦。一。趣。聞。也。

又。聞。張。勳。所。棄。之。武。裝。汽。車。由。辮。子。兵。於。今。日。十。時。餘。開。至。天。壇。存。放。前。面。玻。璃。已。被。流。彈。擊。毀。

京。奉。京。漢。京。綏。三。路。線。自。十。三。日。早。起。各。次。列。車。照。常。通。行。出。京。旅。客。較。前。三。日。減。去。四。分。之。一。各。車。站。均。高。懸。五。色。國。旗。

新。華。門。內。之。無。線。電。台。十。三。日。早。揭。出。五。色。共。和。旗。幟。

前。門。外。大。柵。欄。廊。房。二。條。仍。將。柵。欄。門。關。閉。廊。房。頭。條。行。人。往。來。如。蟻。各。鋪。商。均。仍。閉。門。不。做。生。意。

自。前。門。至。天。壇。往。觀。辮。兵。者。不。下。五。六。萬。人。惟。辮。兵。在。天。橋。一。帶。遊。逛。無。異。昔。日。之。凶。惡。醜。態。第。三。師。駐。紮。西。珠。市。口。天。橋。及。先。農。壇。等。處。有。第。十。二。團。之。第。一。二。三。三。營。機。關。鎗。一。架。

本日處槍林彈雨中傳來消息言人人殊。惟其大致證諸目睹者。自不盡誣。茲取某新聞記者所調查之稿錄之。雖東鱗西爪。比而觀之。當時慘狀。不啻身臨前敵矣。

共和軍攻擊張軍。自上午三時起。至下午四時止。其情形探錄如下。

● 共和軍在城下駐紮者。各城門皆有。其軍隊有第一師第四十二團。第三師第二十師。混成第一第二兩旅。第二十九團。第二第三兩營。近畿第一旅第十三師第一師等。事先均已預備妥協。均於同時分往各城門攻入。

● 上午三時。槍聲初響。係在南方。多謂係攻打駐紮天壇內之定武軍。至晌午時。南方槍聲漸止。內城槍聲大作。此時共和軍已羣趨南池子一帶。攻擊矣。據聞定武軍駐紮壇內及南池子者。不過三四營。共和軍入城者。其大數雖不可舉。要與定武軍比較。約可多數十倍。是以戰時未久。旋即投降。

● 聞張軍投降原因。亦非實由力不能支。因有各國公使出為調停之故。

● 下午四時餘。停戰後。聞張勳逃在荷蘭國公使署內。共和軍與定武軍互有死傷。共和軍死者較多。

● 開戰時。交通阻隔。行人不便。有人至前門外珠市口。

一帶。惟見珠市口至虎坊橋及香廠等處。共利軍填街滿巷。皆是。●香廠仁民醫院。高樹紅十字會旗。陸續搭入傷兵不少。●下午一時餘。城內火起。云是南池子張宅被焚。延至二鐘時始熄。●聞第一舞台第三層樓上。共利軍皆架有大礮。西珠市口一帶。居民受驚極重。●當雙方開仗時。城外電話局。尙能照常通話。東城之電話。則不能通。據電話局人云。東城電話機器。安設在樓上。游彈時。飛入司機。生不能上樓。接電其實。電線並未傷損云。●聞東交民巷有外國人六名。出界觀戰。致被流彈擊死。不知確否。(參觀前節)又大李沙帽胡同某洋行。死外國人一名。六國飯店死薙髮匠一名。●中國人之無辜致命者。蔣家胡同西口外某烟捲公司。門前死行路人一名。又十間房某粮店。死騾子一頭。均被流彈所擊。●玉皇廟小飯鋪。師徒二人。均被流彈誤傷。●聞東城燈市口甘雨胡同居民。因傷致死者極衆。响午息戰。由巡警督移死屍。●東安市場被土匪乘勢劫掠。德勝門大街亦。有被掠者。●朝陽門內外居民。被流彈擊死亦多。●第一師兵丁入安定門。經。

過北新橋。土匪乘機搶掠。計被搶者。北城北橋瑞興隆布鋪。土兒胡同廣德堂藥鋪。郭宅。花枝胡同門牌一號。繼宅。花梗胡同周宅等數家。東城羅圈胡同鄭丹忱宅。及某藥鋪。亦被搶。土匪由兵士擊斃二名。●各軍隊兵士均臂纏白布一道。●晚五時。共和軍由彰儀門退出者。爲數頗衆。有人探問云。退至蘆溝橋及彰儀門外附近一帶。●南苑飛機兩架來京助戰。在空中盤旋有頃。聞曾拋擲炸彈。●南城一帶得保秩序。巡警爲力居多。本日有義勇隊守大街巷口甚力。故宣武城南未被搶掠。(參觀前節) ●定武軍一部分與共和軍在景山開仗。因未得勢。出西直門乘京綏火車逃走。

戰事詳誌(可與前幅參看)

(一)天壇之戰 十一日晚十一點。第八師及第十六混成旅先後由豐台開拔。於十二日早兩點抵右安門。係游緝隊守城。堅不開門。馮司令玉祥大怒。遂派隊登梯。魚貫而入。將門大啓。十六混成旅及第八師相繼入。均逕至先農壇。與第三師第二

十師聯合圍攻天壇。至早四點半。開始用礮攻擊。至九點。張軍不支。由天壇樹立五色國旗三面。派出幫統及機關槍連長。前來乞降。經張王馮吳諸司令。稟明東西路司令。允准給與三個月餉銀。繳槍遣散。因款尚未由津運來。故降軍尙未完全繳械。是夜。各軍仍在原地露營。作戰鬪形勢。嚴密警戒。以防不測。聞款運到後。卽將天壇降軍分數起開往永定門外。一面點名放餉。一面收槍遣散。立時由火車運送回籍。十三日。已撥餉繳械。實行遣散矣。並聞其幫統及機關槍連長乞降時。神色慘淡。淚若泉湧。並大罵張勳。康有爲。雷震春。不止。

二二張軍之防禦計畫。此次戰鬪。由兵員之數而論。張軍不過四千。共和軍實有六萬五千。能防戰一日。亦云足矣。增大防禦線。浪費兵力。非所以堅固陣地也。故張軍防禦。僅自中華門起。周繞皇城一週而已。然僅天壇一處。卽置二千四百餘名之兵者。實欲阻止共和軍由永定門入城也。於城內先置機關鎗二架。於正陽門上。以備共和軍。由前門大街出入。於中華門配置步兵百五十名。於西單牌樓西長安街

東華門備機關鎗二架。兵卒百名。於張勳宅備兵一營。於南池子口及其他之小門。亦置二十以至三四十名之小部隊。與機關鎗一架焉。

(三)正陽門外之戰 正陽門外之共和軍。原爲第三師之一旅。及混成第一旅。合計約在一師以上。午前五時半頃。開始攻擊。惟正陽門上。可以一直瞰射前門大街。若欲由城外濠溝進攻。亦不免暴露全身。於是編作梯團。每團約二百名。內外次第進迫門下。續行攻擊。殆及數十回。均全歸無效。嗣正面攻擊失敗。乃迂迴左右之濠溝。由側面突擊。復因機關鎗之激射。不克攻進。及張勳逃走。敵兵退散。該門始歸共和軍之手。聞張勳兵在該門。所以敢如斯倔強抵戰者。實係背後之前門。爲美國兵所守。備攻擊軍。不能以大砲實行破壞所致也。

(四)中華門之戰 共和軍因不能卽下正陽門。不克由正面進行攻擊。乃由阜成門入城之混成第一旅第二旅(第二十師之一旅與第三師之一旅新編爲混成第一第二兩旅)之一部。與第十三師之一部。取道西交民巷。開始攻擊。不能陷落。

至午前十一時前後。殆將占領。繼由天安門方面之張勳兵來援。遂不得已而復行退却。

(五)東華門之戰 第一師之一旅由安定門入城後。卽由官房大院方面出北池子而南下。自午前五時數次猛烈突擊。因東華門之機關槍正面激射。同時景山之砲兵復由頭上瞰射。均不奏何等之效果。

(六)東安門之戰 第十一師之四十一及四十二兩營。第十二師之四十五四十六二營。由朝陽門入城後。卽至王府井大街攻擊東華門。東華門之敵兵以機關槍繼續猛射。景山之砲兵復由頭上瞰射。該軍甚陷於不利之狀況。聞營長趙雲亭陣亡。軍士死傷者亦多。嗣該軍一部告奮勇者每名賞洋五十元。凡得二十四人於東華門之南方。陰迫皇牆。對於張宅穿穴。置槍應攻擊之。工事然敵前屢被防阻。遲遲進步。適爲張勳逃亡之時。張之中軍監某以爲張既逃走。卽繼續戰鬪。亦無意味。乃令衛兵傾洋油放火。而宏壯燦爛之張宅。遂歸烏有矣。當未放火前。中軍監准殘留。

宅中之僕婢各自尋路逃走。並將此意傳知全軍。嗣後依然繼續戰鬪者。由於中軍監之命令。尙未傳播各方故也。及張宅火起。敵軍之幹部逃走。攻擊該處之軍隊始獲占領云。

(七)西安門之戰 攻擊西安門之軍隊。卽由德勝門入城之第十三師一旅。及由阜成門入城之第一與第二混成旅一部分是也。該處亦暴露於景山砲兵陣地之瞰射下。復有機關槍之猛射。攻擊甚難。進步終未克占領而止焉。

(八)長安門之戰 攻擊軍爲第一第二混成旅之一部。及第十三師之一部。與攻中華門之軍相同。卽該隊攻擊長安門不勝。轉攻中華門。中華門難陷。復轉攻長安門。雙方均不奏效而已。

(九)砲兵之戰 攻擊軍之砲兵陣地。初在彰儀門之南方。有山砲四尊。月壇有野砲六尊。安定門內合山砲野砲有十六尊。彰儀門南方之砲兵。專注重攻擊天壇及長安門方面。月壇之砲兵。則專注重攻擊景山。最奏效果。安定門內之砲兵。攻擊景



山東華門及張宅效力稍微。至午前十時前復置山砲二尊於絨線胡同。甚行發射。然效果亦甚微。聞各砲兵故意擊射皇城者。實欲使外人驚其威武也。

十三日即二十五日。戰事既告停止。聞駐京列國公使。應公使團主席荷蘭公使之招特。於今日正午。集會於荷蘭公使館。在荷蘭公使邀請各公使之初意。願欲協議處分張勳問題。孰知協約各國公使。均以張勳與敵國人有關係之證據。昭然若揭。咸抱不快。且以張勳不入協商國公使館。協商國對渠不能負何等直接之責任。即讓一步而言。假定張勳已入東交民巷之民家。則協商國雖應負間接之責任。但已入中立國公使館。則協約國對之自無須講何等之手段。張勳處分問題。於是告終。結次乃協議對於新內閣應執如何之態度。均謂張勳因與德人關係密切。始有此。次內亂之勃發。證以此理。則中國參戰由中國本身而論。誠可謂爲最有利之政策。新內閣之承諾與否。當先問其對於參戰之態度如何。要之。荷蘭公使欲極振手腕。盡仲裁之役。而賣列國大失面目。關於張勳全任中國政府與荷蘭公使交涉列國。

當取旁觀之態度云。

前午戰事停息。南河沿附近駐紮之辮子兵二百五十名。由京師警察廳收容。又駐紮天壇之該軍。已依其要求。給餉三月。將武器收買。作爲解散費。聞昨日實行後。卽將其武器送到南苑保管。至於軍官六十名。兵士千餘名。已將一部分搭京奉軍遣回原籍。殘餘者尙駐先農壇。受第三師之監視。又清宮城內。尙有張軍一千餘名。其安置方法。尙未議決。大約與天壇同一辦法。給賣解散。亦未可知。

段氏決將根底覆滅。張勳之勢力。擬將徐州之殘兵四十營。並駐紮浦口。蚌埠。各軍全行解除武裝。如彼輩不肯。和平解除武裝。斷然訴之以武力。現已令山東兗州鎮守使施氏。如遇必要時。卽應當討伐徐州之任。又在浦口與蚌埠之定武軍。均應馮國璋氏辦理。以遂前項目的云。

誌助戰軍隊之勇敢。昨日午間。共和軍進攻南河沿張宅。係第一師由朝陽門進城。勢甚猛烈。聞施放大砲時。張宅卽着兩砲。大辮非常惶恐。決計逃脫。又有多數義

勇隊與共和軍。在長安街一帶。共同助戰。逼攻天安門。異常奮勇。午前十一鐘許。張宅被燬。係該義勇隊於戰事。進行之際。乘隙拋置燃料。剿除巢穴。（按此說與前節所載係張勳臨行時。自焚其宅。微有不同。姑并誌之。）又張宅將着火時。義勇隊在宅中查出原封子彈一箱。當卽由共和軍抬至步軍統領衙門存儲。又該隊恐火勢蔓延。波及左近民房。特呼警士。亟招消防隊前往救熄。

聞討逆軍總司令段氏。本擬於今日午後四時赴京。屆時新舊車站嚴行警戒。預備火車二十餘輛。隨員衛隊一律乘車。段氏由東車站乘車。楊以德等在站送行。已開車後。段氏至新車站。忽又下車。卽時歸宅。未知何故。

得公府確息。今日早公府指揮使徐邦傑上將。赴日本公使館慰詢黎大總統。當邀黃陂接見。略問十二日共和軍攻擊張軍之情形。而外。並謂速將府中一切公文要件。及文武在職大小人員姓名冊。辦理清楚。以備移交馮代大總統。表示個人不回任之決心。徐氏雖進勸言。黃陂立意甚堅。不肯再回公府。徐氏只得唯唯而退。

討逆軍西路司令曹錕。於今日下午一時。乘京漢路火車來京。當時有第三師馬步隊在車站警衛。並將前門交通遮斷。約有三十餘分鐘。聞曹錕抵站後。即乘汽車進城。在東城十二條胡同劉宅。作爲行轅。

昨日戰事猝生。殃及人民。外人爲流彈負傷者亦有之。茲聞曹汝霖受段總司令之命。於今早訪謁日本林公使。關於日兵負傷之事。代申道歉之意。更赴法美等公使館。對於兵士僑民受傷之事。一一道歉云。

雷震春張鎮芳日前在豐台被共和軍拘捕。茲聞今日西車站有共和軍兵士約四十名。將雷張二人押解來京。即送至東四牌樓憲兵學校內看押。

戰後觀察紀 大戰之後。必多可紀之事。作新聞之資料。特於今晨馳往戰地。視察一切。先到前門。其景况與前三日大不相同。工人正搭木架撤換大清門。辮子兵無一人在焉。惟血跡與包子彈紙滿地。南河沿至天壇前門居中。勢甚衝要。兩軍開戰。在所必爭。無怪然也。而各界人等往觀者甚衆。自天安門南至天壇。形同流水。道爲

之塞。共和軍則分守於前門內珠市口。及天橋東西各要地。且有紅十字會與馬巡軍隊等往來其間。市面雖已恢復。尙未完全開門貿易。惟商戶一無損害。故無驚慌情狀。足見吾國軍隊戰爭上之進步矣。至天橋附近。見有三五成羣卸除武裝之辮子軍。或在茶棚飲茶。或在鋪戶買物。惟所買者便草帽居多。甚有一人買四五頂者。想係爲剪髮後之預備耳。過天橋卽見先農壇牆上有共和軍伸首遙望。隔苦千遠一人。約有數十人而對峙之。天壇則無一人形影焉。但見牆壁許多槍痕。牆頂之上瓦爲之折。或穿或洞。至天壇大門則更甚。門右之房側有血跡。想係小商人中彈而死。就埋於此。門左之小偏門。定武軍出入焉。大門內支搭仗棚。辮子兵等空手往來。各自爲謀。意甚索然。其狼狽情形不可言狀。有共和軍隊持槍挾彈。進壇監視。或爲探訪。亦有遊覽者。且有西洋人等乘坐汽車。并載照像器俱進內。照像惟普通人往觀羣圍於門外。此去彼來。幾無隙地。大有四月二十五日儲蓄票開彩之景况。但不能入內耳。門外每一辮兵卽圍十餘人。或數十人。聽該兵等之言論。大概皆以怨恨。

張勳之詞會聽一兵言李淵勸將之故事惟言談和藹迥非昔比垂頭喪氣轉爲可憐亦足見該兵等之苦衷矣又有在門外買器具者曾見一辮兵賣二柳條筐得銅子十八枚彼復言亦要賣鍋想該兵等知必遣散故預先變賣耳旋由壇內抬出一新靈柩後有十餘辮兵跟隨向西南過先農壇東北角而去想係下級軍官陣亡者至於先農壇方面有多數共和軍荷槍守門無一人前往觀看遠望之亦無槍痕等事說者謂辮子兵自共和軍攻擊後並未反擊卽爲投降不知確否子午砲一響復轉進城直奔南河沿張宅焚燒之狀況慘不忍睹但未燒及民房亦一幸事橋後有辮兵死屍數具體已澎漲尙未掩埋擊斃之馬仍繫於樹上打破之汽車傾覆於河內對張宅門之牆鑿有穴洞共和軍之大砲由此攻擊甚爲得力而辮子兵等不知何往沿途之要口均爲共和軍嚴守而已至此饑渴並作力不能支遂乘車而返云

中國紅十字會天津分會派第一醫隊於本月七日至豐台以來連日內外兩科療治施醫施藥每日軍人來會掛號者不下百餘名外有住本會車上傷病軍人三名

故醫長以至救護生。異常忙迫。現因第二醫隊由津出發。已到豐台。第一醫隊於十二日由豐台開赴北京。調查兵士有無疾病。以盡慈善之天職。

前日戰事發生後。安定門內已有土匪搶掠。茲探真相。係是日上午四時餘。陸軍部衛隊在寬街施放機關槍。向皇城攻擊。該隊留守之兵。出而搶掠。人數三五不等。土匪尾隨於後。凡稍整齊之商家。咸被搶掠。五鐘餘。游擊隊出而彈壓。該兵匪等始稍斂跡。該兵等行劫時。均將肩章領章撤去。臂纏白布。有玷共和軍名譽。實甚第一師馬隊數名在交道口拿獲該兵三名（中有一名負傷）押出安定門。聞已槍斃矣。

前門外大柵欄廊房二條。珠寶市布巷子等處。商家因辯子兵雖已投順。而國軍尙未退出。於是不敢放心開門營業。並將巷口柵欄緊閉。由商團持槍把守。以防不虞。

段總司令因各路軍隊攻擊逆軍時。砲火之下。難免殃及無辜平民。故於日昨已電令步軍統領江朝宗調查遭難人民數目。以便酌給撫卹。

國軍於日前停戰後。大隊多屯集於香場地方。是晚該軍人等有不欲露宿者。乃將

香場附近蓮花河各下處之妓女。一併驅走。該兵等卽就下處內住宿。所有器皿被褥。概皆佔用。不准妓女等攜出云。

今日商民人等多至天壇永定門等處觀看戰跡。因而前門大街兩旁便路上。行人摩肩擠背。頗形衆多。及至正午十二時。正陽橋迤南之行人。忽然紛紛狂奔。於是影響及於大衆。莫不隨之亂跑。斯時珠市口地方。尙有國軍一隊。正在休息。見行人驚奔。不知何故。急擎槍鎮懾秩序。始定比聞行人驚擾之故。因西車站迎接曹錕之兵。忽然遮斷交通。遂致行人誤會。最可笑者。大街之巡警。亦皆隨衆奔跑云。

又下午一時餘。有方玉祖者。行至菜市口鐵門地方。忽遇曹錕部下馬兵二名。將方某扭入一小鋪內。由身上搜去銀表一個。掖入袋內。方某吝不肯與。一兵乃以槍相向。方某恐甚。該兵等遂將銀表刮去。並聞東安市場內亦有兵向商店勒借財錢之事。

天壇內辮子兵已皆一律繳出槍械。俟遣散費發下時。卽可離京。聞該兵等今日在



天壇外將營中零星物品米糧等悉行變賣。一班小負販等皆携資往購。頗有爭前恐後之概。

今日總統府內之五色國旗。又翻飛於新華門內東土山上。其他軍警各機關以及商鋪亦有將共和國旗高揭門前者。茲聞警察廳因各商鋪雖有揭掛國旗者。然尙未一律。故於昨日已令各區署傳飭商家一律懸挂。

討逆軍總司令於今日由天津派來警察衛隊約二百名。於下午六時抵京。卽開往國務院駐守。並聞段氏有於今晚乘專車來京之消息。

昨日共和軍攻擊皇城内定武軍時。天安門前之交通隊巡警。因在砲火之下。遂避入中央公園內。及至停戰後。其同人等四處查找。竟無蹤跡。嗣後乃由亂草中將該警士等尋出。然已面如土色矣。

京師內外城各商鋪。因戰事雖已停歇。而地方仍在戒嚴。遂致該商鋪等今日尙不敢開門營業。茲聞警察總監爲恢復市面原狀起見。昨已通知各區署長督飭巡官

警長勸令各商鋪照常開市營業。

聞通州忽有兵變。因駐紮該地之軍隊。日前傳聞北京城中有戰爭發生。軍心因而動搖。整裝持械。勢將搶掠。該長官無法抑制。遂與商會商議支撥三千元。分給各兵。以免譁變之虞。

昨晚八時餘。警察廳方面。突有槍聲響亮。人皆疑有變故。該處軍隊。當時亦皆施行警備。及加調查。係辮子兵在警察廳繳械。有故意將槍機損壞者。當時一兵未將槍內子彈取出。及將槍投擲於地。彈即射出。幸未傷及他人。可謂惡作劇矣。

當戰訊緊急時。旅京者紛紛離京避亂。現在大局已定。段總理今亦來京恢復政局秩序。不料一般旅京人士。竟信無稽之謠。仍復整裝搭車。出京者頗形擁擠云。

十四日即五月二十六日。戰事完全終結。討逆軍總司令段芝泉氏。準本日抵京。上午十時頃。步軍統領衙門及京師警察廳。特派軍警前往東車站嚴重警戒。一切至十一時四十分。段氏專車徐徐抵站後。率同丁士源曹汝霖徐樹錚湯化龍張國淦

許世英葉恭綽等下車。卽乘汽車歸私宅。當時前往迎迓者。有江朝宗吳炳湘王士珍曹錕等百餘人。頗極一時之盛。

帝制已亡。民國復活。段芝泉已於今日抵京。聞日本公使林男爵以黎總統已無危險之可慮。無久住使館之必要。特於昨夜張盛筵爲黎總統話別。當時與筵者日本公使館館員。駐京日本陸軍各隊長。及青木顧問等。頗極一時之盛。至今日午後二時。江朝宗親詣日本公使館迎迓黎氏。黎氏深謝日本之厚意。卽與江朝宗驅車返東廠胡同私邸。常黎氏出日使館時。館員均送至門。林公使復令青木顧問船津書記官與江朝宗同行。送至黎氏私邸。以表鄭重之意。

討逆軍總司令段氏抵京後。於下午三時餘蒞將軍府。傳集東路司令段芝貴。西路司令曹錕及其他各高級軍官。籌議軍事善後辦法。聞自本日起。到國務院視事云。民國回復。內閣急待成立。日前喧傳段總理在天津所擬定之內閣員。聞除汪大燮之外交。張國淦之農商。曹汝霖之交通。決意就職外。如湯化龍之內務。梁化超之財

政。已。聲。明。不。就。至。范。源。濂。之。教。育。亦。去。就。不。明。據。聞。財。政。已。擬。熊。希。齡。若。熊。不。願。就。則。由。段。總。理。兼。任。內。務。有。擬。田。文。烈。之。說。至。陸。軍。則。或。屬。王。士。珍。抑。由。段。總。理。兼。任。尙。未。一。定。總。之。在。此。二。三。日。內。當。可。決。定。但。欲。成。立。完。全。之。內。閣。一。時。頗。難。辦。到。聞。南。京。馮。代。總。統。尙。有。斟。酌。云。

又。聞。段。芝。泉。抵。京。後。曾。於。午。後。二。時。親。訪。林。公。使。於。日。本。公。使。館。道。來。京。之。旨。趣。且。對。於。日。本。兵。之。負。傷。表。示。歉。仄。之。忱。

久。聞。南。方。民。黨。及。國。會。議。員。不。慊。於。段。總。理。之。行。爲。并。不。滿。於。代。理。總。統。馮。氏。故。渠。等。會。議。所。提。出。之。條。件。與。馮。段。所。持。宗。旨。頗。有。出。入。其。最。要。一。節。卽。取。消。優。待。清。室。條。件。是。也。茲。將。津。滬。兩。處。議。員。宣。言。通。電。備。列。亦。復。辟。告。終。後。之。要。案。也。

### 記旅津國會議員宣言之綱要

此。次。變。故。猝。生。帝。制。復。活。民。國。幾。絕。幸。經。討。逆。軍。四。方。並。起。聲。罪。致。討。逆。氛。立。消。民。國。重。光。先。是。旅。津。國。會。議。員。迭。次。開。會。討。論。救。濟。時。局。問。題。以。定。鞏。固。邦。基。之。策。茲

聞旅津議員宣言之綱要如左。

一取銷優待條件。二嚴辦逆黨。三尊重約法。四國會自行集會。五依法組織政府。六創立共和神聖軍於京師以固國本。七解散附逆之各機關。

### 記旅滬國會議員宣言

北京黎大總統南京馮代理大總統天津段前總理上海伍外交總長程海軍總長南甯陸巡閱使南京南昌長沙成都廣州南甯雲南貴陽督軍省長廣州李軍長各省議會熱河姜都統暨各報館北京天津漢口各報館公鑒。中華民國之組織本於臨時約法。約法之存廢。卽民國之興亡。曩者袁世凱之亂國。固不特稱帝而始。彰當其消滅國會變更約法叛逆之罪。卽已成立民國之實質。固已覆亡矣。今次國難發端於一年以還之徐州會議。釀成於段內閣時期內公民團之圍攻。議會以及督軍團之干涉。憲法要求解散國會。當時政府不能依法爲相當之處置。致使紀綱掃地。亂黨橫行。共和之存亡。又豈俟復辟而始著耶。則至於叛將連兵公然入寇。設僞總

參謀處於天津。或則主張復辟。或則別圖擁戴。而皆以破壞約法解散國會爲第一步。張勳乘之迫脅總統。遂其逆謀。試問叛國亂政。至於此極。雖復辟之事發生。猶得謂之爲共和國乎。是共和之亡。乃起於叛軍之造反。而終於張勳之復辟。雖有辯者。莫能諱飾名義上之民國。亡於復辟。旣已全國震怒。聲罪致討矣。實質上之民國。亡於毀法。則依違苟且。忍與終古。或且主張召集各省代表。臨時參議院等。非法機關。以爲調停之計。夫調停之義。適用於政治問題。猶可說也。而乃破壞國家根本大法。以爲之。則今後國家之法律。猶能發生效力耶。法律永遠無效。國家猶可爲治耶。夫復辟之逆謀。旣由於破壞法律之結果。則今日部分之收拾。決不能解全局之紛擾。自今以往。非完全回復約法之效力。則民國將永無正當統治之機關。蓋中華民國完全以約法爲基礎。破壞約法。以言民國。猶之擁戴君主而言共和。復辟之與亂法。其事相等。厥罪維均。若解決不得其本。則禍亂將無底止。欲求護國。當先護法。謹本斯旨。決定主張。宣示如左。幸垂察焉。

一解散國會命令。違背約法。當然無效。厥後黎大總統既失自由。且無合法國務員之副署。江朝宗等在法律上無國務員之資格。所有任免國務員。及一切命令。均屬無效。嗣後國務員之任免。及一切命令。非依約法。不能承認。二優待條件。係因清室退位。表示民國寬大之意。且經前參議院議決。今清室既敢僭位叛國。當然失其被優待資格。其應如何辦理之處。當由國會議決。三凡主張召集各省代表。再開臨時參議院。另組憲法會議等議。均屬根本破壞約法。絕對不能承認。四國會尅日自行集會。五復辟叛國及前此倡亂毀法之禍首。一律依法嚴辦。

衆議院議長吳景濂參議院副議長王正廷暨駐滬兩院議員謹啓。

記模範團戰鬥之經過（即中路司令陳光遠之軍）

（一）步兵二營。以掩護本團礮兵及援助十三師步五十團之任務。於午前四時抵新華門西端。此時敵人占領天安門。已與我第三師礮兵對戰。四時三十分。我礮兵（野砲二尊）亦放列於新華門東端。開始射擊。即命五八連掩護礮兵。六七連佔據

新華門東端援助攻擊

(二) 敵人抵抗甚力。我砲兵以距敵過近之故。變換陣地。於財政部東南端。步二營全營亦遂至六部口中掩護。並分防該巷通敵之要路。我砲兵遂爲激烈之射擊。奏效甚偉。旋命各連相機前進。五連進至汽水公司。六連進至花園。七連進至石碑胡同。援助十三師五十團。暨近畿第一旅射擊敵人左側。八連仍在原地掩護砲兵。午後三十分。本團山炮二尊。附步兵第十連。同來援助。卽時佔據警鐘台西北端空地。放列施行偉力之射擊。

(三) 五十團及近畿第一旅。得我砲兵之援助。前進甚速。於午後一時三十分。已進抵西三座門。攻擊甚利。斯時敵人。以受我砲火損傷過巨之故。已漸次退至端門午門。我砲兵卽改換射擊目標。敵人復退聚中央公園之土山。

(四) 本日與我對戰之敵人。約步兵三營。山炮若干尊。其戰鬪結果。甚屬不利。至午後二時三十分。除死傷外。已盡數投誠。繳還武器。計其死傷數約百餘名。我營卽集



合於西長安牌樓附近。停止待命。並令八連任該地一帶之警戒。

(五)步三營第九連爲輸送隊。

(六)步一營警戒區域。由三道門內至內西華門一帶。附機關槍四架。

(七)步三營警戒區域。由三道門外至外西華門一帶。及西石庫等處。機關鎗二架。

(八)機關鎗連警戒地安門附近。

(九)工兵警戒五龍亭。及黃城西夾造。附山炮一尊。

(十)輜重警戒北柵欄一帶。

(十一)騎兵第一連派充偵探傳騎。

(十二)騎兵第二連值本團衛兵。

(十三)本團內軍官士兵並無損傷。

(十四)因補充子彈。被流彈致傷伙夫二名。

討逆軍各路司令。於本日派兵在城內外各衝要街區。遍貼通告安民。並詳述張勳

之罪狀。及共和軍隊保護商民之辦法。各處商民。前往閱讀者。幾有爭前恐後之勢。觀畢。莫不痛罵張勳。

京中各界。自十四日起至十八日止。懸挂五色國旗五天。祝賀民國復活。及歡迎段總理來京。

中交兩行鈔票。忽有無限制兌現消息。其行情較昨日每元驟漲銅幣八枚。

宣統於昨早三時頃。同瑾瑜兩太妃密往後門醇親王（即宣統之本生父）宅中避難。行蹤極密。故外間知者絕少。

警察廳以城內外各商家。仍未啓門營業。深恐居民多懷疑慮。特於十二時飭警往各街傳知各商人。限卽時啓門。照常營業。如有他虞。警廳擔負完全責任。各商家不得已。只可遵令照辦云。

辦兵投降共和軍者。綜計二千八百餘名。均領三個月餉銀。（每人現洋十八元）昨日夜間十一時。與本日午間十二時。開專車二次。派兵押送出京回籍。其餘一千餘

名仍在警察廳內候領餉銀。大約明日必可出京云。

直隸督軍兼省長討逆軍總司令曹仲珊中將。於昨日午後抵京後。即派中級軍官四員。分往第三師駐在地慰軍。並擬於今日將個人薪俸銀及稽蓄金內提出一萬元犒賞本師軍隊。藉示慰勞之意。

張鎮芳雷震春由天津解至北京。送交憲兵學校看管。茲聞軍界人等對於張雷深爲憤恨。多主張逕由軍政機關宣告死刑。即日鎗斃者。內有重要軍人從中調停設法轉圜。擬條陳於段總司令。略謂張雷等犯主張復辟罪大惡極。固爲約法所不赦。然克復北京。戰敗辦兵。軍士不顧生命。勇敢善戰。實屬可嘉。亦應格外獎勵。以鼓士氣。但現在財困難情形。已達極點。政府難爲無米之炊。而張鎮芳等頗饒資產。若將助逆之罪。折爲罰金。彼等尙肯捐輸鉅款。以便應用。以之犒賞各軍出力將士。兵爲一舉兩得云云。此說能否成爲事實尙不得知。

東安市場各商鋪。因共和軍攻擊東安門時。市場內流彈如雨。該商鋪等因避危險。

起見。遂皆逃避一空。現在市場雖已開門。其中僅有菓攤兩處。及茶樓一家而已。其餘多數商鋪。俱用木板將門由外面釘閉。其一種蕭條景况。殊難寓目。聞場內看守人云。恐三五日內不能復業。

昨日下午四鐘餘。炮煙彈雨。甫經歇止。乃前門外草廠二條胡同。有著名土匪馬某。竟向本巷陳姓家勒借現洋數百元。當被陳姓拒絕。該匪竟敢大聲喊囂云。若無洋錢。晚間即帶人來放火燒房等語。不料恰有巡官帶同巡警巡邏至此。立將該匪帶往區署辦理矣。聞該巷住戶。聞該匪有放火之宣言。日來頗爲耽憂。

清帝因驚致疾。清帝因日前共和軍與定武軍在城內交戰。異常驚恐。遂於次日午後因受驚恐患病。內務府敬事房當即傳知太醫院院長李崇光。御醫周立桐進內請脈診治。

日前共和軍圍攻辮子兵時。各處電綫被損壞者甚廣。故經電話局於停戰後。即派工人趕速修理。聞該局估勘此項修理工程。須需時一星期。始能工竣。

中國銀行因準備金缺乏。故藉戰事停止兌現。改付銅元票。遂致銅元票價跌落至七折。甚有拒而不用者。現在復辟問題已歸武力解決。惟各種紙幣。於市面上兩三日來。仍無價值。

辦子兵前在各處設置之戰壘。現仍堆積街表。殊不雅觀。且屬妨害交通。故經警察廳。昨已令各該區署長督飭清道夫。立將此項障礙物一律祛除。以利交通云。

辦子兵談戰況。日昨下午一時。餘繳械投順之定武軍一千九百餘名。由警察廳督察長錢錫霖提署左翼偵緝隊長田政臣等押送出京。該兵等仍服其藍色軍衣。髮辮猶在頭上。內有一面部負傷者。記者乃向其詢問當日戰況。該兵答云。是日隨蘇統領在天安門上。與西南方面激戰。炮火最烈之際。忽有吳總監者。親向蘇統領力請息戰。統領不允。吳總監一再爲商家百姓請命。統領始下令停戰。而我面部即在停戰時所受之傷云云。語竟其神色似仍倔强不服云。

調查戰况得獎警察總監吳炳湘。因保安馬隊巡警二名於十二號奉派馳往各戰

線內調查交戰狀況殊屬奮勇可嘉故於日昨批令本隊長給予該巡警等現洋每名五十元以作獎勵云

人之生死由命東四牌樓燈草胡同路北居住敵友房後某姓家十二日因聞槍炮之聲可就怕在心裏了急將棉褥覆在八仙桌上四圍均用棉被攏好一家四口攢在底下躲避詎意飛來礮彈打在該家住房漏下落在八仙桌上於是全行斃命豈不慘乎

川田醫院妙術救人張逆冥頑拒絕和平解決致令北京有市街之慘戰聞當時市民遭意外之厄者甚非少數日本醫院大發慈悲盡力救護昨日特往東單牌樓二條胡同川田醫院調查所收容之負傷者內中有一居住禮士胡同之胡太太（三十三歲）受傷最重蓋該氏適妊娠九月常在臥榻是日礮彈突落院內爆烈有一大破片飛入屋內貫該氏之左足復貫通右足大腿而彈去右腹部之肉其貫通創口深及寸餘腹部之創口深及寸餘腹部之創面寬約二寸長約三寸餘深達腸壁

相差僅一分即傷至腸中幸未命中動脈靜脈故負傷雖重尚未即時殞命但妊娠九月如下此胎兒則其生命亦異常危險故該院醫師以精細週到之療法幸告成功現在創口之經過既極良好胎兒亦復安全云  
當發表帝號取消問題尙未明白此事益不應取特別形式即與民國成立同時視爲消滅云

按此問題如以清廷上諭取消自屬清室自討過錯不若由清室咨請民國大總統以命令發表取消之爲得也

又聞清室因優待條件是否繼續有效尙未得民國之承認故遲遲未實行發表取消帝號然於實際上則取消已一星期矣故此舉於今日已成問題但總統來京內閣成立則復辟幻影可視爲完全收束

此次復辟世人但知張勳康有爲主張而不知暗幕中實有某鸞壇之促發也鸞壇向爲避俗諸遺老所迷信張勳每月必着人來叩求復辟之吉凶鸞壇判語無不大

吉張以是遂有決心。陰歷四月，康亦往問復辟時期。鸞判落梅時節，又逢君康以古詩有江城五月落梅花之句，密告張勳，遂決於五月舉行。康進京時隨行之王乃徵沈曾植，皆鸞壇高弟子也。陳曾壽亦系鸞壇中之文牘主任。復辟是非姑置勿論，乃竟陰錯陽錯，乞靈於神巫之手。康聖人讀書萬卷，足跡幾編全球，乃亦如此迷信之舉。國家將亡，必有妖孽，殆謂此也。

頃見有滑稽之文書一則，雖非事實，然亦張逆所應有之惡聲也。茲錄其文如下：  
定武軍同人與張勳書

大帥麾下同人等從大帥有年，所敬服者。大帥之爽直勇敢，超越衆人也。近雖主張失敗，然決非大帥之過。同人深諒之大帥，既屢次拒絕調停，宣言以死自誓。同人不敢願從其後，故雖有勸降者，同人皆未之許。不料大帥竟於昨日開仗之時，逃出戰線，入使館界內，求外人保護，愛惜生命，自背初衷。同人方不敢信，今日聞街市徧傳，似非虛語。同人等羞慚無地，蓋因我輩以大帥爲豪傑有爲之士，乃大帥竟成爲婦



嫗貪生之人也。當大帥之逃難時。同人等尙持槍力戰死亡。枕藉所以酬大帥之志也。乃大帥竟委棄同人於戰場之中。而先逃避於戰場之外。爲統帥者應如此乎。大帥對於死傷之人。不知愧於心否。且既有今日。何必當初。嗣後又何必拒絕調停。屢次宣言誓以身殉。吾輩前以大帥爲項羽。爲文天祥。爲史可法。今而知大帥乃係一反覆無常。欺詐無信。怯懦無勇。醜顏無恥之衣冠敗類。心肝爲狗彘所不食。人格爲魚鱉所不如也。同人與大帥約。大帥如肯以身殉君憲。仰藥自裁。尙不失爲晚節之丈夫。倘厚顏偷生。同人將乘機以七首彈丸。贈諸大帥。因同人素愛大帥。不能不促大帥就義也。殘餘定武軍人同啓。

探聞張勳於十二日開始戰鬥以前。曾致密電徐州本部。其大要謂我兵鮮少。形勢不和。竟不敵攻擊軍。故予擬由北京脫出。經過津浦鐵路。或經過河南回徐。再整齊兵隊。捲土重來。以期貫徹當初之目的云云。由此觀之。其十二日戰中逃入荷國使館者。所有預定行動。不難推斷也。

張勳逃入荷使館。遷入德兵營一事。協商國因對渠毫無同情。現聞張勳頗爲不安。正擬潛行逃走。

戰後對於張勳種種消息。有足表示中外人士之心理者。特彙錄之。

張勳戰畢後。由南河沿逃至荷國使館時。與其同乘涼車之西人兩名。確爲德人。至今益明瞭矣。再其偕眷遷入德兵營一事。刻協商國公使。正在協議辦法之際。探聞張勳一派。與德有關係之證據如左。

(一) 德使辛慈回國之途。經過徐州。在張勳處住宿二夜。

(二) 張鎮芳雷震春曾屢次與德使會見。

(三) 復辟宣言後。梁敦彥特訪法使。當時曾謂中國復辟成効。應取消對德斷交。仍歸純然中立國。

(四) 復辟後解除其在西山所收容之德俘四十二名。仍允回其兵營。

(五) 十二日戰鬪時。由德兵營曾貸與張勳機關槍。

(六)德國報紙對於復辟極表贊同。

由此觀之。德國之陰謀似早已與復辟派相通。企圖相機擾亂中國。使列國之視綫集中東方。併企務緩中國之對德宣戰也。無疑矣。

又聞駐紮徐州之張勳兵三營。於十三日晨大起暴動。徐州至南京之火車。一時因以不通。卽由徐海鎮守使張文生。竭力彈壓。幸未至釀成大事。

復辟覆滅。共和復活。此後應如何處分張勳。乃亟應研究之問題也。惟民國政府。不張以勳行動。認爲政治犯。擬以法律犯。要求引渡。對此某國際法學者謂。罰張勳以政治犯。或處以法律犯。一任現政府之意向。段總理若以法律犯。要求引渡。然在案未決定以前。仍應由荷蘭公使監視收容。按距今三十年前。在南美洲巴西國。有當時之陸軍總長與海軍總長。遂鹿大總統職。遂起兵變事。海軍總長敗北。竄入停泊首都里毆狄察涅略灣之葡國軍艦。因是該政府因其攜有兵器。視爲海盜。以法律犯要求引渡。當由葡國公使田頭調停。與巴國政府交涉。其結果以(不論罪)卽行

釋放。由此向例論之處分張勳問題。料由北京外交團提議調停。按照上敘國際慣例。當可以不論罪釋放也。

特錄黎總統辭職之通電。萬急南京馮大總統武鳴陸巡閱使各省督軍省長議會各都統各護軍使各鎮守使各師長各埠報館瓊州龍督辦導河馬提督岳州吳司令成都劉將軍重慶羅將軍天津徐菊人先生梁任公先生熊秉三先生湯濟武先生各報館上海薩總長程總司令唐少川先生章太炎先生各報館廣東孫中山先生李燮和先生京津抄送段總理前路各司令均鑒。寒電計達。頃聞道路流言。頗有於總統復職之說。竊加揣擬者。驚駭何極。元洪引咎辭職。久有成言。皎日懸盟。長河表誓。此次因故去職。付託有人。按法既無復位之文。揆情豈有還轅之理。伏念元洪夙闕類成。叨途際會。求治太急。而躓於康莊。用人過寬。而蔽於輿凡。迫思罪戾。每疚神明。國會內閣。立國兼資。制憲之難。集思尤貴。當稷下高談之日。正沙中忿語之時。縱殫慮以求平。尙觸機而卽發。而元洪揚湯。洱沸膠柱。調音既無。疏濬之方。竟激橫。

流之禍一也。解散國會。政出非常。縱謂法無明條。鄰有先例。然而謹守繩墨。昭誓山河。顧以懼民國之中殤。竟至拂初心。而改選格。蘆縮水。莫遂微忱。寡草隨風。卒隳特操。二也。張勳久蓄野心。自爲盟主。屬以國家多故。曲予優容。遂至乘瑕隙。以激羣藩。結要津。以徹明令。元洪雖持異議。卒惑羣言。旣爲城下之盟。復召奪門之變。莽蜂螫。指引虎糜。軀三也。大盜移國。都市震驚。撤侍衛於東堂。屯重兵於北闕。元洪久經駭浪。何畏獍。颺顧憂大廈之焚。欲擇長城之寄。舍垢忍辱。貯痛停辛。進不能登台授仗。以殄凶渠。退不能闔室自焚。以殉民國。縱中輿之有託。猶內省而滋慚。四也。輕騎宵征。擬居醫院。暫脫身於塞庫。欲奮翼於澠池。迺者鬧人者不通。偵騎交錯。遄臻使館。得免危機。自承複壁之藏。轉懷堅冰之懼。亦旣甯言公使。早伍平民。雖於國似無錙黍之傷。而此身究受羽毛之庇。五也。凡此愆尤。皆難解免。一人叢脞。萬姓流離。觀鋒鏑而慟傷。兵聞鼓鞞而慚宿。將合六州而莫鑄。投四裔以何辭。萬一矜其本心。還我初服。惟有杜門。思過掃地。焚香磨濯。餘生懺除。夙孽甯有辭條之葉。仍返林柯。墮溷。

之花再登茵席。心肝倫在面目。何施且夫。謀國必忠。愛人以德。琴弛則絃改。車覆則軌遷。若必使胥疾之身仍尸高位。騰嘲裨海。播笑編氓。將何以整飭紀綱。折衝樽俎。稀瓜不堪四摘。儒柳不可三眠。亡國敗軍。又焉用此。抑元洪尙有進者。國定於一師。克在和。當興亡。繼絕之交。爲排難解紛之計。正宜恪守法律。蠲棄猜嫌。况馮總統江淮。率鎮夙得軍心。段總理鐘箎。不驚再安。國本果能舉右挈左。提之實甯。復有南強北勝之疑。至於從前兵諫。各省風從。雖言愛國之誠。究有潰防之慮。此次興師討賊。心迹已昭。何忍執越軌之微瑕。掩回天之偉蹟。兩年護國。八表齊功。公忠旣已同孚。法治尤當共勉。若復絜短衡長。黨同伐異。員嶠可到。而使之反風。宣房欲成。而爲之決水。茫茫慘驢。豈有甯期。鼎革以還。政爭迭起。凡茲兄弟。閱牆之事。皆爲奸雄。竊國之資。倫諸夏之偕亡。詎一成之能藉。殷鑑不遠。天命難謀。此尤元洪待罪之軀。所爲垂涕而道者也。勉戴河間。奠我民國。慙魂雖化。枯骨猶生。否則荒山越巒。縱薰穴以無歸。窮海田橫。當投荒而不返。據誠感聽。維以告哀。元洪叩寒二。

馮段宣布張勳八大罪狀 陸巡閱使各督軍省長鎮守使護軍使各都統並轉各師旅長各報館均鑒國運多屯張勳造逆國璋祺瑞先後分別通電聲罪致討想塵清聽逆勳之罪罄竹難書服官民國已歷六載羣力締造之邦基一人肆行破壞罪一置清室於危地致優待條件中止效力辜負先朝第二清室太妃師傅誓死不從勳脅以威目無故主罪三擁幼冲玩諸股掌袖發中旨權逾莽卓肆四與同舟堅約擁護共和口血未乾賣友自恣罪五捏造大總統及國璋等奏摺思以強暴污人以一手掩天下目罪六辯兵橫行京邑騷擾閭閻復廣募鬻匪游痞授以槍械布滿四門陷京師於糜爛罪七以列強承認之民國一旦破碎致友邦憤怒驚疑羣起以謀干涉罪八凡此八罪其最昭彰自餘稔惡擢髮難數國璋忝膺重寄國存與存祺瑞雖在林泉義難袖手今已整率勁旅南北策應肅清畿甸犁掃逆巢凡我同胞諒同義憤佇盼雲會迅盪霾陰國命重光拜嘉何極馮國璋段祺瑞豪

某報記張勳主張復辟之始末 自辛亥而還無中外男女均無不知有張勳兩字

張字紹軒江西奉新人幼侍許文敏公爲館僮暇時輒覽資治通鑑綱鑑易知錄等書故張於君主之觀念獨深後隸蘇元春部下與今兩廣巡閱使陸榮廷爲同事相處甚得然時勢變遷毫無一定張旣扶搖直上雄視一隅而陸亦青雲千霄開藩南疆彼二人相思不見之懷固早有同然者洎今年陸以再造共和之功入都瞻覽路經徐州張以殊禮招待陸復推心置腹無所不談更深夜闌張或以復辟之意相嘗試陸以感情關係唯唯而已而張誤以爲同調也自信乃益堅矣及政府免段總理職後中原鼎沸政綱解紐張以黎大總統之電招及獨立各督軍之推戴乃得居間作調人張於是捩髯笑曰今而後吾之計畫得實行乎事爲其幕友李慶璋劉文揆余誠繼許劍樵諸人所知竭力破壞乃得無事然張之心固未死也重兵到天津時馬龍車水極一時之盛張鎮芳雷震春諸人夙知其所嗜乃餌以復辟之說張得此空谷足音喜不自勝急欲成此舉顧習珍劉右常龔仙洲羣謂大帥此來爲調停而來並非爲復辟而來張亦自知毫無理由遂將此說攔起改向軌道上進行以維持



總統改訂憲法爲要求之目的果然一星期內大功告成李九先生遂附驥北上以組織內閣自任發表閣員獨熱中之張鎮芳雷震春不與焉張雷兩人既銜李刺骨於是一面謀推倒李氏一面慫恿張氏復辟張氏自以解決大局有功餘勇可賈遂將此死灰復燃之復辟說不謀於素所信之劉文揆許造時而就商於臭味相投之萬繩棧與商雲汀萬氏夙與康有爲往來最密至是萬乃遣人請康入都康入都後文武兩聖人握手提攜極稱相得張雷諸人復力舉速發於是雷則聯絡陳光遠之第十二師張氏則星夜調兵入城布置既妥張氏一面飭印鑄局趕印受位上諭一面與梁鼎芬張鎮芳萬繩棧康有爲諸人入朝覲賀而張氏幾年來寢食不忘之事遂於五月十二日晚三鐘告成此其主張復辟之始末情形也

前記張勳氏憤懣他人之賣己有知其內幕者亦云未始無因茲得夫己氏逃往德兵營後電復之文其委過之情如揭已

上海高照里口宅轉各報館並轉各督軍師長鎮守使都統巡閱使護軍使商會鑒

變更國體事關重大非勳所獨能主持誰非清朝臣子各有應盡之責數年以來密謀進行全仗衆力去歲徐州歷次會議馮段徐梁諸公及各督軍無不有代表在場卽勳此次到津徐東海朱省長均極端贊助其餘各督軍亦無違言芝老雖面未表示亦未拒絕勳到京後復派代表來商謂祇須推倒總統復辟一事自可商量勳又密電各方面徵求同意亦皆許可密電俱在非可諱言現既實行不但馮段通電反對并朝夕共謀之陳光遠王士珍首先贊成之曹錕段芝貴等亦居然抗顏反闕直逼京畿翻雲覆雨出於俄頃人心如此實堪浩歎勳孤忠耿耿天日可表雖爲羣小所賣而此心至死不懈但此等鬼蜮行爲不可不佈告天下咸使聞知以免混淆黑白除將歷次會議紀錄並往來函電彙集刊印分送外先此電達勳微

十五日卽二十七日今日國務院尙未辦公因段總理雖蒞京而軍務尙未結束總理及秘書長等均未到院一因星期二則閣員既未發表行政尙無從着手但聞下午張秘書長及隨行來京各要人在段宅重要會談恢復各行政機關之種種方法

閣員及各次長均預定一二日內發表。軍事即將收束。京師亦即須解嚴。復辟之惡潮漸告終了矣。

段總理蒞京後。昨日以會晤各要人。宅中非常忙碌。對於各路司令。未能聚談。茲聞段君以亂事既平。亟須恢復原狀。整頓政治。今特在陸軍部開各路司令會議。自總司令以下。各路司令及副司令皆列席。自上午十一時半至下午一時。密議種種問題。探聞關於收束軍事。處置張逆降兵。及維持京局。準備解嚴等方法。

張勳叛國殃民。神人共憤。十二日之役。臨危苟免。逃避荷蘭公使館。現住德國兵營。其貪生惜死。足以遺臭萬年。查討逆總司令處。懸有賞格。能得張勳正身者。不問生死。均賞銀十萬元。其助逆要人如萬繩棧等。獲案亦有重賞。頃有張勳設法潛逃之說。一般人士。以爲發財立功。惟一機會。關於張勳動靜。均探訪不懈。云頃觀某要人之時局談。不禁有禍猶未已之感也。茲將大要披露於左。

北洋派與南方派。段氏爲今次光復之首勳。對於共和國家。其功績之偉大。正與

蔡鍔黃興等相比。肩然誠迴顧細思之。時局糜爛至於此極者。其責任實荷於段氏之一身也。蓋段氏前在總理職務內。曾提出宣戰問題。壓迫議會。招致督軍。蹂躪約法。徐徐進行。遂至釀成厲階。故以公平之眼光觀之。則段氏前後之行。爲實不啻自召亂而自弭亂者也。雖光復之業。素著殊覺翳暈而乏赫赫之光輝。是以西南各省不肯服從新政府。旅居津滬之議員等。亦連盟而主張反對。南北離睽之情形已如斯。則段氏縱欲以討逆之餘威。組織內閣。統一天下。號令四方。恐不能行。不待智者而自明也。如段氏新組內閣。其閣員悉北洋一派之走狗。而口稱舉國一致之神聖內閣者。實令人捧腹絕倒不置。其維持之難永久。可以測知。

馮國璋與段祺瑞。黃陂爲人。大類一種偶像。段請蓋印。則惟命是從。故雖黎爲總統。段爲總理。無特別事故。國務可以進行。而馮則不然。段苟負氣迫馮。馮不合意。必不俯從而馮段之爭執。卽於此起。馮之親身入京執政。與否尙屬可疑。馮如單騎北上。邁進公府。則殷鑑不遠。又恐蹈黎氏之覆轍。馮非甚愚。必能明曉此種機微。又安

得。溺。惑。於。顯。位。而。自。招。大。禍。耶。惟。段。如。允。將。駐。京。之。各。軍。移。出。外。地。使。馮。率。所。部。駐。於。京。師。馮。或。者。來。京。就。職。然。果。如。斯。段。實。自。召。危。亡。非。段。之。所。能。忍。也。然。則。馮。之。來。京。或。不。可。望。馮。果。不。來。國。務。如。何。辦。理。南。京。距。京。師。遙。遙。數。千。里。文。書。往。來。動。需。時。日。偶。有。緊。要。接。洽。之。事。恐。欲。辦。而。不。能。也。又。北。洋。派。中。之。安。徽。系。與。直。隸。系。之。暗。鬪。已。久。人。皆。知。之。而。馮。爲。直。隸。系。之。領。袖。段。爲。安。徽。系。之。代。表。故。馮。段。爭。執。之。勢。釀。成。則。直。系。祖。馮。派。皖。系。附。段。派。不。至。破。壞。時。局。不。止。也。蓋。前。者。府。院。之。扞。格。但。因。黎。氏。無。軍。界。有。力。之。後。援。不。能。毅。然。對。待。常。俯。允。段。之。主。張。不。至。鬧。出。大。事。今。者。雙。方。均。係。軍。界。最。大。有。力。者。所。附。和。者。亦。悉。爲。擁。有。大。兵。之。督。軍。萬。一。招。雙。方。之。決。裂。中。國。命。運。實。不。可。揣。度。矣。由。現。在。形。勢。觀。之。我。國。勢。力。之。中。心。恰。分。爲。三。處。一。則。段。之。勢。力。二。則。馮。之。勢。力。三。則。南。方。派。之。勢。力。是。也。世。人。或。稱。中。國。將。裂。爲。三。個。之。傾。向。冷。靜。詳。察。此。言。亦。不。盡。虛。近。南。方。電。傳。謂。南。方。否。認。馮。國。璋。之。政。府。將。在。廣。州。新。設。臨。時。政。府。云。云。探。索。其。裏。面。此。計。畫。殊。屬。事。實。但。成。否。未。卜。耳。某。氏。之。言。如。此。述。之。以。

質閱者。

復辟實行後。中交紙幣及銅元紙幣。日日跌價。及至戰後。官廳與兩銀行並商會。對於金融一項。尙未有妥善維持辦法。遂致錢市停歇。紙幣亦無市價。而昨日市面。銅元紙幣。竟按六折授受。然尙有商家拒而不用者。似此情形。非有維持之法。恐不足以善其後也。

此次兵戰。東南城之電話線。損毀甚廣。而電話局之補修工程。現已將次告竣。惟西城一帶。電線損傷既微。且已補修完竣。乃竟有多處不能通電說話者。如某公寓內。設置電機三個。竟有其二不通電者。雖日催數次。電話局亦置諸不理。似此情形。未免於便利交通。名不符實矣。

警察廳因此次兵戰。所有繁盛區域。雖得保全。未受搶掠。而於善後事宜。尤應急速辦理。俾復舊觀。茲已飭令外右一右二等區署長。勸告戲園飯館樂戶等。迅速復業。茲聞該管警區派遣巡官長警勸告之情形。各飯館俟將逃避之廚師夥計覓回。即

行開張。各戲園本擬由昨日開演。嗣因陰雨。恐無座客。故於今日。即可陸續開演。惟八埠樂戶之妓女。因避軍人。皆已風流雲散。而警區已責令樂戶。趕速尋覓各妓。照常營業云。

日前國軍圍剿天壇內辮子兵時。前三門外之游民土匪等。皆冒彈雨而出。意在大肆搶掠。殊不知警察吳總監。已預先指令偵緝隊。始行防範。故於是日。該隊兵等在砲煙彈雨之下。緝獲倡言行搶之土匪多名。商家遂得無恙。聞於日內。即將該匪送廳懲辦。

復辟後。張勳即派兵將京奉京漢兩路交通斷絕。遂致百貨停滯。不能輸運。而於米糧尤形缺乏。聞警察吳總監爲維持京內民食起見。特向陸軍都要求撥借白米三千石。以資開辦平糶。今日已將此項米糧運解來京。而內外城之平糶局。料於日內即可開辦。

京師軍警機關。前因辮子兵尙未遣散出京。故於十二日起。每夜施行戒嚴。現在辮

子兵已遣送出京。地方秩序已歸安甯。故將戒嚴時間稍有更改。漸漸解除。惟於崇文宣武兩門。仍於夜間十時關閉。以昭慎重。

馮副總統現在南京。已代行大總統職任。不日偕帶衛隊來京。聞段總理因公府內現有之衛隊。亟應更換。故於昨日派令憲兵營。將該衛兵等一律遣散。並發給兩個月餉銀。

警察廳內容留投順之辮子兵。今日始運送出京。惟聞該兵等在廳署任意作踐。以致署內狼藉不堪。故今日由守衛巡官將貧民隊調入廳署。大加清理掃除云。警察廳因此次共和軍圍攻定武軍時。各區境內人民。慘遭流彈。擊傷斃命。以及損失財產者不少。茲為撫卹起見。昨已令各區署長督飭各路巡官長警。將因戰事誤遭傷害之人姓名籍貫開列清冊。速行呈報。以便酌給撫卹。

辮子兵已皆遣送出京。而各路國軍亦皆退回原駐地。京內秩序亟應照常恢復。原狀。然各商鋪有因觀望。不即開門營業者。有因藉此時機。竟將貨物居奇。飛漲其價。



者。兼以中交紙幣不能普通行使。因而人民生計。益形艱窘。地方長官。宜速籌善後之法。以維民生。

張勳負固自守。勢不能支。遂將南河沿自宅縱火焚燒。伊乃逃入荷蘭使館。茲聞張之宅內。尚有殘毀軍裝子彈。及財物器具。壓在灰燼內。殊爲可惜。昨由警察廳已派工程隊前往清理矣。

日前各路軍隊齊集京內。攻擊張勳時。所有商鋪皆閉門停止營業。現在戰事已竣。段總理業已來京。而內外城各商鋪。仍皆觀望不敢開張營業。雖經巡警勸令復業。該商等竟置不理。聞警察吳總監。昨已向商務總會剴切曉諭。各商勿懷憂慮。地方治安。當由警察保護。決無他虞。

警察查因商界憂懼。乃因外間謠言紛紜。難免有不法之徒。從中鼓惑。此事殊與地方治安。大有關係。若不嚴行禁止。實屬有礙安甯。故昨已通令各區。對於此事。嚴行取締。倘有捏造謠言惑衆者。卽行送廳嚴重懲辦。以昭炯戒。

共和軍戰敗。辦子兵以來。意氣驕豪。至各店鋪購買貨物。往往有不給價錢。惟以回頭給錢。一語算賬者。亦是一種平和的搶掠。爲長官者。須注意及之。

京綏鐵路。前因察哈爾軍隊在路沿設防。上行列車。開至清河站。下行列車。開至沙河爲止。現在時局已定。該路局照常行軍。以利交通。已自昨日起實行矣。

昨有友談蚌埠事者。筆錄如左。倪嗣冲本係帝制餘孽。袁氏死黨。論其果勇。遠不如張勳。張爲皖省督軍。倪爲省長。同官三載。私誼甚深。且倪遇事仰承張之鼻息。前次段祺瑞倒閣一事。中央亟欲免倪之職。密訊張勳徵其同意。張陰以告倪。倪爲飯碗主義。倚張之勢。遂倡言獨立。日前彼反對復辟之通電。滿紙擁護共和。鞏固國家各語。讀者無不嗤之以鼻。當僞諭頒到之日。倪之幕府。斐景福。李灼華。竭力贊同。聞斐李之髮辮。今猶保存。此卽愛戴清廷之鐵證。故倪亦卽時活動。復有淮河道尹黃家傑（張逆同鄉）獻計。抱定騎牆宗旨。一方面具摺謝恩。一方面請示馮副座。並親自赴甯。旋見楊善德。反對復辟之電。已發及多數省分。亦復相同。倪匆匆歸蚌。卽以

態。度。明。示。乃。亦。發。不。痛。不。癢。之。反。對。電。文。實。則。張。逆。屬。官。布。滿。皖。城。張。逆。軍。隊。布。滿。蚌。埠。彼。此。尤。加。親。睦。對。待。敵。人。之。手。續。當。如。是。耶。至。曰。收。撫。逆。軍。不。過。紙。上。空。談。並。未。見。諸。事。實。料。定。倪。必。不。肯。爲。惟。求。倪。不。與。通。氣。足。矣。現。在。倪。並。不。屬。意。於。辦。子。軍。其。最。嚴。防。者。南。軍。耳。深。恐。殲。滅。張。逆。後。復。與。彼。爲。難。伊。兄。倪。毓。朵。上。年。任。征。滇。司。令。前。次。獨。立。又。爲。北。伐。司。令。此。人。純。粹。爲。民。國。搗。亂。派。近。亦。表。示。擁。護。共。和。者。實。不。得。不。爲。飯。碗。計。也。

復辟之幻象既滅。人心急盼政府成立。茲聞段總理在天津時。與馮總統商即蒞京。馮已允來京。段入京後。又屢電催。明日並派靳將軍爲代表赴甯。迎接河間。急謀建設鞏固政府云。

外間頗傳張逆辦兵。尙有留在清宮駐守者。人心甚爲驚疑。茲聞政府昨已正式詢問清宮。有無張兵駐守。在內。據清宮答覆。則確已無兵。現方從事調查矣。旋接徐州兵變之耗。乃欲此輩騎牆人。早爲殃民之渠魁也。

(十六日)卽二十八日晨五時東廠胡同黎宅衛隊一兵士謀刺黃陂將向內室進入。連長及一將校急出防止均被刺殺。該兵持手槍闖入內室幸黃陂躲避獲免危險。該兵不能達目的而逃出。有一兵士開槍擊斃兇犯而黎公卽赴法國醫院避難。惟該衛兵所以敢出此兇行者其背後必有人主使可知。殊堪注目。

嗣得京師警察廳調查衛兵殺人之真相甚爲詳密。兇犯係忽發瘋疾者並非意圖行刺。茲將警廳調查該案之情形錄左。

本月十六日上午五時駐紮黎總統住宅旁花園內之護衛隊兵王德祿忽發瘋狂手持刺刀兩柄由所住兵房內衝出尋人時該護衛隊多身睡未起猝未及防致被扎死正目王鳳鳴三等護衛馬占成。旋奔至該護衛隊官長室內連長賓世禮見其來勢甚兇持手槍向擊未中。追至室外假山石下連發兩槍未響。該凶手反刀將賓世禮扎死。又連傷伍長李保甲衛兵張洪品二名。奔出大門外持刀亂舞。護衛隊多名追至東廠胡同東口小巷內槍擊兇手腿部卽時倒地。被亂槍戳死。當時卽由該

管內左二區警察署長孫秉璋馳往看視。見王鳳鳴死於該兵房牆角下。馬占成死於兵房西首院內。賓世禮死於花園內假山石下。其致命處皆在腹部。確係用刀扎死。（瘋者固能如是乎）該護衛處即將情形報告陸軍部。陸軍部傳示不用檢驗。卽由該處將兇手王德祿抬往朝陽門外掩埋。並將賓世禮王鳳鳴馬占成用棺盛殮。送往弓絃胡同延禧寺停寄。至受傷者李保甲張洪品二名。均送同仁醫院醫治。該護衛隊中人多稱該兇手王德祿平日人尙誠實。對於同輩亦無惡感。乃忽爾演此慘劇。有知其事者。向人傳說云。該王德祿爲山東曹州人。此次討逆軍於十二日入城。該護衛隊有四五十人。前往南池子助戰。該王德祿亦隨隊前往。惟在戰場內並未發一鎗。當時該護衛隊中人多譏笑其無勇。事定後。該護衛隊在張勳宅內檢有物品多件。又未分給王德祿。該王德祿因此激刺。惱羞成怒。發生瘋疾。向人尋仇云云。惟查該護衛隊係黎總統用私人名義所招之衛隊。用以保護家宅。現在成隊有四月餘。當招募時。由黎總統委派現充該隊營長之鄧翔宸與衛隊司令王祥發。

經理其事。邨爲河間人。王爲滄州人。故所招衛隊。多係直隸以南。山東以北之人。黎總統平日對於該護衛隊等。恩視有加。該護衛隊等對於黎總統家屬。亦極盡保衛之責任。此次黎總統疊遭政變。於本月十五日方回邸宅。乃於第二日即發生該隊兵王德祿持刀傷人之變。故黎總統因受驚。即時與其眷屬同赴東交民巷法國醫院。所有該護衛隊。由江宇澄統領回明黎總統。將其分別遣散。現地方秩序。經步軍統領衙門京師警察廳加派兵警於東廠胡同一帶巡邏防視。故人民均安靖如常云。

又據新聞編譯社消息云。(上略)黃陂聞知。急召江朝宗至。江到後。少談。即往段宅商辦法。段意迎入團城居住。以免危險。黎初意欲往日本同仁醫院。繼乃決定住法國醫院。上午八年半。由江朝宗護送入院。一面即從事嚴查。解散肇事之衛隊。但兇手已死。原因無從追詢。

另一消息。該衛兵狀類瘋狂。其原因聞係因分派從張勳處得來之贓物。現該贓物

等已在東四牌樓之某店獲得。又此項衛隊計三百名。爲公府內衛隊。黎卽任後。所自招致。金永炎爲司令官。非蕭安國之所統帶。黎歸宅後。段總理曾請派警察保護。黎以自己所招之衛隊。較爲可靠。故仍未更換。遂致有今日之變云。

今日上午八時半。國務院秘書長張志潭氏。進院視事。并通知所屬各局人員。於十時前。一并到該管機關。清理積壓案件。以便從事結束。但實行辦公。尙待數日。探其原因。該院自段合肥免職後。主軸迭易。視同傳舍。國務之停滯。進行將近兩月。故一切手續。極爲紛繁。非旦夕所能就緒。

段總理未晉京以前。曾在天津設立國務院辦事處。其地點係直隸省長公署。迨昨日入都就職後。已由張秘書長發出通告。於本日蒞國務院正式視事。一面卽將天津臨時辦事處。限十四日起。廢止辦公。其機關已完全取消矣。

討逆軍總司令部。原設在津省長公署。嗣該軍入城後。卽與段總司令同時遷移至京。暫假將軍府辦理收束事宜。現因張勳業經逃走。辦子兵均已解散。各種結束事

宜亦告完竣。無再存在之必要。擬於一二日內。將該總司令部實行取消。追記兵匪搶掠之種種陰歷二十四日。晨共和軍進京。攻擊張勳。城內外各地方。賴兵警保護。尙無被搶情事。惟東城一帶。頗遭軍人蹂躪。甚有被搶一空者。聞當日情形。頗與壬子無異。外間有謂此次搶掠商民。係土匪所爲者。非事實也。茲特詳察追誌。以餉者。

(一) 安定門大街土兒胡同廣德堂藥鋪。帽兒胡同內棚鄭家。北新橋瑞興隆洋貨布號。確已被搶。惟所失尙尠。

(二) 花枝胡同馬錫恩宅。花梗胡同周錫恆宅。均被搶甚鉅。所失財產。有三千餘元之多。當該兵匪進馬宅大門時。馬錫恩意欲攔阻。該兵等卽用槍支擊打。受傷甚重。臨去時。內有拋上灰色軍衣及軍帽者。此等兵匪。係屬何項。不問可知也。

(三) 又該巷中州李宅亦被搶。

(四) 東安市場各商鋪。均經兵匪強索銀元不少。並洋貨衣物甚多。較之壬子雖覺



不重。然商民所受損失。亦云大矣。

(五)東安門外紗帽胡同鍾宅。被搶一空。惟未傷人。

(六)水獺胡同林宅。本不甚富。惟該姓所居房屋甚大。該兵等以爲係屬富戶。實則林姓並無餘財。聞是日進門時。卽有外來軍人多名。用槍擊斃該兵數名。此項兵係臨近某部守衛者。

以上所察。仍有遺漏。此外東城一帶被鋪之家。及向各暇戶勒借之軍人尙多。不啻枚舉。總之此次搶掠。並非土匪。實係服灰色軍服之軍人。兵匪槍奪。強指土匪。然則土匪亦未免呼冤矣。

追記七月十二日陸軍第一師攻擊南河沿之經過

### 一 兵方

陸軍第一師步兵第一旅之第一團及第二團。(少第一營)第一師步兵四營。近畿第二旅步兵兩營。陸軍部衛隊一營。山砲兵一連。(六門編成)第十一師山砲

二門。機關槍六挺。陸軍部衛隊機關槍四挺。騎兵三連。

二 佈署

步一團二營之兩連。山砲二門。在後門截堵。

步一團一二兩營。機關槍兩挺。在北池子騎河樓附近截堵。

步二團二營。機關槍兩挺。由丁字街進攻東安門。

步二團三營。機關槍兩挺。由錫拉胡同斜攻東安門。

山砲四門。在皇城東北角缺口內放列。

步一團三營。及陸軍部衛隊機關槍。在翠花胡同爲旅預備隊。騎兵三連。分紮交

道口北新橋一帶。彈壓地面。

近畿第二旅之步兵兩營。爲總預備隊。在寬街附近。彈壓地面。

第十一師步兵四營。砲二門。由朝陽門進城。援助第一師。攻擊東安門。並彈壓四牌樓東安市場附近之地面。

### 三 經過

約於早四時。皇城東北角內之砲兵，首先用二十千百米之表尺。對於東安門附近之守兵。（約步兵六百名，除守門守橋者約三百名外，餘均在牆內或溝內，向外射擊，更有機關槍五挺，內四挺向東放列，對丁字街方向射擊，一向挺北放列，對北皇城根之道射擊。）開始射擊，時步二團二營及機關槍兩挺，亦到達於丁字街，向東安門開始射擊，同時步一團之一部及機關槍，亦於北池子方面進攻。當時丁字街之部隊，因前進甚猛，致營長趙雲亭陣亡，後又有連長一名受重傷，繼又有排長一名陣亡，更有排長二名，司務一名，先後均受重傷，其時目兵之傷亡，已達四五十名矣。然該部隊不因傷亡而氣沮，由團長指揮，繼續前進，施行猛烈之射擊。此時皇城東北角砲火之猛烈，亦達極點。當時辦兵亦曾陣亡十餘名。官二員，知勢難抵抗，遂棄機關槍一架，步槍百餘支，子彈數十箱而退。丁字街之部隊，與東安門守兵肉薄之後，遂占領東安門。時約九時十一分，同時砲兵亦換

變陣地於翠花胡同缺口。改目標向張宅射擊。由北池子進攻之部隊。亦達到北池子南口附近。斯時東安門退却之守兵。仍據河岸橋樑以西之家屋。及東華門上頑強抵抗。後由皇城開設破牆孔數處。以砲火向張宅集注射擊。占領東安門之部隊。亦進據橋之南緣。機關槍亦進至橋之東端。放列施行連續射擊。步兵乃藉砲火及機關砲火之掩護。向張宅實行衝鋒。至張宅時。約下午一時五十分。未幾張宅火起。知辯兵已退至中央公園及警察廳附近。遂停戰。

至南池子南口之堵截。係十三師之責任。故第一師對於此方面。未配布兵力。張勳之死黨張鵬（字雲衢）向充張逆高等顧問官。民國四年充十二圩鹽棧棧長。任事三年。搜刮民財至百餘萬之多。復辟問題未發生以前。曾由徐州忽忽北上。抵京之後。遂與萬繩栻日事慫恿。復辟失敗。自知罪無可逭。乃於日前由津浦火車微服逃滬。現匿居法租界亞而培路某號。聞該逆此次來滬。外雖畏罪而逃。實假運動民黨之名。已騙有張勳鉅款云。

本日有軍人二名。在糧市店西域樓內吃喝畢。乃出中國票十元。告令跑堂人除去飯錢銅元七十餘枚。其餘索找現洋九元。飯館主人不堪此等賠累。遂將中國票追回。向該兵云。您吃的飯錢。我們已記在賬上了。請您改日再給罷。該兵等連連稱好而去。

京師商務總會。當辦子兵初到京時。懼其擾害。乃購買豬羊酒麵送往大壇。以作犒勞。昨聞商會又派人採買豬羊二百隻。以及酒麵等物。定於明日送往京內各處駐屯之國軍營內。犒勞軍人。並求其保護。

前昨兩日。內外城各商店。已皆陸續開門營業。惟各錄店以及代理兌換之烟鋪蠟鋪等。仍不肯開門營業。因而中交紙幣。竟無兌換之處。有持紙幣購物者。商家亦多拒而不用。聞各錢店相率如此之故。係受中國銀行停止辦事之影響。遂致市民大受困苦云。

外城各戲園。因受復辟之禍。停演戲劇。已有一星期之久。現在地面秩序已歸平定。

曾經警區催令各園早日開演。故於昨日起。已有三慶廣德天樂等家開演。聞各園之票價。有售銅元六枚者。有售十枚者。惟於夜戲。尙須緩期開演。蓋因座客無幾。軍人過多之故云。

繳械投順之辮子兵。已由警察廳派員護送出京。所有該兵卸除之武裝。皆在警察廳內。故經該廳昨日派員督飭夫役。將該項槍砲。送交陸軍部軍裝庫驗收。

京兆尹王志襄。因叛國逆軍。業經國軍剿除。惟京城內外及所屬各縣地方之謠言紛起。商民多形不安。遂致停止營業。實屬妨害地方秩序。故於昨已通令各該縣知事。出示曉諭商民人等。各自安心營業。勿得驚恐。倘有不法之徒。造謠生事。即將該人解縣嚴究懲辦。以靖地方。

警察總監吳炳湘爲維持善後秩序接濟民食起見。特向陸軍部借撥大米三千石。以資平糶。茲已將平糶地點規定。外城三處。內城五處。以便人民就近購取。其局所一在外左四區法華寺廟內。二在右三區善果寺內。三在右五區靈佑宮廟內。其內

城五處。一在左一區。泡子河地方。二在左四區。宏善寺。三在右二區。城隍廟街。四在右四區。手帕胡同。五在地安門外。每日售米時。自上午五鐘起至八鐘止。每斤售銅元票七枚。惟每人僅許購米至多以二斤爲限。

公府內舊有之衛隊目兵等一百八十五名。已經遣散。昨經憲兵營三連排長趙寶泰。會同公府內衛司令副官劉進甲。將該兵等由京泰路火車送往山東原籍。公府內衛隊現已改由陸軍第八師步兵入府守衛。茲聞該師長以京內戰事初定。惟恐餘患未靖。公府內仍應施行戒嚴。以備不虞。故於日昨除在扼要地方安設機關槍外。並對於出入公府人等一律檢察。以昭嚴肅。

討逆軍隊現已奉令退出京城。各歸汛地駐紮。所有內外城各區地方治安。昨已由警察廳步軍統領擔負保護之責。聞商民等覩此景象。心亦略安。故於日來已皆陸續開張營業。

戰亂突起。人民不獨死於槍砲。聞南苑小紅門迤南住戶柳成玉夫婦。因聞大亂。思

無逃路。心中一狠。夫婦同上搭襖弔而死。又京東張家灣住戶朱得壽。因聞北京大亂。懼無生活。遂自服火柴身死。

連日市面謠言紛紜。街談巷議。不曰某處兵變。卽曰張勳起兵復仇。此等無意識之捏造。殊與京師治安有礙。有地面之責者。正當嚴密查拿。以靖人心。昨日市面中交紙幣。各錢鋪均拒而不受。四牌樓某粮店。抑勒中票價格。按六十五枚核收。奸商藉此居奇。小民生計益窘。

聞段總理昨日以討逆軍總司令名義。發出佈告略誌如左云。此次逆賊張勳背叛民國。僞立政府。本總司令誓師討賊。分路進攻。克復都城。該逆辯兵投誠繳械。悉行遣送回籍。所有善後辦法如下。(一)現在戰事已告終結。本京商民。應卽日照常營業。(二)民間如收有軍裝軍械者。應速報繳附近警區。違者查出照私藏軍火治罪。(三)知有逆賊張勳餘匪匿跡者。應速報區。跟踪緝拿。違者查出按照通匪治罪。(四)冒充軍人。招搖欺詐者。按照軍法治罪。



十七日即二十九日戰事經過已五日總理業已蒞京所盼者政府速行建設耳故內閣成立爲一般人之所希望故段總理於海陸軍外交三部發表後亟亟焉向各方接洽照豫定計劃務使內閣即日成立聞今日梁任公到京面談一切都已就緒梁既擔任財政則湯林范等自皆無問題故全體閣員於今晚決可發表馮總統來電一切政務責成內閣不加干涉閣員亦一一同意茲記今晚可發表之閣員如下(一)財政梁任公(二)交通曹汝霖(三)內務湯化龍(四)農商張國淦(五)司法林長民

馮氏既依法就任總統自當速行來京力謀建設前聞中外頗有仍屬望黎氏復職之意茲既得黎氏去職之決心又頃聞段總理以元首位置不宜久懸業於十五日特派某氏赴寧謁見馮河間懇請早日晉京聞馮氏答以一切政務尙待處理俟終結後即行北上大約需二星期方可首途再者凡國務院所決定之案件均電陳馮副總統得其允許始行發表又黎總統由日本公使館回歸東廠胡同邸宅後即發

辭職通電。馮副總統亦有電辭去代理總統職權。然黎公辭職之意志非常堅決。其結局當然歸馮氏繼任。故上京之日期當已不遠。

徐東海來京而後。因其資格之關係。頗惹一般人之注意。於是竟有謂其將任總統者。是殆受復辟變亂之驚恐。故神經敏銳。至於如是。本社於東海來京以後。曾細察其行動。則三日以來。從未與現在政界當局發生片刻言談之關係。其居私第亦謝絕一切來客。聲明不問政治之事。蓋東海此來。純爲清室一方面之意思。請其來京謀商如何。今後之安全。以東海資格。或可借重與政府方面稍事接洽。安有覬覦總統之理。當此政局未甯。依法以整理時局。尙虞不給。不容再有他種謠詠發生。特辭而闢之。

民國雖已回復。段總理重行上台。組織內閣。滿志躊躇。完全成立。勢尙有待。惟總統爲一國元首。關係匪輕。自張逆擾亂後。黎總統通電辭職。去志甚堅。加之前日衛隊肇變。遂擬迅速離開北京。避地養晦。不與聞國家政治。而馮副座又於十五日電辭。

代理職務。繼任與否。尙未可逆斷。萬一馮不繼任。大總統黃陂已表示決絕。元首虛位。百務艱期。進行中華民國。不啻根本上未臻奠定。依是段總理非常焦灼。特於昨日派靳翼卿中將赴甯。敦請河間北上。勉任其難。然則總統問題一日不解決。國基卽一日不鞏固。當軸殆未可忽視之也。

特志十七日之大總統令 迭據討逆軍總司令國務總理段祺瑞並各路司令電報收復京師情形。本大總統披閱之餘。良深欣慰。此次張勳倡亂竊據神京。逞其逆謀。矯誣天下。倚都城爲負隅之計。假清室爲盜竊之資。寰宇震驚。全國共憤。本大總統猝聞奇變。義憤填膺。亟圖濟師。戡除大憝。惟慮道阻且長。久稽時日。水深火熱。民何以堪。幸賴國務總理段祺瑞勇於赴義。視師馬廠。各省雲集。景從同深。敵愾分兵三路。直取京師。廊房告捷。首挫其鋒。豐台會師。遂蹙其勢。盧溝橋長辛店等處。節節進攻。將逆衆迫於城內。而逆勳尙不悔禍。負固阻兵。防禦日增。佈置日密。屯聚天壇。密布礮位於天安門景山東西華門南河沿各處。合餘燼以肆鴟張。藉俱焚以爲挾。

制兇計狡謀中外切齒我軍揆時度勢利在速攻不忍必亂其謀不取必受其咎指  
示發縱力滅地方損害爰於十二日拂曉分途進攻天壇逆衆死力抗拒國軍奮勇  
攻擊逆衆勢始不支繳械投誠聽候安插其天安門景山東西華門南河沿各處亦  
經國軍冒彈薄登斃其梟悍餘衆勢窮乞降首逆張勳於礮火猛烈之秋冒死潛逃  
卽於是日下午三時半將京師完全收復地方安堵如恒各國使館區域未有損失  
雖元惡尙稽顯戮而大局於焉底定全賴該總司令暨各路司令忠勇奮發調度有  
方不出旬日膚功迅奏允宜特頒榮典用酬殊勳卽由國務院會同陸軍部擬議呈  
明辦理所有前敵將士暨從征文武官吏奮勇爭先冒暑力戰應由總司令暨各路  
司令查明呈請獎勵京師內外軍警保衛地方有勞足錄由各該管長核實請獎以  
昭激勸首逆張勳尙未擒獲責成內外各路軍隊與各省地方警察長官一律嚴緝  
務獲究辦切切此令

外間屢傳有張勳業已逃走之風說。聞某公使曾以此詢問荷蘭公使。據荷蘭公使

答覆。則謂並無其事。

據內務部呈稱准清室內務府函稱本日內務府奉諭前於宣統三年十二月二十五日欽奉隆裕皇太后懿旨因全國人民傾向共和特率皇帝將統治權公諸全國定爲民主共和並議定優待條件永資遵守等因六載以來備極優待本無私政之心豈有食言之理不意七月一號張勳率領軍隊入宮盤踞矯發諭旨擅更國體違背先朝懿訓冲人深居宮禁莫可如何此中情形當爲天下所共諒著內務府咨請民國政府宣布中外一體聞知等因函知到部理合據情轉呈等情此次張勳叛國矯挾肇亂天下本共有見聞茲據呈明咨達各情合亟明白佈告咸使聞知此令按此令即可代取消帝號之條文於是復辟之局乃告終止若龍旗片影則於先七日早已消滅矣。

此次張勳謀叛危及國家罪在不赦除張勳已有明令通飭嚴緝外所有此次同謀造亂之康有爲劉廷琛萬繩棧梁敦彥胡嗣瑗均著京內外各軍警長官一體嚴緝

務獲交法庭盡法懲辦其實被罔脅者一概從寬免究此令

徐州鎮守使張文生海州鎮守使白寶山當張勳倡亂之始即經通電聲明未預逆謀並約束軍隊力維秩序此次土匪新兵裹脅爲變又復親督所部立予殲除淮徐一帶得以保持安甯實屬深明大義克盡職守張文生白寶山誓照舊供職並責成將所部軍隊申明紀律切實整頓以衛地方此令

●記張志潭氏時局談

張勳之處分 新外交總長汪大燮氏前日關於張勳之處分特往訪荷蘭公使以保證張逆身命之安全爲條件要求引渡。荷蘭公使尙未承諾。至於徐州兵之處分亦非困難問題。現在該地之張文生以下各軍官均已來電表示歸順之旨。將來當無何等之障害可慮。

馮國璋 馮國璋已通告來京之意。現段總理復於十五日特派靳雲鵬偕同國務院參議某氏前往南京迎迓馮氏。故馮氏定必來京。但必須待徐州鎮靜後始能命

駕云。

宣戰問題。段總理原來認對德宣戰之必要。嘗以去就相爭。茲既復總國政。當然依照前此所定方針。力謀進行。斷無變更之可言。

討逆軍之撤回。討逆軍之撤回原駐地點。現已有三分之二。所殘留於城外者。不過三分之一。本擬令其火速撤回。第因鐵道之障礙。與火車之不便。全體撤回。尚須多少時日。

對南方策。陸榮廷之代表。當討逆軍出發馬廠之際。即由廣東出發。就北上之途。至十六夜已安抵本京。新內閣無論何事。均應與之商量。籌畫適當之方法。

宣統染病。徐世昌入京。原因清室要求。大概以協議優待條件爲其主要任務。但聞宣統自十二日之戰鬪以來。飽受虛驚。深染重疾。日來尤趨不良。徐氏或爲視病而來。亦未可知。至於徐氏爲大總統之謠傳。更無一顧之價值。

段總理以軍事需款過鉅。國庫異常拮据。今日特以內閣名義。分電各省省長。及各

財政廳長。務須於十日內。將六月份欠解中央之協款。及七月份之協款。掃數匯京。以濟要需。而維巨艱。並聞湖北王子春省長。在段總理未發電之前。曾來電報告。已由中國銀行匯京二十萬元。餘款稍緩。續匯日後。中央之財政。或不致過於窘迫。云段總理以雷震春張鎮芳馮德麟三逆。既頒令交法庭依法嚴懲。應即日審訊定讞。以除奸賊。昨特致電天津警察廳長楊敬林。迅速派員押解馮逆來京。歸案訊辦。噫。馮逆昔日之威風。而今何在哉。

徐州兵變一節。曾見上海來電。茲據確實消息云。本月十二日。徐州駐紮之定武軍第一營第三營第五十三營第五十四營。約同譁變。大肆焚掠。南關一帶。已搶掠一空。北關富戶巨商。亦均大遭損失。徐州車站。亦遭焚如。人民死傷者。不下四百人。至十三早起。變兵二營。逃入徐西碭山。其餘就靜。統計公私損害。共不下二百萬元之鉅。起變之原因。聞係張文生壓迫太過之故。當起變之時。張文生按兵城內。不出。迹近縱兵搶掠。噫。歷史五季之禍。不是過也。南望江天。欲歸不得。我勞如何不可說矣。



段總理入京以來。連日布置內閣。漸已就緒。昨日乃親蒞國務院視事。各科人員。一謁見。慰勞有加。其鄭重諄囑之兩語。則曰。開誠布公。熱心辦事。昨日尙無會議。惟披閱各處來電後。下午始歸私邸。

此次攻討張逆。恢復共和。雖由段總理統率各路義軍撲滅之力。然飛機隊長秦君國鏞。屢施炸彈。以驚破敵膽。其功效亦甚卓著。聞當軸對於航空事業。經一度試驗。成績之優美。乃深爲注意。擬極力提倡。以促航空前途之進步。有建議將航空學校。大加擴充。特設航空處。或航空訓練處。以爲東亞航空界開一生面者。大約不久即可見諸實施。

提署南營參戎鮑維翰。因辦兵雖已遣送出京。而京內游民土匪。難免不有覬覦搶掠之心。茲爲鎮壓土匪。保維安甯起見。除飭各汛游緝隊兵。仍應如前嚴加防範外。並另添派稽查一員。帶兵數名。日夜巡查。以資周密。

大柵欄瑞蚨祥綢緞店舖長孟覲侯。因本區巡官長警。在槍林彈雨之下。俱能克盡

厥職。保護商家財產。未受絲毫損失。殊屬異常出力。故於昨日購備猪肉五百斤。麵粉千斤。親自送至外右一區署。犒勞巡警。該區年署長。辭不肯收。旋因孟某強之再三。乃由電話請示吳總監允准。始行收下。

京師治安維持會。因市面謠言衆多。商民驚恐不安。遂致市面難復舊觀。茲爲勸告商家。勿再輕信謠言。各自安心營業起見。現已刷印傳單。向內外城商家佈告矣。茲將傳單錄下。

爲通知事。逆軍殄滅。共和復興。段總理已於日昨來京。京師秩序。可保安甯。逆賊張勳。雖未伏法。而荷蘭公使亦決不許其作何行動。且逆兵已悉數遣散。張勳一人。更何能出而爲惡。至徐州逆軍。早已投降。外間謠傳。萬勿輕信。卽有不虞。本會仍當事先報告。以便預防。現在確無他虞。望商民人等一體照舊營業可也。此佈。

京師商務總會。前因某師駐紮京內。商家皆懷不安。於是要求退出城外。乃於日前竟有人自稱某師代表。逕向商務總會索要餉銀若干。以作犒賞。聞商會訝其不近。

情理。當卽婉詞拒絕。或云。此等情事。必係奸人所施之詐財手段。決非某師真有此意。

日前討逆軍克復都城時。各路軍隊。尤以模範團軍隊。謀勇兼全。且於西城一帶地方秩序。尤能加以保護。殊非其他軍隊所能及。昨聞該團長官。以該學兵謀勇兼全。深堪嘉許。故於前日起。特許該團日兵。休假一星期。以資歇息云。

內外城各商舖。因避兵亂。及匪徒搶掠。故皆閉門停業。茲經警察迭次勸告。秩序已定。照常營業。故此商家復業者。已絡繹不絕。茲聞琉璃廠一帶各商舖。昨已一律開張營業矣。

京奉鐵路北京車站。售賣客貨車票。改收現洋以來。人言嘖嘖。茲聞該站長等。以各旅館棧夥所繳之入站券費。尙係紙幣。未便寬免。故於日前已通告各旅館棧夥。所有本月份入站券費。亦應改繳現洋。以昭一律。

十七日上午十時餘。西單牌樓迤北地方。有一乞丐。因饑餓不堪。乃在和順祥油鹽

店門前之燒餅攤上。搶去大餅四張。且跑且食。及至賣燒餅人將其追獲時。餅已食去過半。餘皆污穢不堪。賣燒餅人氣憤難消。當將該丐痛毆一頓。始放之去。

近日外間紛傳張勳行將受荷蘭公使之保護。逃出京外。故此駐紮京奉路各站之國軍。惟恐張勳變裝漏網。致遺後患。故於京津往來之火車上。搜檢甚嚴。

步軍統領派在四郊駐屯之游緝隊兵。前因保維京內秩序。故皆調入城內。不料郊外土匪。見無兵隊彈壓。竟敢肆行搶劫。不但行人裹足。而村莊農民。亦俱不安。

國軍此次剿除辮子兵後。京城市面。異常蕭條。因此各商店對於七月份之鋪捐。均皆藉詞延不繳付。茲聞總捐局因地方秩序。現已恢復舊觀。故於昨日已飭各區捐局。將本管區內之鋪捐車捐。催令迅速繳齊。以免積欠。

中交兩行紙幣。因受銀行停止辦事。及各錢店閉門停業之影響。遂致價值日益跌落。行將無人過問。乃於日昨中行紙幣。竟由六折餘漲至七五折。交通紙幣亦漲至七折餘。聞其故因中行將有無限制之開兌云。

此次京師大巷戰。建築物雖無大損害。然各街電線損害甚多。當局督飭工人趕速補修。惟因被害區域頗廣。非旦夕所能歲事。近來各用戶以電話時有不通之事。頗有不平之聲。實因補修未竣之故。決非局中人作弊之情事。各用戶稍諒當局苦心可也。

陸軍第一講武堂。前本定於本月十六日開學。嗣以政變。故未能實行。現聞該堂堂長鮑貴卿。以時局已經平定。故現定於八月一日行開學禮。卽於翌日開學授課。京城市面。自戰事發生後。異常恐慌。現經警廳提署及商務總會。極力維持。昨前兩日。已漸漸平復矣。紙幣之價已略增長。糧價已稍低落。較比前一二日已平復。馮河間依據約法。將繼黃陂之後。則原來之國會。當然在復活之列。據日昨政界消息。各方面政客議員。近日紛紛赴寧。謁見河間。陳述所見。就中以要求恢復國會者。占多數。河間表面固一一周旋。然因恢復國會問題。關係重大。因未得段總理同意。故亦未表示可否。而外間遂由此多有責言。又一說。段合肥對於恢復國會之意見。

並非絕對的不贊成。特手續上尙待磋商云。

討逆軍入京。雖不得謂爲規律森嚴。秋毫無犯。然無大不規律之事。惟段總理原定之計畫。本擬一俟大亂戡定。立即撤回原防。以維各地之治安秩序。數日以來。詢謀僉同。業已實行撤回之計畫。據車站所調查。前日一日五小時內。竟開車至十九次之多。確查實數。則第三師曹錕之軍隊一師一旅。已完全撤回。第十一十二等師則仍回至南苑。京畿第一混成旅張錫元所統者。則撤回通州。京畿第十六混成旅馮玉祥所統者。則撤回仍駐豐台郎坊。現惟第八師軍隊尙有一小部分。猶未運完。實因火車不敷應用。而現在京師之軍隊。已比從前爲少。不可謂非收束之迅速也。昨日外間或傳國務院已開國務會議。實則上午段總理到陸軍部接事。並未到院。而上午十一時在國務院東花園開會者。爲各路軍隊之司令。其重要之處。以軍隊業已全數撤回。總司令部亦應裁撤。並取消各路司令名義。昨日均已決定。美國公使前因京師將有戰亂。故由天津調來美兵百餘名。以資保衛使館。現在戰

事已畢。各項軍隊皆已退出。京內已歸安寧。故於昨日已將前調之兵。開回天津駐守。

中央公園。前因辦子兵斷絕東西長安門交通。以致游人却步。該園乃在園之西面。另闢一門。以便出入。現在秩序已定。故於昨日起。已將該園前門開放。照舊賣游覽券。

黎黃陂衛兵王德祿。日前猝然行兇。刺殺多人。故經黎公於事後立令步軍統領江宇澄。將此項隊兵分別遣散。茲就當日查明。凡係直魯兩省籍者。共一百七十八名。其隸屬豫鄂兩省人者。共六十名。當由江統領派令左翼第三中隊長張棟聲。及左翼游緝隊督操官關玉恆二員。將該衛兵於昨日已送回原籍遣散。

現據公府傳出確息。謂黃陂送大夫人二夫人出法國使館後。仍回法國醫院養病。並無回東廠胡同之事。外間所傳。純係一種揣測之詞。更聞公府某職員。於（十八日）往法醫院慰問黎公。而黃陂略云。俟眷屬抵津。私第安置妥協。卽定期出京赴

津。以娛晚年。對於復任大總統問題。誓死不就云。

模範團團長陸錦君。以本團各營連長兵等。此次助戰頗極出力。且甚勞苦。故於日昨。傳知團團官長目兵。自本月十七八九三日。放假三日。以資休息。

西城宮門口某糧店。於昨日有一老婦持中鈔一元。購買米麵。該鋪見係紙幣。遂云不賣。經旁人不平。代爲說項。該鋪始按銅元六十八枚收用。此種奸商。實屬有意破壞金融。望該管者其加注意焉。

地方審檢兩廳前。因帝制發生時。所有民刑訴訟案件。與現行法律不能適用。故將一切現審案件。悉皆停止。現在國體已復共和。故經黃尹兩廳長昨日已令民刑各庭。將歷日積壓之案。迅速審辦。俾免愈積愈多。

十七夜內一點餘鐘。西南方面。忽有炮聲隆隆。約有十數響。以後即寂無所聞。昨有由豐台進城者云。前夜砲聲。係在蘆溝橋附近。然尙不知何爲而發。

段總理此次由天津帶來之衛隊。不敷應用。故向京師警察廳要撥巡警若干名。編



充國務院衛隊。昨日警察廳已通知各區隊長官。各將所屬之幹練巡警。選拔若干名以備送院聽候挑選。

政府因辯子兵雖已剷除。惟禍首張勳。尙在和使署內避匿。故恐附逆之人。難免不有私通信函情事。茲爲預防若輩設施奸謀。保護地方治安起見。現已令警察廳對於往來投遞之郵件。一律施行檢察。以資防範。

警察廳自地方吃緊以來。即將各區隊巡警之休息。一律停止。以資分佈保衛商民。現在地方秩序已皆安定。故以各區隊巡警等在戒嚴期內。勞苦已極。應卽輪流休息。昨已通知各區隊。由今日起。將停止休息之令取消。

京師地方。賴警察之維持。日見起色。卽以昨日之金融中行鈔票。已漲至七八折。交通鈔票亦漲至七五折。銅元票可按八折使用。昨晚前門大街之夜市。頗形熱鬧。八埠樂戶。除小班外。其餘茶室下處。俱已照常營業。惟至夜間十一點鐘街市。行人便形稀少。

段總理因京師方面。猝遭兵戰。各行商業。更形蕭條。茲爲體恤商艱。減輕担負起見。昨已令工巡捐局將鋪捐車捐以及戲園樂戶等捐。一律豁免兩個月。以維市面。圍攻議院毆打議員之公民團代表白亮等人。昨經地方審判廳。於上午十時開庭。續行審理。被告潘伯與之律師方錫光。辯論終結後。卽於午後一時宣告判決。審判長認白亮有妨害公務罪。當將白亮吳光憲趙鵬圖三人。均判處拘役四十日。潘伯與史浚明二人。均判處罰金三十元。

前記大柵欄瑞蚨祥綢緞店犒勞警士事。茲其主人孟觀侯。又因前當礮火交加之際。賴警察偵緝隊警士在各巷口驅逐土匪游民。不准挨近商鋪。致土匪等無從下手搶掠。故於日昨又購買羊肉五百斤。猪肉五百斤。麵粉二千斤。分別送往偵緝保安兩隊。以作犒勞。

十二日東城一帶兵匪搶掠之種種。業誌前節。茲聞是日乾麵胡同中間路南二十八師長馮德麟。設有駐京辦公處。匪搶掠一空。又翟寓劉宅均皆被搶。損失甚大。


西羅圈胡同住戶某姓三家。聞有著灰色軍衣之兵匪進門。借搜查辦子兵爲名。實行搶劫財物。惟三家所失尙尠云。

頃由段祺瑞特派往南京敦促馮代理總統來京之江天鐸刻已抵甯。然據傳來消息。馮氏在此際。恐不肯北上云。

此次所組織段內閣。全無民黨人物一事。頗與南方人士以奇異之感。中立派某氏云。此種舉動。恐於收拾時局上。頗有阻害。甚爲段氏不取。

是役先後。不過半月。而京師喋血萬衆。震驚厥禍。實非淺尠。且機勢所牽。掣紛紜。旁出之問題。至今迄未解決。如總統繼任也。國會復集也。總理責任也。內閣組織也。南方民黨意見也。對外主張也。各省軍務處置也。以及保護約法。清室優待條件。一切軍民善後諸問題。棼絲牛毛。若何了結。妥帖尙未有期。來日大難隱憂。方始則此復辟噩夢之波響。雖倍蕞半月。恐尙不能完全恢復。要之中華民國何辜。六年十一戰。誠如古傳所云。誰生厲階。寧爲荼毒。是又執筆而不禁涕泗之橫流矣。鯁生遭此亂。

者。離。淹。留。輦。轂。蓬。心。蒿。目。識。小。自。慚。未。敢。率。抒。胸。臆。聊。以。楫。習。見。聞。錄。而。存。之。以。俟。覽。



民國六年八月十號出版

復辟半月記

定價大洋六角

不  
准  
翻  
印  
所  
有  
版  
權

著  
者  
許  
指  
嚴

發  
行  
者  
交  
通  
圖  
書  
館

印  
刷  
者  
交  
通  
圖  
書  
館

分  
售  
處  
本  
外  
埠  
各  
大  
書  
坊

總  
發  
行  
所

蘇州觀前街  
上海交通路一三三號  
交通圖書館

上海图书馆藏书



A541 212 0013 1867B

